



MALAYSIA

**PENYATA RASMI PARLIMEN
DEWAN RAKYAT**

**PARLIMEN KEDUA BELAS
PENGKAL KETIGA
MESYUARAT KEDUA**

K A N D U N G A N

MENGANGKAT SUMPAH	(Halaman 1)
PEMASYHURAN TUAN YANG DI-PERTUA:	
- Mengalu-alukan Ahli-ahli Baru	(Halaman 1)
- Memperkenalkan Akta-akta	(Halaman 1)
- Perutusan Daripada Dewan Negara	(Halaman 2)
JAWAPAN-JAWAPAN LISAN BAGI PERTANYAAN-PERTANYAAN	(Halaman 3)
RANG UNDANG-UNDANG DIBAWA KE DALAM MESYUARAT	(Halaman 25)
USUL PERDANA MENTERI: Mengutuk Tentera Rejim Zionis Yang Menyerang Konvoi Bantuan Kemanusiaan Ke Gaza	(Halaman 25)
USUL-USUL: Waktu Mesyuarat dan Urusan Dibebaskan Daripada Peraturan Mesyuarat	(Halaman 35)
Menangguhkan Mesyuarat di Bawah P.M 16(3)	(Halaman 94)
UCAPAN-UCAPAN PENANGGUHAN:	
■ Penyerahan Medan Minyak Blok 'L' dan 'M' kepada Brunei dan Pencabulan Terhadap Kedaulatan Negara – Y.B. Dato' Seri Anwar Ibrahim (<i>Permatang Pauh</i>)	(Halaman 94)
■ Pencemaran Serius Kampung Bukit Beruang, Kuala Sungai Baru, Melaka – Y.B. Tuan Sim Tong Him (<i>Kota Melaka</i>)	(Halaman 99)

AHLI-AHLI DEWAN RAKYAT

1. Yang Berhormat Tuan Yang di-Pertua, Tan Sri Datuk Seri Utama Pandikar Amin Haji Mulia, S.U.M.W., P.G.D.K., P.S.M., J.S.M., J.P.
2. Yang Berhormat Timbalan Yang di-Pertua, Datuk Dr. Wan Junaidi bin Tuanku Jaafar, P.J.N., P.B.S. J.B.S., J.S.M. (Santubong) – PBB
3. “ Timbalan Yang di-Pertua, Datuk Ronald Kiandee, A.S.D.K., P.G.D.K. (Beluran) – UMNO

MENTERI

1. Yang Amat Berhormat Perdana Menteri dan Menteri Kewangan, Dato' Sri Mohd. Najib bin Tun Abdul Razak, D.U.P.N., S.S.A.P., S.I.M.P., D.P.M.S., D.S.A.P., P.N.B.S., D.U.B.C.(T). (Pekan) – UMNO
2. “ Timbalan Perdana Menteri dan Menteri Pelajaran, Tan Sri Dato' Haji Muhyiddin bin Mohd. Yassin, S.P.M.P., S.P.M.J., P.S.M., S.M.J., P.I.S., B.S.I. (Pagoh) – UMNO
3. Yang Berhormat Menteri di Jabatan Perdana Menteri, Tan Sri Dr. Koh Tsu Koon – *Senator*
4. “ Menteri Perusahaan Perladangan dan Komoditi, Tan Sri Bernard Giluk Dompok, P.S.M., S.P.D.K. (Penampang) – UPKO
5. “ Menteri di Jabatan Perdana Menteri, Dato' Seri Mohamed Nazri Abdul Aziz, S.P.M.P., D.M.S.M., A.M.P., B.K.T. (Padang Rengas) – UMNO
6. “ Menteri Dalam Negeri, Dato' Seri Hishammuddin bin Tun Hussein, S.P.M.P., S.S.A.P., S.I.M.P., D.S.A.P., D.P.M.J. (Sembrong) – UMNO
7. “ Menteri Penerangan, Komunikasi dan Kebudayaan, Dato' Seri Utama Dr. Rais Yatim, S.J.M.K., S.S.A.P., S.P.N.S., D.S.N.S. (Jelebu) – UMNO
8. “ Menteri di Jabatan Perdana Menteri, Tan Sri Nor Mohamed bin Yakcop, (Tasik Gelugor) – UMNO
9. “ Menteri Tenaga, Teknologi Hijau dan Air, Dato' Sri Peter Chin Fah Kui, S.S.A.P., P.G.B.K., P.B.S., A.B.S. (Miri) – SUPP
10. “ Menteri Kemajuan Luar Bandar dan Wilayah, Dato' Seri Haji Mohd. Shafie bin Haji Apdal, D.S.A.P., P.G.D.K., D.M.S.M. (Semporna) – UMNO
11. “ Menteri Pengajian Tinggi, Dato' Seri Mohamed Khaled bin Nordin, D.S.P.N., S.M.J., P.I.S. (Pasir Gudang) – UMNO
12. “ Menteri Perdagangan Antarabangsa dan Industri, Dato' Sri Mustapa bin Mohamed (Jeli) – UMNO
13. “ Menteri Sains, Teknologi dan Inovasi, Datuk Seri Dr. Maximus Johnity Ongkili, A.S.D.K., J.P. (Kota Marudu) – PBS

14. Yang Berhormat Menteri Sumber Asli dan Alam Sekitar, Dato' Seri Douglas Uggah Embas (Betong) – PBB
15. “ Menteri Pelancongan, Dato' Sri Dr. Ng Yen Yen, D.I.M.P., D.S.A.P., D.P.M.K., D.P.M.P., P.J.K. (Raub) – MCA
16. “ Menteri Pertanian dan Industri Asas Tani, Datuk Seri Noh bin Haji Omar, D.G.S.M., D.P.M.S., D.M.S.M., K.M.N., A.S.A., P.J.K., J.P. (Tanjong Karang) – UMNO
17. “ Menteri Pertahanan, Dato' Seri Dr. Ahmad Zahid bin Hamidi, D.M.S.M., S.S.A.P., P.P.T., P.J.K. (Bagan Datok) – UMNO
18. “ Menteri Kerja Raya, Dato' Shaziman bin Abu Mansor, D.S.N.S., D.S.A.P., A.N.S., J.P. (Tampin) – UMNO
19. “ Menteri Kesihatan, Dato' Seri Liow Tiong Lai, D.G.S.M., S.S.A.P., D.I.M.P., S.M.P. (Bentong) – MCA
20. “ Menteri Belia dan Sukan, Dato' Ahmad Shabery Cheek (Kemaman) – UMNO
21. “ Menteri Sumber Manusia, Datuk Dr. S. Subramaniam (Segamat) – MIC
22. “ Menteri Perdagangan Dalam Negeri, Koperasi dan Kepenggunaan, Dato' Sri Ismail Sabri bin Yaakob, D.I.M.P., D.M.S.M., A.D.K. (Bera) – UMNO
23. “ Menteri Kewangan II, Dato' Seri Haji Ahmad Husni Mohamad Hanadzlah, P.P.T., A.M.P. (Tambun) – UMNO
24. “ Menteri Pengangkutan, Dato' Seri Kong Cho Ha (Lumut) – MCA
25. “ Menteri Pembangunan Wanita, Keluarga dan Masyarakat, Dato' Sri Shahrizat binti Abdul Jalil, S.S.A.P., D.G.P.N., D.I.M.P. – *Senator*
26. “ Menteri Luar Negeri, Dato' Sri Anifah bin Aman, S.S.A.P. (Kimanis) – UMNO
27. “ Menteri Wilayah Persekutuan dan Kesejahteraan Bandar, Dato' Raja Nong Chik bin Raja Zainal Abidin, D.P.T.J. – *Senator*
28. “ Menteri di Jabatan Perdana Menteri, Mejar Jeneral (B) Dato' Seri Jamil Khir Baharum, P.S.A.T., D.I.M.P., D.S.N.S., D.S.D.K., P.A.T., J.S.M., K.A.T., K.M.N., A.M.K., P.J.M. – *Senator*
29. “ Menteri di Jabatan Perdana Menteri, Dato' Sri Idris Jala – *Senator*
30. “ Menteri Perumahan dan Kerajaan Tempatan, Dato' Wira Chor Chee Heung (Alor Setar) – MCA

TIMBALAN MENTERI

1. Yang Berhormat Timbalan Menteri Sumber Asli dan Alam Sekitar, Tan Sri Datuk Seri Panglima Joseph Kurup (Pensiangan) – PBRs
2. “ Timbalan Menteri di Jabatan Perdana Menteri, Datuk Liew Vui Keong, P.G.D.K., A.D.K., J.P. (Sandakan) – LDP

3. Yang Berhormat Timbalan Menteri Pertahanan, Datuk Dr. Haji Abd. Latiff bin Ahmad (Mersing) – UMNO
4. “ Timbalan Menteri Penerangan, Komunikasi dan Kebudayaan I, Dato’ Joseph Salang anak Gandum (Julau) – PRS
5. “ Timbalan Menteri Kemajuan Luar Bandar dan Wilayah II, Datuk Joseph Entulu anak Belaun (Selangau) – PRS
6. “ Timbalan Menteri Pertanian dan Industri Asas Tani I, Dato’ Wira Mohd. Johari bin Baharum, S.I.M.P., D.S.D.K., D.M.S.M., D.I.M.P., D.S.M., A.M.K., B.K.M., P.J.K., J.P. (Kubang Pasu) – UMNO
7. “ Timbalan Menteri Dalam Negeri I, Datuk Wira Abu Seman bin Haji Yusop, D.C.S.M., D.M.S.M., K.M.N., B.K.T., J.P. (Masjid Tanah) – UMNO
8. “ Timbalan Menteri di Jabatan Perdana Menteri, Dato’ Dr. Mashitah binti Ibrahim – *Senator*
9. “ Timbalan Menteri Kerja Raya, Dato’ Yong Khoo Seng, D.S.P.N., K.M.N. (Stampin) – SUPP
10. “ Timbalan Menteri Perdagangan Dalam Negeri, Koperasi dan Kepenggunaan II, Datuk Hajah Rohani binti Abdul Karim (Batang Lupa) – PBB
11. “ Timbalan Menteri Tenaga, Teknologi Hijau dan Air, Puan Noriah binti Kasnon, S.M.S., P.J.K. (Sungai Besar) – UMNO
12. “ Timbalan Menteri Perdagangan Antarabangsa dan Industri II, Dato’ Jacob Dungau Sagan, P.S.B.S., J.B.S., K.M.N., P.P.B., P.P.N. (Baram) – SPDP
13. “ Timbalan Menteri Pelajaran I, Datuk Dr. Wee Ka Siong, D.M.S.M. (Ayer Hitam) – MCA
14. “ Timbalan Menteri Pengangkutan II, Tuan Jelaing anak Mersat (Saratok) – SPDP
15. “ Timbalan Menteri Sains, Teknologi dan Inovasi, Tuan Haji Fadillah bin Yusof (Petra Jaya) – PBB
16. “ Timbalan Menteri Perdagangan Dalam Negeri, Koperasi dan Kepenggunaan I, Dato’ Tan Lian Hoe, D.P.M.P. (Gerik) – GERAKAN
17. “ Timbalan Menteri di Jabatan Perdana Menteri, Dato’ Devamany a/l S. Krishnasamy, S.M.P., P.P.T. (Cameron Highlands) – MIC
18. “ Timbalan Menteri Wilayah Persekutuan dan Kesejahteraan Bandar, Datuk Saravanan a/l Murugan (Tapah) – MIC
19. “ Timbalan Menteri Luar Negeri I, Tuan A. Kohilan Pillay a/l G. Appu – *Senator*
20. “ Timbalan Menteri Pengajian Tinggi I, Dr. Hou Kok Chung (Kluang) – MCA
21. “ Timbalan Menteri Perusahaan, Perladangan dan Komoditi I, Dato’ Hamzah bin Zainudin, D.P.M.P., D.P.T.J., K.M.N., A.M.P., P.P.T., J.P. (Larut) – UMNO

22. Yang Berhormat Timbalan Menteri Pengajian Tinggi II, Dato' Saifuddin bin Abdullah, D.S.A.P., D.P.M.P., D.S.M. (Temerloh) – UMNO
23. “ Timbalan Menteri Kemajuan Luar Bandar dan Wilayah I, Dato' Haji Hasan bin Malek, D.S.N.S., D.M.S.M., D.S.M., J.P., K.M.N., A.M.N., P.M.C., P.J.K., B.K.C. (Kuala Pilah) – UMNO
24. “ Timbalan Menteri Sumber Manusia, Dato' Maznah binti Mazlan – *Senator*
25. “ Timbalan Menteri Perumahan dan Kerajaan Tempatan, Datuk Seri Panglima Haji Lajim bin Haji Ukin, P.G.D.K., S.P.D.K., J.M.N., J.P. (Beaufort) – UMNO
26. “ Timbalan Menteri di Jabatan Perdana Menteri, Dato' Murugiah a/Thopasamy – *Senator*
27. “ Timbalan Menteri Pengangkutan I, Datuk Abdul Rahim bin Bakri (Kudat) – UMNO
28. “ Timbalan Menteri Kewangan I, Datuk Dr. Awang Adek Hussein, D.M.S.M., D.J.M.K., S.I.M.P., D.P.M.K., D.C.S.M., J.S.M. – *Senator*
29. “ Timbalan Menteri Pembangunan Wanita, Keluarga dan Masyarakat, Puan Heng Seai Kie - *Senator*
30. “ Timbalan Menteri Kesihatan, Datuk Rosnah binti Haji Abd. Rashid Shirlin, P.G.D.K., A.D.K. (Papar) – UMNO
31. “ Timbalan Menteri Pelajaran II, Dr. Haji Mohd. Puad bin Zarkashi, P.I.S. (Batu Pahat) – UMNO
32. “ Timbalan Menteri Belia dan Sukan II, Dato' Razali bin Haji Ibrahim (Muar) – UMNO
33. “ Timbalan Menteri Perdagangan Antarabangsa dan Industri I, Dato' Mukhriz bin Tun Dr. Mahathir (Jerlun) – UMNO
34. “ Timbalan Menteri di Jabatan Perdana Menteri, Datuk Haji Ahmad bin Haji Maslan, D.M.S.M. (Pontian) – UMNO
35. “ Timbalan Menteri Dalam Negeri II, Dato' Lee Chee Leong, D.P.M.P., A.M.P. (Kampar) – MCA
36. “ Timbalan Menteri Pelancongan, Dato' Dr. James Dawos Mamit, P.S.B.S., P.P.B., P.P.S., P.P.D. (Mambong) – PBB
37. “ Timbalan Menteri Perusahaan, Perladangan dan Komoditi II, Dato' G. Palanivel – *Senator*
38. “ Timbalan Menteri Kewangan II, Dato' Donald Lim Siang Chai – *Senator*
39. “ Timbalan Menteri Penerangan, Komunikasi dan Kebudayaan II, Datuk Maglin Dennis D'Cruz – *Senator*
40. “ Timbalan Menteri Belia dan Sukan I, Tuan Gan Ping Sieu – *Senator*
41. “ Timbalan Menteri Luar Negeri II, Datuk Richard Riot anak Jaem, P.J.N., J.B.S., K.M.N. (Serian) – SUPP

42. Yang Berhormat Timbalan Menteri Pertanian dan Industri Asas Tani II, Tuan Chua Tee Yong (Labis) – MCA

AHLI-AHLI (BN)

1. Yang Berhormat Datuk Aaron Ago anak Dagang (Kanowit) – PRS
2. “ Datuk Abd. Rahman Bakri, A.S.A. (Sabak Bernam) – UMNO
3. “ Datuk Abd. Rahman Dahlan, D.I.M.P., A.D.K. (Kota Belud) – UMNO
4. “ Datuk Seri Panglima Haji Abdul Ghapur Salleh (Kalabakan) – UMNO
5. “ Tun Abdullah bin Haji Ahmad Badawi, S.U.M.Z., D.K.1 (Johor), S.P.M.S., S.S.S.J., S.P.S.A., S.S.A.P., S.P.D.K., D.U.N.M., D.P., S.P.N.S., D.G.P.N., D.S.S.A., D.M.P.N., D.J.N., K.M.N., A.M.N. (Kepala Batas) – UMNO
6. “ Dato’ Seri Dr. Abdullah Md. Zin, D.P.M.T. (Besut) – UMNO
7. “ Dato’ Abdul Manan Ismail, D.I.M.P., P.K.C. (Paya Besar) – UMNO
8. “ Datuk Abdul Wahab Dolah (Igan) – PBB
9. “ Dato’ Paduka Abu Bakar bin Taib, D.H.M.S., D.S.D.K., S.D.K., K.M.N., B.C.K., P.J.K. (Langkawi) – UMNO
10. “ Datuk Wira Haji Ahmad Hamzah, D.C.S.M., D.M.S.M., K.M.N., P.J.K. (Jasin) – UMNO
11. “ Tuan Haji Ahmad Lai Bujang, A.B.S. (Sibuti) – PBB
12. “ Datuk Alexander Nanta Linggi (Kapit) – PBB
13. “ Dato’ Sri Azalina Dato’ Othman Said, S.P.M.P. (Pengerang) – UMNO
14. “ Dato’ Seri Haji Azmi Khalid, D.P.M.P., S.M.P., P.J.K. (Padang Besar) – UMNO
15. “ Datuk Haji Baharum bin Haji Mohamed, D.M.S.M., A.M.N., P.I.S. (Sekijang) – UMNO
16. “ Datuk Billy Abit Joo, K.M.N. (Hulu Rajang) – PRS
17. “ Datuk Bung Moktar bin Radin (Kinabatangan) – UMNO
18. “ Tuan Ding Kuong Hiing (Sarikei) – SUPP
19. “ Datuk Ir. Edmund Chong Ket Wah, P.G.D.K. (Batu Sapi) – PBS
20. “ Tan Sri Datuk Seri Dr. Fong Chan Onn, D.G.S.M., D.M.S.M. (Alor Gajah) – MCA
21. “ Datuk Halimah binti Mohd. Sadique, P.J.N., P.I.S. (Tenggara) – UMNO
22. “ Ir. Haji Hamim bin Samuri (Ledang) – UMNO
23. “ Tuan Haji Hasbi Haji Habibollah (Limbang) – PBB
24. “ Dato’ Henry Sum Agong (Lawas) – PBB

-
25. Yang Berhormat Datuk Ir. Haji Idris bin Haji Haron, D.M.S.M., D.S.M. (Tangga Batu) – UMNO
 26. “ Dato’ Ismail bin Abd. Muttalib, D.I.M.P., S.A.P., A.A.P., A.M.P., P.K.C. (Maran) – UMNO
 27. “ Datuk Ismail Kasim, D.P.M.P., S.M.P., A.M.P. (Arau) – UMNO
 28. “ Dato’ Haji Ismail bin Mohamed Said (Kuala Krau) – UMNO
 29. “ Dato’ Seri Dr. Jamaluddin Mohd. Jarjis, S.I.M.P., D.I.M.P., S.A.P. (Rompin) – UMNO
 30. “ Tan Sri Datuk Seri Joseph Pairin Kitingan (Keningau) – PBS
 31. “ Datuk Juslie Ajirol (Libaran) – UMNO
 32. “ Tuan P. Kamalanathan a/l P. Panchanathan (Hulu Selangor) - MIC
 33. “ Tuan Khairy Jamaluddin (Rembau) – UMNO
 34. “ Tuan Liang Teck Meng (Simpang Renggam) – GERAKAN
 35. “ Dato’ Lilah bin Yasin, D.S.N.S. (Jempol) – UMNO
 36. “ Datuk Dr. Marcus Mojigoh, P.G.D.K., J.S.M., A.D.K., B.S.K. (Putatan) – UPKO
 37. “ Tuan Masir Kujat, P.P.B. (Sri Aman) – PRS
 38. “ Tuan Matulidi Jusoh, P.P.N., P.J.K. (Dungun) – UMNO
 39. “ Datuk Md. Sirat Abu, D.M.S.M., K.M.N., B.K.T., P.J.K., J.P. (Bukit Katil) – UMNO
 40. “ Datuk Haji Mohamad bin Haji Aziz (Sri Gading) – UMNO
 41. “ Dato’ Dr. Mohamad Shahrum Osman, D.I.M.P., A.M.P. (Lipis) – UMNO
 42. “ Dato’ Mohd. Jidin Shafee, D.P.M.T., D.M.S.M., K.M.N., A.M.N. (Setiu) – UMNO
 43. “ Datuk Mohd. Nasir Ibrahim Fikri, D.M.P.T. (Kuala Nerus) – UMNO
 44. “ Tuan Haji Mohd. Nor Othman, A.M.N., P.J.C., P.J.K. (Hulu Terengganu) – UMNO
 45. “ Tuan Mohd. Nizar Haji Zakaria, A.M.P. (Parit) – UMNO
 46. “ Dato’ Seri Mohd. Radzi Sheikh Ahmad (Kangar) – UMNO
 47. “ Dato’ Sri Ir. Mohd. Zin bin Mohamed, D.P.M.S., D.P.T.J., S.S.A.P., J.P. (Sepang) – UMNO
 48. “ Dato’ Sri Dr. Muhammad Leo Michael Toyad Abdullah, P.N.B.S., P.G.B.K., J.B.S. (Mukah) – PBB
 49. “ Puan Hajah Nancy Shukri (Batang Sadong) – PBB
 50. “ Datuk Hajah Norah Abd. Rahman (Tanjong Manis), P.J.N. – PBB
 51. “ Dato’ Noraini binti Ahmad (Parit Sulong) – UMNO
 52. “ Datuk Nur Jazlan Mohamed (Pulai) – UMNO

53. Yang Berhormat Dato' Seri Ong Ka Chuan, S.P.M.P., D.P.M.P., P.M.P. (Tanjong Malim) – MCA
54. “ Tan Sri Dato' Seri Ong Ka Ting, P.M.N., S.P.M.P., D.P.M.S., D.P.M.P. (Kulai) – MCA
55. “ Dato' Sri Ong Tee Keat, P.J.N., S.M.S. (Pandan) – MCA
56. “ Tan Sri Rafidah Aziz, S.M.P.T., S.P.M.P., D.P.M.S., A.M.N. (Kuala Kangsar) – UMNO
57. “ Datuk Raime Unggi (Tenom) – UMNO
58. “ Tuan Haji Salleh Kalbi, A.D.K., B.K.M., P.J.K. (Silam) – UMNO
59. “ Datuk Sapawi Ahmad Wasali (Sipitang) – UMNO
60. “ Datuk Seri Utama Shahrir bin Abdul Samad (Johor Bahru) – UMNO
61. “ Dato' Shamsul Anuar Nasarah, D.P.M.P., S.M.S., P.P.N., P.P.T. (Lenggong) – UMNO
62. “ Datuk Siringan Gubat (Ranau) – UPKO
63. “ Dato' Sri Sulaiman Abdul Rahman bin Abdul Taib (Kota Samarahan) – PBB
64. “ Tan Sri Datuk Seri Syed Hamid bin Syed Jaafar Albar, P.M.N., S.P.M.K., S.P.M.J., D.P.P.N., D.G.S.M., S.P.D.K., D.P.M.J., S.M.J., A.M.N. (Kota Tinggi) – UMNO
65. “ Dato' Haji Tajuddin Abdul Rahman, D.P.M.P., D.M.S.M., K.M.N., A.M.P., J.P. (Pasir Salak) – UMNO
66. “ Puan Tan Ah Eng (Gelang Patah) – MCA
67. “ Tuan Teng Boon Soon (Tebrau) – MCA
68. “ Datuk Seri Tengku Adnan Tengku Mansor, S.S.A.P. (Putrajaya) – UMNO
69. “ Dato' Seri Tengku Azlan ibni Sultan Abu Bakar, S.P.T.J., D.S.A.S. (Jerantut) – UMNO
70. “ Tengku Razaleigh Hamzah (Gua Musang) – UMNO
71. “ Dato' Seri Tiong King Sing (Bintulu) – SPDP
72. “ Datuk Tiong Thai King, P.G.B.K. (Lanang) – SUPP
73. “ Datuk Dr. Tekhee @ Tiki anak Lafe, D.M.S.M. (Mas Gading) – SPDP
74. “ Datuk Wee Jeck Seng (Tanjong Piai) – MCA
75. “ Datuk Seri Panglima Wilfred Mojilip Bumburing, S.P.D.K., P.G.D.K., P.J.N., J.S.M., J.P. (Tuaran) – UPKO
76. “ Tuan William @ Nyallau anak Badak, P.B.B., P.P.S. (Lubok Antu) – PRS
77. “ Datuk Haji Yusof Haji Mahal, D.M.S.M. (Labuan) – UMNO
78. “ Dato' Sri Haji Zulhasnan bin Rafique, D.I.M.P., A.M.N., (Setiawangsa) – UMNO

AHLI-AHLI (PKR)

1. Yang Berhormat Tuan Haji Ab. Aziz Ab. Kadir (Ketereh)
2. “ Tan Sri Dato’ Seri Abdul Khalid bin Ibrahim, D.P.M.S., D.S.A.P., P.S.M. (Bandar Tun Razak)
3. “ Tuan Abdullah Sani Abdul Hamid (Kuala Langat)
4. “ Tuan Ahmad Kasim (Kuala Kedah)
5. “ Tuan Amran bin Ab. Ghani (Tanah Merah)
6. “ Dato’ Seri Anwar Ibrahim (Permatang Pauh)
7. “ Tuan Azan Ismail (Indera Mahkota)
8. “ Tuan Chua Tian Chang @ Tian Chua (Batu)
9. “ Puan Fuziah Salleh (Kuantan)
10. “ Tuan Gwo Burne Loh (Kelana Jaya)
11. “ Tuan Hee Loy Sian (Petaling Jaya Selatan)
12. “ Dato’ Johari Abdul, D.S.D.K. (Sungai Petani)
13. “ Dato’ Kamarul Baharin Abbas, D.S.S.A. (Telok Kemang)
14. “ Dr. Lee Boon Chye (Gopeng)
15. “ Dr. M. Jeyakumar Devaraj (Sungai Siput)
16. “ Tuan Mohamed Azmin Ali (Gombak)
17. “ Tuan Mohd. Yusmadi Mohd. Yusoff (Balik Pulau)
18. “ Tuan N. Gobalakrishnan (Padang Serai)
19. “ Puan Nurul Izzah Anwar (Lembah Pantai)
20. “ Dato’ Rashid Din, S.M.K., D.I.M.P. (Merbok)
21. “ Tuan R. Sivarasa (Subang)
22. “ Tuan Saifuddin Nasution Ismail (Machang)
23. “ Tuan S. Manickavasagam (Kapar)
24. “ Tuan William Leong Jee Keen (Selayang)
25. “ Puan Hajah Zuraida Kamaruddin (Ampang)

AHLI-AHLI (DAP)

1. Yang Berhormat Tuan Charles Anthony Santiago (Klang)
2. “ Tuan Chong Chieng Jen (Bandar Kuching)
3. “ Puan Chong Eng (Bukit Mertajam)
4. “ Tuan Chow Kon Yeow (Tanjong)
5. “ Tuan Er Teck Hwa (Bakri)
6. “ Tuan Fong Kui Lun (Bukit Bintang)
7. “ Puan Fong Po Kuan (Batu Gajah)

8. Yang Berhormat Tuan Gobind Singh Deo (Puchong)
9. “ Tuan Hiew King Cheu (Kota Kinabalu)
10. “ Tuan Jeff Ooi Chuan Aun (Jelutong)
11. “ Tuan John Fernandez (Seremban)
12. “ Tuan Liew Chin Tong (Bukit Bendera)
13. “ Tuan Lim Guan Eng (Bagan)
14. “ Tuan Lim Kit Siang (Ipoh Timur)
15. “ Tuan Lim Lip Eng (Segambut)
16. “ Tuan Loke Siew Fook (Rasah)
17. “ Tuan M. Kulasegaran (Ipoh Barat)
18. “ Tuan M. Manogaran (Telok Intan)
19. “ Tuan Nga Kor Ming (Taiping)
20. “ Dato' Ngeh Koo Ham (Beruas)
21. “ Prof. Dr. P. Ramasamy (Batu Kawan)
22. “ Tuan Tony Pua Kiam Wee (Petaling Jaya Utara)
23. “ Tuan Karpal Singh (Bukit Gelugor)
24. “ Tuan Sim Tong Him (Kota Melaka)
25. “ Tuan Tan Kok Wai (Cheras)
26. “ Dr. Tan Seng Giaw (Kepong)
27. “ Puan Teo Nie Ching (Serdang)
28. “ Puan Teresa Kok Suh Sim (Seputeh)
29. “ Tuan Wong Ho Leng (Sibu)

AHLI-AHLI (PAS)

1. Yang Berhormat Dato' Seri Haji Abdul Hadi Awang (Marang)
2. “ Dato' Ab. Halim bin Ab. Rahman, D.P.M.K. (Pengkalan Chepa)
3. “ Tuan Che Uda bin Che Nik, B.C.K., A.M.N. (Sik)
4. “ Dr. Che Rosli Che Mat (Hulu Langat)
5. “ Dr. Dzulkefly Ahmad (Kuala Selangor)
6. “ Dato' Kamaruddin Jaffar, B.C.M., D.S.N.S. (Tumpat)
7. “ Tuan Khalid Abd. Samad (Shah Alam)
8. “ Dr. Lo' Lo' Haji Mohamad Ghazali (Titiwangsa)
9. “ Dato' Mahfuz bin Haji Omar, D.S.D.K. (Pokok Sena)
10. “ Dato' Seri Ir. Mohammad Nizar bin Jamaluddin (Bukit Gantang)
11. “ Tuan Haji Mohd. Abdul Wahid bin Endut (Kuala Terengganu)
12. “ Tuan Mohd. Firdaus bin Jaafar (Jerai)

13. Yang Berhormat Dr. Mohd. Hatta Md. Ramli (Kuala Krai)
14. “ Dato’ Dr. Mohd. Hayati bin Othman (Pendang)
15. “ Tuan Mohd. Nasir bin Zakaria (Padang Terap)
16. “ Tuan Muhammad bin Husin (Pasir Puteh)
17. “ Dr. Mujahid Yusof Rawa (Parit Buntar)
18. “ Tuan Haji Nasharuddin Mat Isa (Bachok)
19. “ Tuan Salahuddin Haji Ayub (Kubang Kerian)
20. “ Dr. Hajah Siti Mariah binti Mahmud (Kota Raja)
21. “ Puan Siti Zailah Mohd. Yusoff (Rantau Panjang)
22. “ Tuan Haji Taib Azamudden Md. Taib, J.B.S., A.M.N. (Baling)
23. “ Dato’ Haji Wan Abd. Rahim Wan Abdullah, D.J.M.K. (Kota Bharu)

AHLI (Bebas)

1. Yang Berhormat Datuk Chua Soon Bui, P.G.D.K. (Tawau) – SAPP
2. “ Datuk Eric E. Majimbun, P.G.D.K. (Sepangar) – SAPP
3. “ Dato’ Ibrahim Ali, D.J.M.K., D.P.M.S., D.M.S.M. (Pasir Mas)
4. “ Tuan Mohsin Fadzil Samuri (Bagan Serai)
5. “ Tuan Tan Tee Beng (Nibong Tebal)
6. “ Tuan Wee Choo Keong, S.M.K. (Wangsa Maju)
7. “ Dato’ Seri Zahrain Mohamed Hashim, D.S.P.N., P.J.K. (Bayan Baru)
8. “ Tuan Zulkifli bin Nordin (Kulim Bandar Baharu)

DEWAN RAKYAT

Ketua Pentadbir Parlimen

Datuk Haji Kamaruddin Mohamed Baria

Setiausaha Dewan Rakyat

Datuk Roosme binti Hamzah

Setiausaha Bahagian (Pengurusan Dewan)

Encik Ikmalrudin bin Ishak

PETUGAS-PETUGAS

CAWANGAN PENYATA RASMI (HANSARD)

Azhari bin Hamzah

Monarita binti Mohd Hassan

Rosna binti Bujairomi

Hajah Supiah binti Dewak

Sarimah binti Haji Amran

Hadzirah binti Ibrahim

Nurziana binti Ismail

Suriyani binti Mohd. Noh

Aisyah binti Razki

Yoogeswari a/p Muniandy

Nor Liyana binti Ahmad

Zatul Hijanah binti Yahya

Sharifah Nor Asilah binti Syed Basir

Nik Nor Ashikin binti Nik Hassan

Hafilah binti Hamid

Siti Norhazarina binti Ali

Mohd. Shahrul Hafiz bin Yahaya

Mulyati binti Kamarudin

Ganesan a/l Nanthan

Nor Hamizah binti Haji Hassan

Azmir bin Mohd Salleh

Ainul Wahidah binti Ismail @ Fakhri

Nur Nazihah binti Mohd. Nazir

Noraidah binti Manaf

Mohd. Fairus bin Mohd. Padzil

Mohd. Zaidi bin Mahmood

Mohd. Izwan bin Mohd. Esa

Hazrul bin Sharif

Nurul Aishah binti Sha'arin

Nor Kamsiah binti Asmad

Siti Zubaidah binti Karim

Aifarina binti Azaman

Noorfazilah binti Talib

Farah Asyraf binti Khairul Anuar

Julia binti Mohd. Johari

Ainuddin bin Ahmad Tajuddin

MALAYSIA**DEWAN RAKYAT****Isnin, 7 Jun 2010****Mesyuarat dimulakan pada pukul 10.00 pagi****DOA****[Tuan Yang di-Pertua *mempengerusikan Mesyuarat*]**

MENGANGKAT SUMPAAH

Ahli-ahli Yang Berhormat yang tersebut di bawah ini telah mengangkat sumpah:

- Tuan P. Kamalanathan a/l P. Panchanathan
- Tuan Wong Ho Leng

PEMASYHURAN TUAN YANG DI-PERTUA**MENGALU-ALUKAN AHLI-AHLI BARU**

Tuan Yang di-Pertua: Ahli-ahli Yang Berhormat bagi kawasan Hulu Selangor dan Ahli Yang Berhormat bagi kawasan Sibu, saya mengucapkan tahniah kepada Ahli-ahli Yang Berhormat yang mengangkat sumpah sebentar tadi. Saya berharap semoga Ahli-ahli Yang Berhormat dapat memberi sumbangan yang berguna dan berfaedah kepada Dewan ini dan kepada negara seterusnya; dan semoga Ahli-ahli Yang Berhormat dapat berkhidmat dengan cemerlangnya, terima kasih.

MEMPERKENANKAN AKTA-AKTA

Tuan Yang di-Pertua: Ahli-ahli Yang Berhormat, saya suka hendak memberitahu Majlis ini iaitu Seri Paduka Baginda Yang di-Pertuan Agong dengan limpah kurnia Baginda telah memperkenalkan akta-akta yang telah diluluskan oleh Parlimen dalam Mesyuarat Penggal yang lalu seperti berikut:-

1. Akta Perdagangan Strategik 2010;
2. Akta Perlindungan Data Peribadi 2009;
3. Akta Perbekalan Tambahan (2009) 2010;
4. Akta Perbekalan Tambahan (2010) 2010;
5. Akta Agensi Pelaporan Kredit 2009;
6. Akta Perlindungan Pemberi Maklumat 2010;

7. Akta Institusi-institusi Pelajaran (Tatatertib) (Pindaan) 2010;
8. Akta Persaingan 2010;
9. Akta Suruhanjaya Persaingan 2010;
10. Akta Suruhanjaya Pengangkutan Awam Darat 2010;
11. Akta Pengangkutan Awam Darat 2010;
12. Akta Lembaga Perlesenan Kenderaan Perdagangan (Pindaan) 2010

■1010

13. Akta Pelesenan Kenderaan Pelancongan (Pindaan) 2010;
14. Akta Kereta Api (Pindaan) 2010; dan
15. Akta Kanun Tatacara Jenayah (Pindaan) 2010.

PERUTUSAN DARIPADA DEWAN NEGARA

Tuan Yang di-Pertua: Ahli-ahli Yang Berhormat, saya telah menerima satu perutusan daripada Yang di-Pertua Dewan Negara yang menyatakan persetujuan Dewan itu kepada rang undang-undang yang telah diluluskan oleh Dewan Rakyat dalam sidang Parlimen penggal yang lalu.

Saya menjemput Setiausaha membacakan perutusan itu sekarang.

[Setiausaha membacakan Perutusan]

“6 Mei 2010

Perutusan Daripada Dewan Negara Kepada Dewan Rakyat

Tuan Yang di-Pertua Dewan Rakyat,

Dewan Negara telah meluluskan Rang Undang-undang yang berikut tanpa pindaan:

1. Rang Undang-undang Perdagangan Strategik 2010;
2. Rang Undang-undang Perlindungan Data Peribadi 2009;
3. Rang Undang-undang Perbekalan Tambahan (2009) 2010;
4. Rang Undang-undang Perbekalan Tambahan (2010) 2010;
5. Rang Undang-undang Agensi Pelaporan Kredit 2009;
6. Rang Undang-undang Perlindungan Pemberi Maklumat 2010;

7. Rang Undang-undang Institusi-institusi Pelajaran (Tatatertib)(Pindaan) 2010;
8. Rang Undang-undang Persaingan 2010;
9. Rang Undang-undang Suruhanjaya Persaingan 2010;
10. Rang Undang-undang Suruhanjaya Pengangkutan Awam Darat 2010;
11. Rang Undang-undang Pengangkutan Awam Darat 2010;
12. Rang Undang-undang Lembaga Pelesenan Kendaraan Perdagangan (Pindaan) 2010;
13. Rang Undang-undang Pelesenan Kendaraan Pelancongan (Pindaan) 2010;
14. Rang Undang-undang Kereta Api (Pindaan) 2010; dan
15. Rang Undang-undang Kanun Tatacara Jenayah (Pindaan) 2010.

Yang Ikhlas,

t.t.

YANG DI-PERTUA DEWAN NEGARA”

JAWAPAN-JAWAPAN LISAN BAGI PERTANYAAN-PERTANYAAN

1. Datuk Ismail Kasim [Arau] minta Perdana Menteri menyatakan sejauh manakah pencapaian NKRA sejauh ini sejak ia diperkenalkan Yang Amat Berhormat Perdana Menteri dan apakah tahap pencapaian kakitangan kerajaan dalam mendukung NKRA ini.

Menteri di Jabatan Perdana Menteri [Tan Sri Dr. Koh Tsu Koon]: Tuan Yang di-Pertua, saya memohon untuk menjawab soalan ini secara serentak dengan soalan-soalan mengenai isu yang sama yang dikemukakan oleh Yang Berhormat Kepong pada hari ini, Yang Berhormat Lenggong pada 10 Jun dan Yang Berhormat Kubang Kerian pada 6 Julai.

Tuan Yang di-Pertua, Program Transformasi Kerajaan atau Government Transformation Program (GTP) dengan menggunakan kaedah makmal ataupun *labs* dan *Key Performance Indicators* (KPI) memang merupakan kaedah pengurusan prestasi yang baru dan berkesan untuk pembaharuan jentera kerajaan dan merealisasikan komitmen kerajaan supaya rakyat didahulukan, pencapaian diutamakan mengikut Gagasan 1Malaysia yang diilhamkan oleh Yang Amat Berhormat Perdana Menteri. Tujuannya adalah untuk mencapai Wawasan 2020 supaya Malaysia menjadi sebuah negara maju yang bersatu padu, aman dan berpendapatan tinggi.

Enam bidang Keberhasilan Utama Nasional ataupun *National Key Result Area* (NKRA) telah dikenal pasti dan giat dilaksanakan sejak bulan Julai tahun 2009 berdasarkan hasrat dan pandangan rakyat mengikut kajian dan maklum

balas. Di bawah NKRA untuk mengurangkan jenayah, lebih daripada 14,000 anggota polis telah ditugaskan semula atau *redeployed* bersama dengan lebih daripada 3,000 orang anggota RELA dan JPAN ataupun Jabatan Pertahanan Awam untuk meningkatkan rondaan dan tindakan mencegah jenayah dalam 50 kawasan tumpuan atau *hot spots*. Skim Rondaan Sukarela (SRS) di bawah rukun tetangga juga sedang dimobilisasikan. Hasilnya, berbanding suku tahun empat atau Q1 tahun ini atau Q1 2009, kadar jenayah indeks telah menurun 15% pada keseluruhannya dan kadar jenayah jalanan yang merangkumi ragut dan rompakan tanpa senjata menurun hampir 40%.

Sebagai perbandingan apabila inisiatif yang sama dilaksanakan di bawah pimpinan Tony Blair, Kerajaan British hanya dapat mula mengurangkan jenayah selepas tempoh dua tahun. Untuk NKRA membanteras rasuah, Suruhanjaya Pencegah Rasuah Malaysia (SPRM) telah diperkasakan dengan pelantikan beberapa jawatankuasa termasuk Jawatankuasa Parlimen dan pelantikan kakitangan tambahan. Akta Perlindungan Pemberi Maklumat telah baru-baru ini diluluskan oleh Parlimen. Laman web *Myprocurement* telah mulai mempamerkan penawaran kontrak-kontrak kerajaan secara telus dan terbuka. *Integrity pact* oleh *Transparency International* juga sudah mula dilaksanakan bagi kontrak-kontrak kerajaan. Langkah-langkah ini dijangka akan mencegah rasuah, manakala tindakan tegas akan terus diambil terhadap mereka yang bersalah.

Untuk NKRA meningkatkan pendidikan, di antara fokus utama ialah pendidikan prasekolah di mana sebanyak 929 buah kelas baru telah bermula pada bulan Januari yang akan memberi manfaat kepada 18,000 kanak-kanak. Selain daripada itu, kesemuanya 7,016 buah sekolah rendah berbagai-bagai aliran telah dinilai mengikut ranking supaya mengetahui kekuatan dan kelemahan secara perbandingan. *School Improvement Toolkit* telah diperkenalkan kepada semua sekolah untuk memberi tumpuan dan panduan kepada empat fokus utama iaitu pengetua, guru, pelajar dan infrastruktur untuk mempertingkatkan prestasi pelajar.

Untuk NKRA pengangkutan awam bandar khususnya bagi Kuala Lumpur dan Lembah Kelang, sasaran adalah untuk meningkatkan penggunaan pengangkutan awam. Penggunaan empat lebuh raya yang kurang sesak sebagai BET atau *Bus Expressway Transit* telah mengurangkan tempoh perjalanan dan meningkatkan bilangan pengguna bas sebanyak 13% bagi Q1 tahun ini berbanding dengan Q1 tahun lepas. Lapan kereta api LRT empat gerabak telah mula beroperasi sejak bulan Januari dan menghasilkan penambahan hampir sejuta penumpang. NKRA infrastruktur asas luar bandar telah menetapkan sasaran yang tinggi bagi tempoh tiga tahun iaitu tahun 2010 hingga 2012 iaitu pembinaan lebih 2,400 kilometer jalan raya, pembinaan dan pembaikpulihan 17,000 rumah, penyampaian bekalan elektrik kepada 50,000 isi rumah dan bekalan air kepada 120,000 isi rumah di kawasan luar bandar. Di bawah NKRA menaik taraf kehidupan isi rumah berpendapatan rendah, kadar kemiskinan tegar telah dikurangkan 30% iaitu sebanyak 12,000 isi rumah dalam suku tahun pertama ini.

Di samping itu ketua isi rumah miskin tegar digalakkan untuk menyertai salah satu daripada empat projek atau satu azam atau inisiatif akhri zaman miskin iaitu azam tani, azam niaga, azam kerja dan azam khidmat. Adalah jelas bahawa GTP telah mulai menyampaikan kesan-kesan positifnya mengikut enam NKRA secara spesifik. Pada amnya pelaksanaan GTP bersama-sama dengan pakej-pakej perangsang ekonomi dan beberapa langkah yang lain setakat ini telah berjaya meningkatkan keberkesanan dan kecekapan jentera pentadbiran, memulihkan persepsi dan keyakinan awam serta merangsang pertumbuhan ekonomi negara.

Hakikatnya kadar pertumbuhan ekonomi Malaysia telah mencatat 10.1% bagi suku tahun pertama tahun ini yang merupakan yang paling tinggi sekali dalam tempoh 10 tahun kebelakangan ini. Kombinasi langkah-langkah kerajaan ini bersama-sama dengan inisiatif dan usaha sektor swasta telah juga memberi sumbangan terhadap lonjakan kedudukan Malaysia dalam daya saing sedunia mengikut *World Competitiveness Year Book* dari tangga 18 pada tahun lepas ke tangga 10 pada tahun ini.

■1020

Malaysia merupakan *the top ten countries*. Peningkatan Malaysia dalam dua daripada empat kategori daya saing adalah mendadak iaitu kecekapan kerajaan (*government efficiency*) dari tangga 19 ke tangga 9 dan kecekapan perniagaan (*business efficiency*) dari tangga 13 ke tangga 4.

Tuan Yang di-Pertua, pada amnya sambutan dan prestasi taraf penjawat awam adalah menggalakkan. Bagi mereka yang terlibat secara langsung dalam makna-makna NKRA dan lain-lain, perubahan dan penambahbaikan dari segi kemahiran dan pengurusan, bahkan dari segi sikap, komitmen, motivasi dan perasaan yakin diri adalah amat ternyata. Pelaksanaan NKRA dan MKRA telah juga melibatkan ramai penjawat awam di kementerian dan agensi yang berkenaan. Semangat dan pendekatan baru ini juga mulai disemarakkan ke peringkat akar umbi ataupun *rank and file* seperti anggota polis dan guru.

Walau bagaimanapun, sebarang transformasi memang memerlukan masa, khasnya yang melibatkan perubahan minda dan cara mengurus. Usaha gigih memang akan terus dipertingkatkan. Kerajaan memerlukan dan mengalu-alukan maklum balas, kritikan membina, kerjasama, sokongan dan sumbangan dari semua pihak.

Tuan Yang di-Pertua: Arau, sila.

Datuk Haji Mohamad bin Haji Aziz [Sri Gading]: Tuan Yang di-Pertua, kalau beginilah jawapan meleret-leret, bila peluang Ahli-ahli Parlimen yang lain hendak menyoal, Tuan Yang di-Pertua. Masa sangat terhad. Jawab bertulis sahajalah.

Beberapa Ahli: [Menyampuk]

Tuan Lim Lip Eng [Segambut]: Ini KPI.

Datuk Ismail Kasim [Arau]: Terima kasih Tuan Yang di-Pertua dan terima kasih kepada Yang Berhormat Menteri. Sebelum itu saya mengalu-alukan kedatangan rakan-rakan saya daripada Kampung Teluk, Parlimen Arau yang berada di belakang. [Tepuk]

Saya mengucapkan terima kasih kepada Yang Berhormat Tan Sri atas jawapan diberikan walaupun menimbulkan keluh kesah daripada rakan-rakan tetapi pada saya, jawapan Yang Berhormat Tan Sri menetapi kehendak soalan saya. [Disampuk] Bukan tolong kawan. Tiada pertolongan di sini, Yang Berhormat Klang ya. Cuma di sini, Yang Berhormat Tan Sri, saya ingin menarik perhatian tentang penghayatan kakitangan kerajaan kerana *delivery system* merupakan tenaga utama dalam menggerakkan untuk kejayaan dalam keberhasilan NKRA ini dalam enam bidang utama.

Saya ingin bertanya pihak kerajaan, dalam usaha kita memastikan bahawa *delivery system*, dengan izin, dapat menangani melaksanakan tugas dan tanggungjawab dengan lebih berkesan ini. Apakah usaha yang dibuat oleh kerajaan bagi memastikan bahawa penghayatan kakitangan kerajaan yang

merupakan tenaga pendukung utama ini dapat menolong menjayakan NKRA yang sedia ada dan mungkin kita akan ada pertambahan dalam memastikan kita akan mencapai matlamat menjadi negara maju seperti yang disasarkan oleh kerajaan.

Persoalannya di sini, adakah pihak kerajaan berjaya mengatasi, terutamanya permasalahan di luar bandar, masalah air, masalah PPRT yang kita lihat masih lagi memerlukan fokus daripada pihak kerajaan. Terima kasih Tuan Yang di-Pertua.

Tan Sri Dr. Koh Tsu Koon: Terima kasih Tuan Yang di-Pertua. Memang Yang Berhormat Arau mempunyai pandangan yang bernas dan betul iaitu para penjawat awam atau kakitangan kerajaan memang merupakan orang yang amat penting dalam melaksanakan dan menjayakan program transformasi ini. Maka, adalah melalui satu proses kaedah baru iaitu makmal dan juga KPI di mana kita memantau dengan teliti prestasi setiap jabatan dan di setiap peringkat. Maka ini akan mendorong para penjawat awam supaya terus memberi prestasi yang sebaik mungkin.

Di samping itu agensi-agensi yang sedia wujud seperti MAMPU dan INTAN memang terus menjalankan tugas mereka untuk mempertingkatkan lagi kemahiran pengurusan di semua peringkat. Mengenai masalah-masalah di luar bandar, memang itulah menjadi salah satu daripada tumpuan NKRA di mana bekalan air, bekalan elektrik mahupun pembinaan rumah dan jalan raya dijadikan tumpuan. Kerajaan memang bersedia untuk membelanjakan peruntukan yang besar supaya meningkatkan kemudahan ini demi orang di kawasan luar bandar dengan memberi penegasan atau *emphasis* terhadap *value for money*. Terima kasih.

Beberapa Ahli: [Bangun]

Tuan Yang di-Pertua: Yang Berhormat Ipoh Timur, saya kena bagi kepada Yang Berhormat Kepong pasal Yang Berhormat Kepong ada soalan *on the 7th June*. So, untuk keadilan, bagilah sama Yang Berhormat Kepong kecuali Yang Berhormat Kepong kasi sama boss. Sila, Yang Berhormat Kepong.

Dr. Tan Seng Giaw [Kepong]: Tuan Yang di-Pertua, soalan tambahan. Saya nampak NKRA, KPI dan makmal itu dilaksanakan sudah 11 bulan dan ada disebutkan dengan panjang lebar masalah jenayah, masalah pengangkutan, masalah pendidikan, masalah pertanian dan sebagainya. Satu yang disebutkan itu iaitu suku tahun yang pertama tahun ini pertumbuhan ekonomi 10.1%. Akan tetapi, adakah Yang Berhormat sedar bahawa 10.1% itu, kalau kita meninjau masalah peniaga-peniaga, mereka memang mengalami kesusahan, tidak membayangkan 10.1%. Dari segi pendidikan, misalnya, disebutkan 716 sekolah tetapi kita ada 7,643 sekolah rendah dan 2,165 sekolah menengah tetapi 750 sekolah ini macam mana? Tidak membayangkan keadaan yang sebenarnya, hampir 10,000 sekolah. Misalnya di Padang Besar itu tidak diambil kira.

Mengenai masalah jenayah, walaupun jenayah itu... [Disampuk] Ya, ya. Walaupun kita nampak dengan tegasnya jenayah jalanan itu sudah kurang dan sebagainya tetapi masalah rogol di sekolah dan sebagainya, ini memang mesti diambil kira. Apakah pendapat Yang Berhormat mengenai jenayah di sekolah dengan teksi dan sebagainya?

Tan Sri Dr. Koh Tsu Koon: Tuan Yang di-Pertua, pertumbuhan ekonomi yang mencatatkan kadar 10.1% ini memang mengikut penilaian dan ukuran yang secara profesional. Apabila kita mengumumkan pertumbuhan yang tinggi dan memuaskan, nampaknya pihak pembangkang enggan menerima. Akan tetapi di sebaliknya pada penghujung tahun 2008 dan awal tahun 2009, memang kita

mengalami kesulitan pada waktu itu, angka yang diumumkan oleh kerajaan diterima dan dijadikan bahan untuk menyerang kerajaan. Oleh itu saya ingat kita hendaklah konsisten dan profesional. Janganlah memilih untuk mengutamakan angka tertentu dan menyetepikan angka yang lain.

Yang keduanya, bilangan sekolah yang sepatutnya. Mungkin tersilap sebutan saya ialah 7,616 buah sekolah rendah semua aliran. Ini memang menjadi tumpuan kerana ianya merupakan pendidikan asas untuk generasi muda kita.

Yang ketiganya mengenai jenayah, adalah jelas bahawa dengan penugasan semula atau *redployment* ahli-ahli anggota polis, maka kadar jenayah telah menurun dan ini sebenarnya telah dirasai oleh rakyat jelata melalui maklum balas yang diterima. Akan tetapi ini tidak bermakna kita akan mencapai satu keadaan sifar jenayah di mana tidak berlakunya langsung jenayah. Di negara yang amat maju pun terdapat jenayah.

■1030

Apa yang penting ialah kita ada sistem kawalan yang lebih baik. Oleh itu saya ingin mengucapkan tahniahlah kepada rakan saya daripada Sempang yang bertungkus-lumus bersama dengan semua agensi untuk meningkatkan sistem penguatkuasaan dan juga sistem pengurusan untuk mencegah jenayah.

Tuan Salahuddin Haji Ayub [Kubang Kerian]: Terima kasih Tuan Yang di-Pertua. Soalan saya dalam senarai, janganlah kecil hati. Tuan Yang di-Pertua, soalan tambahan saya dan terima kasih kepada jawapan Menteri yang begitu panjang lebar ibarat seorang profesor yang membentangkan satu kertas dalam kuliah undang-undang. Namun begitu, di luar sana saya ingin berkongsi dengan Yang Berhormat Menteri, dalam NKRA yang dibentangkan yang ingin dicapai ada dua sektor yang masih lagi ketinggalan dan menjadi rintihan rakyat.

Pertama adalah dalam sektor pengangkutan awam. Ini tidak selesai lagi. Contoh pada hari ini ialah malam tadi berlaku kemalangan komuter dalam laluan Rawang-Kuala Lumpur. Sampai pagi ini tidak dapat diselesaikan dan *peak hours* melihatkan ribuan warga yang hendak bekerja mendapat masalah terhadap isu ini. Pengangkutan awam masih lagi menjadi suatu isu besar yang saya melihat komuter yang tidak cukup koci, isu pengangkutan awam di bandar-bandar besar masih lagi menjadi suatu yang menjadi masalah dalam negara kita.

Kedua tentang isu pendidikan. Adakah Yang Berhormat sedar hari ini PIBG, PIBG di sekolah-sekolah hari ini yang sepatutnya membincangkan isu bagaimana mahu menaik tarafkan guru, murid-murid dan mutu pendidikan, hari ini terpaksa bincang tentang bil elektrik dan air sekolah? Ini satu perkara yang tidak sepatutnya berlaku kalau kita bercakap tentang NKRA dan KPI kita. Jadi adakah kedua-dua isu yang saya bawa pada pagi ini di bawah pengetahuan Yang Berhormat Menteri?

Saya mengharapkan supaya perkara ini mendapat suatu perhatian daripada pihak kerajaan dan bukan hanyalah jawapan-jawapan yang diberikan tadi panjang lebar yang semacam teori-teori yang kita bentang tetapi di luar sana realitinya masih lagi rakyat mengharapkan yang terbaik. Terima kasih.

Tan Sri Dr. Koh Tsu Koon: Tuan Yang di-Pertua, saya mengucapkan terima kasih kepada Yang Berhormat dari Kubang Kerian. Memang pendidikan dan pengangkutan awam merupakan dua bidang yang amat penting. Oleh itu, kedua-dua ini telah dijadikan sebagai NKRA untuk diberi tumpuan oleh kerajaan pada amnya dan khasnya oleh Menteri peneraju ataupun *Lead Minister* dari kementerian yang berkenaan. Mengenai pengangkutan awam, sememangnya

untuk menambahkan koc dan juga untuk menambah baik persambungan atau *connectivity* antara LRT dan juga monorel misalnya, memerlukan masa untuk menempah koc dan juga untuk membina sambungan bangunan atau pembangunan pembinaan sambungan supaya sistem ini dapat berfungsi secara adanya *connectivity* yang baik.

Keduanya mengenai pendidikan. Sememangnya tumpuan yang diberi adalah untuk meningkatkan taraf pendidikan. Akan tetapi di sebaliknya memang ada masalah lagi dari segi pentadbiran yang perlu ditangani dan diuruskan dan diselesaikan. Maka kita tidak menafikan bahawa masih terdapatnya cabaran dan masalah yang harus kita berusaha bersama untuk mengatasi. Di sini sememangnya kerajaan adalah amat komited sama ada dalam pendidikan, pengangkutan awam atau prasarana untuk luar bandar. Semua bidang ini sedang ditangani dan diuruskan oleh Menteri peneraju. Terima kasih.

2. Tuan Lim Guan Eng [Bagan] minta Menteri Tenaga, Teknologi Hijau dan Air menyatakan kos loji nuklear yang bakal diwujudkan pada 2021. Di manakah lokasi loji dan impaknya kepada kawasan sekitar. Apakah langkah keselamatan dan kaedah pembersihan sisa-sisa nuklear yang bakal dipraktikkan.

Menteri Tenaga, Teknologi Hijau dan Air [Dato' Sri Peter Chin Fah Kui]: Tuan Yang di-Pertua, izinkan saya untuk menjawab pertanyaan yang dikemukakan oleh 16 lagi Ahli-ahli Yang Berhormat pada hari ini secara bersekali. Ini kerana kesemuanya adalah berkaitan nuklear. Ahli-ahli Yang Berhormat yang membawa pertanyaan adalah seperti berikut:

Ahli-ahli Yang Berhormat	Tarikh
Bagan	7 Jun 2010
Kota Tinggi	7 Jun 2010
Sabak Bernam	8 Jun 2010
Libaran	9 Jun 2010
Keningau	15 Jun 2010
Klang	17 & 24 Jun 2010
Tebrau	23 Jun 2010
Jasin	24 Jun 2010
Simpang Renggam	29 Jun 2010
Ledang	29 Jun 2010
Hulu Langat	29 Jun 2010
Petaling Jaya Selatan	29 Jun 2010
Alor Gajah	1 Julai 2010
Selayang	6 Julai 2010
Kuala Krai	8 Julai 2010
Gombak	12 Julai 2010

Mohon izin Tuan Yang di-Pertua.

Tuan Yang di-Pertua: Sila.

Dato' Sri Peter Chin Fah Kui: Tuan Yang di-Pertua, memandangkan kementerian saya telah mendapatkan soalan-soalan yang saya bacakan tadi berkaitan dengan tenaga nuklear, maka jawapan saya pada pagi ini agak panjang sedikit dan saya memintalah keizinan daripada Ahli-ahli Yang Berhormat boleh bersabar sedikit untuk mendengar jawapan-jawapan saya yang akan saya utarakan nanti.

Tuan Lim Kit Siang [Ipoh Timur]: Tuan Yang di-Pertua, *point of order*. Kalau panjang, baik satu *ministry statement* kerana banyak soalan perlu dijawab.

Dato' Sri Peter Chin Fah Kui: Tuan Yang di-Pertua, seperti yang saya sebut, ada 17 soalan telah diketengahkan dalam lapan aspek saya akan menjawab pada pagi ini. Saya cubalah singkatkannya. Aspek pertama ialah pengenalan kepada nuklear. Saya tertarik dengan soalan Ahli Yang Berhormat dari kawasan Keningau yang meminta saya menyatakan apakah itu nuklear khususnya kepada rakyat yang tinggal di luar bandar. Saya percaya ramai di kalangan kita yang tidak menyedari bahawa kita banyak menggunakan aplikasi nuklear dalam kehidupan seharian kita.

Sebagai contoh, setiap kali Ahli-ahli Yang Berhormat memasuki bangunan Parlimen ini, Ahli-ahli Yang Berhormat telah mendapat faedah daripada penggunaan teknologi nuklear apabila Ahli-ahli Yang Berhormat melalui mesin sinar X (*x-ray*), dengan izin yang terdapat di pintu masuk bangunan Parlimen. Selain itu, teknologi nuklear juga telah lama digunakan bagi bidang lain seperti perubatan dan pertanian.

■ 1040

Untuk makluman Ahli-ahli Yang Berhormat, tenaga nuklear merupakan tenaga yang dihasilkan oleh nukleus sesuatu atom apabila berlakunya tindak balas nuklear. Dalam loji jana kuasa nuklear, tindak balas yang berlaku ialah *nuclear fusion* dengan izin yang terjadi apabila nuklear sesuatu atom berpecah kepada bentuk yang lebih kecil iaitu dengan membebaskan tenaga *neutron* dan *proton*.

Aspek kedua yang saya hendak sentuh dalam jawapan ialah keperluan untuk menjamin, *energy security* dengan izin di Semenanjung. Seperti yang Ahli-ahli Yang Berhormat sedia maklum, Semenanjung Malaysia tidak lagi dapat bergantung kepada gas dan arang batu untuk memenuhi keperluan bekalan elektrik dalam tempoh pasca 2020. Ini disebabkan kekangan-kekangan yang dihadapi dalam pembekalan kedua-dua bahan api ini serta harga pasaran yang tidak menentu. Kebergantungan yang tinggi kepada kedua-dua bahan api ini akan meningkatkan kos penjanaan elektrik seterusnya menyebabkan para pengguna perlu membayar harga elektrik pada kadar yang lebih tinggi.

Aspek ketiga iaitu mengenai dasar kerajaan mengenai penggunaan nuklear bagi penjanaan elektrik. Tuan Yang di-Pertua, kerajaan pada masa ini sedang dalam merangka satu opsyen bagi negara kita untuk menggunakan nuklear sebagai satu cara untuk menjana elektrik pasca 2020 nanti. Oleh itu kerajaan pada masa ini sedang menimbangkan penggunaan tenaga nuklear sebagai salah satu opsyennya. Walaupun saya pernah mengumumkan bahawa loji jana kuasa nuklear pertama di negara ini dijangka beroperasi pada tahun 2021.

Tuan Lim Lip Eng [Segambut]: Di Putrajaya. *[Ketawa]*

Dato' Sri Peter Chin Fah Kui: Kementerian saya bersama-sama dengan Kementerian Sains, Teknologi dan Inovasi serta agensi-agensi lain akan melaksanakan kajian-kajian yang diperlukan sebelum membuat keputusan muktamad mengenainya.

Aspek keempat, peningkatan kesedaran masyarakat terhadap nuklear. Memang tidak dinafikan semua negara yang membangunkan program tenaga nuklear untuk penjanaaan elektrik menghadapi tentangan daripada masyarakat pada peringkat awalnya disebabkan kekurangan pendedahan dan pengetahuan mengenai teknologi tersebut. Tentangan daripada masyarakat secara umumnya adalah disebabkan isu pengurusan sisa radio aktif yang dihasilkan oleh loji-loji jana kuasa nuklear serta isu keselamatan loji-loji jana kuasa nuklear ekoran daripada insiden yang berlaku di *Three Mile Island di USA* umpamanya pada tahun 1979 dan di Chernobyl pada tahun 1986.

Menyedari hakikat tersebut, kementerian saya bersama-sama dengan agensi-agensi yang lain yang berkaitan sedang merancang untuk melaksanakan program pendidikan dan kesedaran awam secara komprehensif dan telus untuk meningkatkan kesefahaman dan penerimaan masyarakat terhadap teknologi nuklear.

Saya yakin apabila rakyat diberi penjelasan yang sebenar mengenai isu-isu ini rakyat akan lebih faham dan dapat menerima bahawa penggunaan teknologi nuklear bagi penjanaaan elektrik adalah selamat dan tidak membawa kesan negatif kepada mereka dan juga kepada alam sekitar.

Aspek kelima ialah isu keselamatan loji jana kuasa nuklear. Berhubung isu keselamatan loji jana kuasa nuklear, ia merupakan isu yang sering menimbulkan persepsi negatif masyarakat terhadap tenaga nuklear yang mengaitkan ia dengan insiden yang saya sebut iaitu di *Three Mile Island* dan Chernobyl. Untuk makluman Ahli-ahli Yang Berhormat, salah satu punca kejadian di Chernobyl ialah penggunaan teknologi yang tidak selamat kerana loji tersebut dibina pada asalnya untuk tujuan ketenteraan bukannya untuk tujuan penjanaaan elektrik. Masyarakat sebenarnya tidak perlu bimbang akan kemungkinan insiden seperti itu yang akan berulang kerana teknologi nuklear yang diguna pakai pada masa ini tidak memungkinkan insiden seperti itu.

Tuan Yang di-Pertua, aspek yang saya hendak teruskan ialah lokasi yang ditanya. Lokasi ini Tuan Yang di-Pertua kita akan ambil kira loji-loji yang di mana permintaan elektrik adalah tinggi. Walau bagaimanapun, kerajaan masih belum menentukan lokasi penempatan loji jana kuasa nuklear itu. Bagi menentukannya, kerajaan akan mengguna-pakai piawaian antarabangsa dengan mengambil kira ciri-ciri seperti kepadatan penduduk, alam sekitar, hidrologi, seismic, tectonic, geografi dan sebagainya. Lesen bagi tapak loji hanya akan dikeluarkan setelah kesemua kajian termasuk penilaian kesan alam sekitar dan radiasi selesai dilaksanakan bagi memastikan supaya loji jana kuasa nuklear yang dibina mematuhi peraturan-peraturan keselamatan.

Ketujuh, kos yang ditanya untuk membangunkan sebuah loji jana kuasa nuklear. Dalam membangunkan sesebuah loji jana kuasa nuklear memang tidak dinafikan kos permulaan yang amat besar diperlukan dan jumlahnya berbeza-beza mengikut saiz, spesifikasi teknikal dan ciri-ciri keselamatan yang dikehendaki. Oleh itu, kos sebenar bagi membangunkan loji jana kuasa nuklear akan hanya diketahui setelah kerajaan menentukan pembekalan teknologi bagi loji tersebut.

■ 1050

Walau bagaimanapun, berdasarkan kos bagi loji-loji jana kuasa nuklear terbaru yang sedang dibina di Emiriah Arab Bersatu (UAE) dan Turki, anggaran kos bagi loji jana kuasa nuklear yang berkapasiti 1000 megawatt ialah sekitar USD2.5 bilion sehingga USD4 bilion. Sungguhpun kos permulaan bagi membangunkan loji jana kuasa nuklear adalah besar, tetapi kos untuk operasinya adalah rendah berbanding dengan kos operasi bagi loji jana kuasa minyak, gas dan arang batu. Kos bahan api yang rendah di loji-loji jana kuasa nuklear adalah sekitar 26% daripada kos operasi berbanding dengan 78% bagi arang batu, dan 94% bagi gas asli.

Aspek kelapan iaitu yang terakhir ialah pembiayaan projek nuklear yang ditanyakan. Mengenai kaedah pembiayaan pembangunan loji jana kuasa nuklear, kerajaan akan mengkaji kaedah-kaedah yang diguna pakai oleh negara-negara lain sebelum membuat sebarang keputusan mengenainya.

Memandangkan pembangunan loji jana kuasa nuklear memerlukan pembiayaan kewangan yang besar, penglibatan kerajaan dalam aspek seumpama ini amat kritikal. Bagi memudahkan urusan mendapatkan pembiayaan, kerajaan akan meneliti secara menyeluruh dan terperinci segala aspek pembiayaan kewangan yang difikirkan perlu melalui perbincangan dengan pihak perunding bertauliah, dan juga pembekal yang akan dilantik nanti. Memandangkan saya tidak mempunyai masa yang mencukupi... *[Dewan riuh]* Untuk menjawab semua 17 soalan itu dengan terperinci, saya ingin... *[Disampuk]* Dengarlah! Saya ingin menjemput Ahli-ahli Yang Berhormat termasuk di sana... *[Menunjuk ke blok pembangkang]* ... Untuk hadir ke satu Majlis Makan Malam yang akan diadakan pada 29 Jun 2010. Di dalam majlis itu kita akan menjemput pakar-pakar daripada luar negara untuk menjawab segala pertanyaan daripada Ahli-ahli Yang Berhormat...

Tuan Nga Kor Ming [Taiping]: Ini sebahagian daripada jawapankah?

Dato' Sri Peter Chin Fah Kui: Dengan itu saya mengucapkan terima kasih kepada Tuan Yang di-Pertua kerana sabar untuk mendengar saya menjawab soalan ini.

Tuan Lim Guan Eng [Bagan]: Terima kasih Tuan Yang di-Pertua, dan juga kepada Yang Berhormat Menteri yang telah memberikan penjelasan yang panjang lebar, tapi masih kurang meyakinkan orang ramai tentang keselamatan, kerana rekod keselamatan untuk Malaysia saya rasa kurang baik. Kalau bina stadium pun boleh runtuh, kalau bina masjid pun boleh runtuh, kalau bina terminal bas pun boleh runtuh, macam mana kita boleh yakin bahawa dengan membina satu loji nuklear, kita boleh selamat?... *[Tepuk]* Di sini saya hendak bertanya kepada Tuan Yang di-Pertua, memandangkan bahawa kalau disebut dari segi *energy security*, bila kita ada *reserve margine* yang paling tinggi di dunia hampir 50%, apakah rasional dan logik untuk membina satu loji nuklear yang begitu mahal, di mana kita belum terjamin tentang keselamatannya? Dan mengapakah pada masa yang sama, tidak mengkaji sumber tenaga yang lain, yang hijau dan selamat seperti dengan izin, *renewable energy*, solar yang selalu disebut-sebut oleh Yang Berhormat Menteri sendiri. Mengapa ini tidak diambil kira?

Akhirnya Tuan Yang di-Pertua, bolehkah kita dapat satu jaminan memandangkan isu ini amat penting dan tidak ada mana-mana rakyat Malaysia mahukan loji nuklear ini diletakkan di kawasan mereka, kecuali mungkin di Miri...

Seorang Ahli: Letak di Putrajaya.

Tuan Lim Guan Eng [Bagan]: Tidak ada sesiapa yang mahu letakkan dalam kawasan penempatan mereka, bolehkah sebelum keputusan muktamad dibuat, bolehkah ia dibincangkan terlebih dahulu di Parlimen Malaysia supaya Parlimen Malaysia mewakili semua, boleh membahaskan dan membincangkan tentang keselamatan dan juga baik buruk loji nuklear ini? Sekian terima kasih. [Tepuk]

Dato' Sri Peter Chin Fah Kui: Terima kasih, Yang Berhormat. Kalaulah kita mempunyai masa selama dua jam pagi ini, saya boleh bincang dan jawab segala yang ditanya tetapi kita dalam masa yang singkat, mendedahkan apa yang saya baca tadi kepada Yang Berhormat. Tunggulah pada 29 hari bulan nanti, hadirlah ke majlis itu dan kita akan ada masa yang mencukupi untuk membincangkan segala-galanya. Akan tetapi untuk menjawab pertanyaan Yang Berhormat mengenai tenaga yang berlebihan ini. Tenaga yang berlebihan ini ialah pada masa ini, pada lima tahun yang akan datang iaitu pada tahun 2016 dan 2017, tenaga berlebihan itu akan berkurangan dan akan terus sampai ke satu tahap yang berbahaya iaitu *reserve margine* yang kita harus ada ialah sebanyak 25%. Kita kena ada satu *reserve margine* 25% *at least* supaya mencukupi untuk kita bekalkan *energy peak* yang ada di dalam negara kita ini. Dan sebab itulah saya katakan, loji ini tidak dibuat sekarang tetapi loji ini akan dibuat pada pasca 2020 nanti, sebab masa itu kita tidak ada *energy* yang berlebihan lagi.

Sumber yang diperolehi itu sebenarnya Yang Berhormat saya ada jawapan yang tebal tadi tetapi saya tidak baca tadi. [Ketawa] Tenaga yang boleh diperbaharui itu memang kita ada tetapi, saya hendak ingatkan dengan izin Tuan Yang di-Pertua, *wind and sun are free but to get the power from these sources - wind and power, we have to pay high cost*. Inilah yang kita hadapi pada hari ini sebab kalau kita hendak janakan *wind power* itu, kita kena juga melabur yang tinggi dan sama juga dengan solar. Sebab itulah Tuan Yang di-Pertua, pendirian saya ialah kita kena ada *energy mixed*, kita kena ada hidro, kita kena ada *renewable energy*, kita juga kena ada nuklear dan kita juga kena ada arang batu dan juga gas asli, walaupun ia kurang tetapi kita mempunyai satu *energy mixed* yang baik untuk negara. Sekian.

Datuk Dr. Marcus Makin Mojigoh [Putatan]: Terima kasih Tuan Yang di-Pertua..

■ 1100

Dato' Sri Peter Chin Fah Kui: Tuan Yang di-Pertua, sama ada kita kena... [Disampuk] Sama ada rakyat di lokasi-lokasi yang kita akan bina loji ini akan menerimanya, kita tengoklah. Kita akan mengadakan program-program pendedahan maklumat dan sebagainya supaya kita boleh meyakinkan. Di Seoul, Korea, saya hendak cakap sikit, ya dengan izin. Penduduk-penduduk dekat lokasi jana kuasa nuklear sekarang layan mereka. Layan syarikat-syarikat yang di Korea ini yang akan membina loji. Sebab apa? Sebab mereka yakin, dia tidak takut dan rakyat di kawasan di sana memberikan layanan, kemudahan yang berbeza. Mereka layan...

Datuk Dr. Marcus Makin Mojigoh [Putatan]: [Bangun]

Dr. Dzulkefly Ahmad [Kuala Selangor]: Yang Berhormat Bagan tanya dibuat di Parlimen.

Dato' Sri Peter Chin Fah Kui: Jangan loji itu dipindah kepada lain kawasan di Seoul, di Korea. Itu berlaku. Sekian.

Datuk Bung Moktar bin Radin [Kinabatangan]: [Bangun]

Dr. Dzulkefly Ahmad [Kuala Selangor]: Yang Berhormat Bagan minta dibuat di Parlimen.

Datuk Bung Moktar bin Radin [Kinabatangan]: Kasi siapa, Tuan Yang di-Pertua?

Tuan Yang di-Pertua: Yang Berhormat Putatan, Yang Berhormat Putatan.

Datuk Ir. Haji Idris bin Haji Haron [Tangga Batu]: Tangga Batu.

Tuan Yang di-Pertua: Tadi Yang Berhormat, saya memanggil Yang Berhormat Putatan untuk soalan tambahan yang kedua tetapi ada seorang tadi yang berhujah, terus Yang Berhormat Menteri *respond*. [Ketawa] [Dewan riuh]

Sekarang ini saya minta kerjasama daripada semua. Apabila kita hendak menjimatkan masa dalam perbahasan, pertamanya jangan ada gangguan yang bukan-bukan. Keduanya, menteri yang menjawab, tolonglah pendekkan. *Straight to the point*. [Dewan riuh]

Datuk Bung Moktar bin Radin [Kinabatangan]: Okey, terima kasih Tuan Yang di-Pertua.

Datuk Dr. Marcus Makin Mojigoh [Putatan]: Terima kasih.

Datuk Bung Moktar bin Radin [Kinabatangan]: Tuan Yang di-Pertua, terima kasih.

Tuan Yang di-Pertua: Ahli-ahli Yang Berhormat, saya belum siap lagi, Yang Berhormat.

Datuk Dr. Marcus Makin Mojigoh [Putatan]: Ya.

Datuk Bung Moktar bin Radin [Kinabatangan]: Ya, terima kasih.

Tuan Yang di-Pertua: Dalam *boxing*, dalam *ring*, kalau *jab, jab, jab* ini tidak ada. Yang Berhormat Putatan, sila. Pendekkan.

Datuk Dr. Marcus Makin Mojigoh [Putatan]: Ya, terima kasih, terima kasih.

Datuk Bung Moktar bin Radin [Kinabatangan]: Oh, bukan Kinabatangan?

Tuan Yang di-Pertua: Yang Berhormat Kinabatangan, jangan dulu, Yang Berhormat Kinabatangan. Belum sampai masanya. Sila, Yang Berhormat Putatan.

Datuk Dr. Marcus Makin Mojigoh [Putatan]: Soalan tambahan. Tuan Yang di-Pertua, soalan ini memanglah ditimbulkan selalunya daripada pembangkang. Apa sahaja yang dihasratkan, dicadangkan...

Beberapa Ahli Pembangkang: Soalan, soalan. [Dewan riuh]

Datuk Dr. Marcus Makin Mojigoh [Putatan]: Sabarlah dulu. Satu kerajaan yang baik, adalah yang baik kepada masyarakat. Pembangkang memang membangkang. Kalau kita jalan di hutan misalnya. Kalau tiada lampu suluh, kita pakai lilin dan sebagainya dia kompelin kerana gelap. Apabila kita kasi lampu suluh...

Tuan M. Kula Segaran [Ipoh Barat]: Jadi menteri.

Datuk Dr. Marcus Makin Mojigoh [Putatan]: Dia kompelin lagi. Takut hutan terbakar. Ini. Gelagat pembangkang, Tuan Yang di-Pertua.

Jadi soalan tambahan, Tuan Yang di-Pertua. *[Disampuk]* Soalan tambahan, Tuan Yang di-Pertua. Soalan tambahan, Tuan Yang di-Pertua, apabila kita melihat negara-negara lain membina loji nuklear ini, memang ada sekatan, kekangan dan bantahan daripada komuniti antarabangsa.

Baru-baru ini kita melihat pemeriksaan nuklear di Myanmar, di Iran, di Korea Utara. Apabila kita bercadang, berniat untuk membangunkan negara kita. Pada masa 2021 itu, negara Malaysia sudah menjadi negara maju.

Dato' Mahfuz bin Haji Omar [Pokok Sena]: *[Menyampuk]*

Datuk Dr. Marcus Makin Mojigoh [Putatan]: Tahniah. Ini rancangan jangka panjang. Duduklah diam-diam.

Tuan Yang di-Pertua, ini Yang Berhormat Pokok Sena.

Tuan Yang di-Pertua: Ahli-ahli Yang Berhormat. Ahli-ahli Yang Berhormat. Duduk dulu, Yang Berhormat Putatan. Duduk dulu. Duduk dulu. Baru soalan kedua belum lagi selesai. Nampaknya dalam persidangan kali ini, ramai Ahli Yang Berhormat yang benar-benar mengecewakan saya.

Seriuslah sikit! Kalaupun jawapan daripada seseorang menteri itu tidak memenuhi selera seseorang yang menganggap dirinya begitu tinggi, jangan ketawakan. Tidak ada sesiapa di antara kita, Ahli-ahli Yang Berhormat yang sempurna. Jadi kalau menegur kawan, tegur dahulu diri sendiri.

Sila, Yang Berhormat Putatan. Pendekkan, Yang Berhormat Putatan. Sudah saya sebutkan tadi, pendekkan. Kalau tidak saya panggil Yang Berhormat Kinabatangan.

Datuk Dr. Marcus Makin Mojigoh [Putatan]: Okey, Tuan Yang di-Pertua.

Tuan Yang di-Pertua: Sila.

Datuk Dr. Marcus Makin Mojigoh [Putatan]: Ya. Untuk soalan yang selanjutnya. Bagaimanakah reaksi komuniti antarabangsa apabila kita begini? Bagaimanakah langkah-langkah kerajaan negara kita menangkis sekatan dan bantahan daripada pengkritik antarabangsa?

Kalau soalan Yang Berhormat Bagan itu dia tidak setuju, kita mencadangkan kalau tempat Yang Berhormat Bagan ditempatkan nuklear ini.

Dato' Sri Peter Chin Fah Kui: Pendek sahaja jawapan saya iaitu sambutan daripada pihak *International Atomic Energy Agency* (IAEA) ini adalah sangat baik.

Sebenarnya, agensi ini akan menolong kita menyediakan satu langkah yang baik, satu langkah yang selamat untuk mewujudkan satu nuklear program bagi jana kuasa elektrik bukan untuk *missile*.

3. Dato' Seri Tiong King Sing [Bintulu] minta Menteri Dalam Negeri menyatakan:

- (a) adakah pihak Jabatan Imigresen Malaysia mempunyai kaedah tertentu bagi menghalang warganegara asing daripada memasuki Malaysia semula setelah dihantar pulang ke negara asal mereka apabila didapati berkelakuan salah; dan
- (b) berapa jumlah warganegara asing yang telah dihantar pulang ke negara asal mereka dan berapakah jumlah yang berjaya ditangkap semula setakat ini sejak 2005.

Menteri Dalam Negeri [Dato' Seri Hishammuddin bin Tun Hussein]:

Tuan Yang di-Pertua, untuk makluman Ahli Yang Berhormat, kerajaan sentiasa memantau dan memandang serius kehadiran warganegara asing ke negara ini dengan memberi keutamaan kepada aspek keselamatan dan ancaman kepada negara. Jabatan Imigresen Malaysia mempunyai beberapa mekanisme bagi memantau kemasukan warga negara asing ke negara ini termasuk pertamanya, proses tapisan awal melalui pengeluaran visa di kedutaan dan juga pejabat perwakilan Malaysia di luar negara di mana tapisan akan dibuat untuk mengenal pasti sama ada warganegara asing berkenaan telah dimasukkan dalam senarai syak jabatan. Sekiranya nama mereka tersenarai dalam senarai syak, warganegara asing ini tidak akan dikeluarkan dengan visa untuk datang ke Malaysia.

Kedua, kawalan dan pemeriksaan di kaunter-kaunter imigresen meliputi pemeriksaan dokumen perjalanan, latar belakang dan penyemakan identiti berdasarkan pangkalan data senarai syak jabatan.

Di samping itu, pelaksanaan *autogate* bagi kemasukan warganegara Malaysia telah dapat membantu dan memberi peluang kepada pegawai imigresen untuk menumpukan perhatian kepada pemeriksaan warganegara asing di kaunter.

Untuk makluman Ahli Yang Berhormat, jumlah warganegara asing yang telah diusir ke negara asal daripada tahun 2005 hingga 2009 adalah seramai 237,790 orang. Melalui rekod Jabatan Imigresen Malaysia, tangkapan yang dilakukan bagi pelanggaran Akta Imigresen 1959 atas pelbagai kesalahan adalah seperti berikut.

Tahun	Bilangan Tangkapan
2005	28,079
2006	56,315
2007	58,882
2008	73,100
2009	47,310
Jumlah	263,686

Dato' Seri Tiong King Sing [Bintulu]: Terima kasih Tuan Yang di-Pertua dan terima kasih Yang Berhormat Menteri atas jawapan yang diberi tadi. Soalan tambahan. Sesungguhnya, pelbagai kaedah telah diusahakan oleh kerajaan dalam menangani isu ini seperti menggunakan alat pengimbas cap jari yang canggih. Namun begitu, apakah ketepatan alat pengimbas cap jari tersebut kerana kes pemalsuan identiti pendatang asing yang dihantar pulang masih serius berlaku.

Apakah langkah-langkah bersepadu kerajaan dalam menyelesaikan masalah jenayah ini yang turut menjejaskan keselamatan negara yang merupakan salah satu bidang NKRA kerajaan dan bagaimana meningkatkan keupayaan di sempadan negara jiran. Contohnya, di Sarawak yang dilihat agak longgar dari segi kawalan keselamatan terutama dalam mengawal pendatang asing kerana banyak 'jalan tikus' yang masih di luar kawalan pihak keselamatan negara. Sekian, terima kasih.

■1110

Dato' Seri Hishammuddin bin Tun Hussein: Terima kasih Yang Berhormat. Menjawab isu berhubung kait dengan jenayah, soalan tujuh hari ini mungkin tidak sempat tetapi menunjukkan bahawa penglibatan warga asing dalam jenayah adalah terkawal. Daripada statistik secara purata jumlah jenayah yang melibatkan warga asing bagi tempoh lima tahun ini adalah rendah iaitu sebanyak 1.87% sahaja.

Berhubung kait dengan bagaimana kita dapat menangani isu menggunakan alat-alat yang canggih, sememangnya sistem yang sedia ada mestilah membuat transformasi dan juga disesuaikan mengikut zaman. Jabatan Imigresen Malaysia bersama-sama dengan pihak-pihak lain yang berkepentingan sedang melihat kepada sistem biometrik yang sedang digunakan di negara-negara lain, yang boleh membantu kita melihat dan menambah baik sistem mengimbas cap jari yang disebutkan oleh Yang Berhormat tadi.

Berhubung kait dengan keupayaan di sempadan negara jiran, saya mengakui bahawa isu berhubung kait dengan pekerja asing ini tidak boleh ditangani oleh satu kementerian sahaja. Sebenarnya di bawah Mesyuarat Jawatankuasa Kabinet mengenai pekerja asing dan pendatang asing tanpa izin, jawatankuasa ini melibatkan tidak kurang daripada 14 kementerian dan juga 11 jabatan dan agensi. Di bawah jawatankuasa ini kita telah tetapkan tiga aspek utama:-

- (i) permintaan dan penawaran;
- (ii) sistem dan proses; dan
- (iii) perundangan dan penguatkuasaan.

Di bawah jawatankuasa ini juga 50 cadangan inisiatif telah pun dikenal pasti dan di bawah jawatankuasa ini juga enam petunjuk prestasi utama telah pun disenaraikan:-

- (i) mengurangkan jumlah pekerja asing di negara ini;
- (ii) mengurangkan jumlah pendatang asing tanpa izin;
- (iii) peningkatan jumlah majikan yang dikenakan tindakan undang-undang;
- (iv) peningkatan jumlah pendapatan Jabatan Imigresen Malaysia;
- (v) mengurangkan kos perubatan yang ditanggung kerajaan; dan

(vi) mengurangkan jumlah kes jenayah melibatkan warga asing.

Keenam-enam ini merupakan KPI yang telah pun dikenal pasti. *Insya-Allah* kalau semua ini dapat dilaksanakan apa yang merupakan kebimbangan Yang Berhormat berhubung kait dengan keupayaan kita untuk memantau sempadan-sempadan di negara jiran akan dapat diatasi. *Insya-Allah*.

Tuan Mohamed Azmin Ali [Gombak]: Tuan Yang di-Pertua, Yang Berhormat Menteri telah menjelaskan bahawa salah satu peranan dan tanggungjawab imigresen adalah untuk memantau kemasukan warganegara asing ke dalam negara dan dilihat khususnya daripada aspek keselamatan dan juga ancaman kepada negara.

Sudah tentulah untuk mencapai matlamat ini kerajaan memerlukan satu pangkalan data yang cukup terurus dan lengkap bagi memantau pergerakan warganegara asing ke dalam negara kita. Persoalan yang ingin saya lontarkan ialah, apakah imigresen juga setelah memiliki pangkalan data yang lengkap dan sempurna, diberikan kuasa dan tanggungjawab untuk memadam atau menghilangkan pergerakan mana-mana warga asing ke dalam negara ini? Persoalan ini penting kerana maklumat awal yang kita peroleh, pihak imigresen telah pun memadamkan dan menghilangkan pergerakan seorang warganegara asing yang bernama Altantuya.

Sekiranya ini berlaku saya ingin mengetahui apakah bidang kuasa imigresen untuk memadamkan pergerakan keluar masuk Altantuya ke dalam negara Malaysia? *[Tepuk]* Sekiranya ini berlaku, Yang Berhormat Menteri tidak perlu tengok sebelah kirilah, tengok Tuan Yang di-Pertua, apakah tindakan yang akan diambil oleh kerajaan terhadap mana-mana individu yang bertanggungjawab menghilangkan rekod perjalanan Altantuya ke dalam negara ini? Terima kasih.

Dato' Seri Hishammuddin bin Tun Hussein: Hujah Yang Berhormat Gombak dengan ceramah yang dibuat di Gombak pun lebih kurang sahaja sama ada di Parlimen atau tidak. *[Ketawa]* Ini sekali lagi Tuan Yang di-Pertua merupakan soalan tambahan yang berunsurkan politik..

Dr. Dzulkefly Ahmad [Kuala Selangor]: *We don't double speak.*

Dato' Seri Hishammuddin bin Tun Hussein: Bukan satu perkara yang baru dan kita telah pun menafikan kalau ada maklumat tambahan, ada maklumat yang perlu kita kaji siasat. Ini siasatan awal yang disebutkan tidak ada kena-mengena dengan apa yang merupakan soalan asal kita tadi.

Tuan Mohamed Azmin Ali [Gombak]: Apakah Yang Berhormat Menteri menafikan bahawa rekod sudah hilang?

Dato' Seri Hishammuddin bin Tun Hussein: Bawa bukti dan kita akan siasat.

Tuan Mohamed Azmin Ali [Gombak]: Apakah pendirian kementerian? Apakah rekod itu masih ada?

Dato' Seri Hishammuddin bin Tun Hussein: Bukti dalam mahkamah.

Tuan Mohamed Azmin Ali [Gombak]: Nyatakan dalam Parlimen. Saya tidak mahu ceramah di Gombak. Saya minta Yang Berhormat Menteri nyatakan di dalam Parlimen apakah kementerian menafikan bahawa rekod perjalanan Altantuya masih kekal?

Dato' Seri Hishammuddin bin Tun Hussein: Yang Berhormat, berhubung kait dengan apa yang dibangkitkan Yang Berhormat, sebenarnya telah pun dibangkitkan oleh Yang Berhormat sebelum daripada ini.

Tuan Mohamed Azmin Ali [Gombak]: Tidak mengapa. Saya hendak...

Dato' Seri Hishammuddin bin Tun Hussein: Kita telah pun membuat jawapan berhubung kait dengan perkara ini...

Tuan Mohamed Azmin Ali [Gombak]: *[Dewan riuh]* Saya hendak jawapan bukan soal berapa kali saya bangkitkan. Saya hendak jawapan apakah benar...

Dato' Seri Hishammuddin bin Tun Hussein: Yang tidak ada kena-mengena dengan soalan asalnya tadi.

Tuan Mohamed Azmin Ali [Gombak]: Apakah benar rekod Altantuya sudah dipadamkan?

Dato' Seri Hishammuddin bin Tun Hussein: Kalau sekiranya ada kaitan dengan soalan asal...

Tuan Yang di-Pertua: Yang Berhormat duduk.

Tuan Mohamed Azmin Ali [Gombak]: Yang Berhormat Menteri tidak beri jawapan Tuan Yang di-Pertua.

Tuan Yang di-Pertua: Sila duduk Yang Berhormat.

Tuan Mohamed Azmin Ali [Gombak]: Jawapan Tuan Yang di-Pertua? *[Ketawa]*

Tuan Yang di-Pertua: Ahli-ahli Yang Berhormat, saya tidak boleh memaksa kepada siapa untuk memberi jawapan seperti mana yang dikehendaki oleh penyoal. Itu semua jelas, dan yang jelas lagi kalau ada pertanyaan seperti begitu yang dijawab dengan sedemikian, jangan Ahli-ahli Yang Berhormat yang lain campur hal kerana apabila Yang Berhormat campur hal maka saya pun kena campur hal. Apabila sudah saya campur hal seperti ini ada Yang Berhormat yang kurang senang kerana speaker selalu membebel. Akan tetapi kalau Yang Berhormat sendiri yang membebel siapa yang tegur?

Yang Berhormat Dato' Seri Anwar bin Ibrahim, Permatang Pauh.

Dato' Seri Anwar Ibrahim [Permatang Pauh]: Tuan Yang di-Pertua, sebelum mengemukakan soalan saya hendak sambut baik kehadiran Yang Berhormat Menteri Luar Negeri kembali sihat, *alhamdulillah*. Soalan yang keempat.

4. Dato' Seri Anwar Ibrahim [Permatang Pauh] minta Menteri Luar Negeri menyatakan kesahan keputusan Kerajaan Persekutuan untuk menyerahkan padang minyak Blok L dan M kepada Brunei dan mengapa isu kedaulatan wilayah perairan negara tersebut tidak dirujuk kepada Parlimen dan Dewan Undangan Negeri.

Menteri Luar Negeri [Dato' Sri Anifah bin Aman]: Tuan Yang di-Pertua, terutama sekali saya ingin mengucapkan ribuan terima kasih atas keikhlasan Yang Berhormat Permatang Pauh tentang kesihatan saya.

Tuan Yang di-Pertua, terlebih dahulu izinkan saya untuk menjawab soalan yang dikemukakan oleh Yang Berhormat Permatang Pauh ini bersekali dengan soalan-soalan yang dikemukakan oleh Yang Berhormat Lanang pada 7 Jun, 2010; Yang Berhormat Gua Musang, Yang Berhormat Putatan dan Yang Berhormat Ranau pada 8 Jun, 2010; Yang Berhormat Selayang dan Yang Berhormat Pasir Mas pada 9 Jun, 2010; Yang Berhormat Tuaran, Yang Berhormat Marang dan Yang Berhormat Arau pada 15 Jun, 2010; Yang Berhormat Kuala Selangor pada 16 Jun, 2010; Yang Berhormat Ipoh Timur pada 17 Jun, 2010; Yang Berhormat Rantau Panjang pada 21 Jun, 2010; Yang Berhormat Jelutong, Yang Berhormat Petaling Jaya Selatan, Yang Berhormat Marang, Yang Berhormat Kota Raja dan Yang Berhormat Balik Pulau pada 22 Jun, 2010; Yang Berhormat Limbang dan Yang Berhormat Kuala Krai pada 23 Jun, 2010; Yang Berhormat Taiping pada 24 Jun, 2010; Yang Berhormat Maran pada 28 Jun, 2010; Yang Berhormat Lawas dan Yang Berhormat Hulu Langat pada 30 Jun, 2010; Yang Berhormat Kubang Kerian, Yang Berhormat Lembah Pantai dan Yang Berhormat Shah Alam pada 1 Julai, 2010; Yang Berhormat Tawau dan Yang Berhormat Sepanggar pada 6 Julai, 2010; Yang Berhormat Pokok Sena pada 7 Julai, 2010; Yang Berhormat Tumpat pada 8 Julai 2010 dan soalan-soalan daripada Yang Berhormat Hulu Terengganu dan Yang Berhormat Subang pada 12 Julai 2010. Ini adalah disebabkan soalan-soalan tersebut menyentuh isu yang sama iaitu berhubung dengan penyelesaian isu-isu tertunggak di antara Malaysia dan Brunei Darussalam.

Tuan Yang di-Pertua, saya akur dengan nasihat Tuan Yang di-Pertua, *I will go straight to the points* tetapi *pointnya* juga agak panjang Tuan Yang di-Pertua. [Ketawa] Tuan Yang di-Pertua, pada 21 Disember, 1979 Malaysia telah menerbitkan satu peta yang menunjukkan sempadan perairan ataupun *territorial water* dengan izin, dan pelantar benua Malaysia. Peta tersebut diterbitkan dalam dua *sheet* iaitu *sheet* satu untuk Semenanjung Malaysia dan *sheet* dua untuk Sabah dan Sarawak. Peta Malaysia 1979 ini disediakan berasaskan kepada peruntukan konvensyen-konvensyen antarabangsa yang berkaitan, prinsip dan peruntukan *customary law* dan juga persetujuan-persetujuan yang telah dicapai dengan negara-negara jiran yang dizahirkan melalui perjanjian-perjanjian pembatasan sempadan maritim termasuk *agreement between the Government of Malaysia and the Government of the Republic of Indonesia relating to the deal limitation of the continental shares between the two countries* bertarikh 27 Oktober, 1969 dan sebagainya.

Bagi kawasan-kawasan yang tidak diliputi oleh perjanjian pembatasan sempadan maritim, peta Malaysia 1979 merupakan manifestasi tuntutan unilateral Malaysia terhadap perairan wilayah dan kawasan pelantar benua.

■1120

Sehubungan dengan itu, negara-negara jiran yang belum mempunyai perjanjian sempadan maritim dengan Malaysia adalah tidak terikat untuk mengiktiraf tuntutan unilateral ini.

Tuan Yang di-Pertua, peta Malaysia 1979 telah dibantah oleh negara-negara jiran Malaysia termasuk Brunei Darussalam. Dalam hal ini, sukacita saya maklumkan bahawa dalam penerbitan peta Malaysia 1979, Malaysia telah menjelaskan kesediaan untuk menyelesaikan apa-apa isu maritim yang timbul secara rundingan dua hala.

Tuan Yang di-Pertua, pada tahun 1988, Brunei Darussalam telah menerbitkan peta-peta yang menunjukkan kawasan pelantar benua dan zon perikanan. Pada tahun 1993, Brunei Darussalam mengisytiharkan kawasan zon ekonomi eksklusif bagi negara tersebut. Berdasarkan kepada peta-peta dan

pengisytiharan tersebut, had sempadan pelantar benua dan zon ekonomi eksklusif Brunei Darussalam adalah sejauh 200 batu nautika dari pesisir pantai Brunei Darussalam.

Dalam masa yang sama, peta-peta tersebut menunjukkan bahawa kawasan maritim yang dituntut oleh Brunei Darussalam bertindih dengan kawasan yang dituntut oleh Malaysia berdasarkan pada peta 1979. Sehubungan dengan itu, Brunei Darussalam mencadangkan agar kedua-dua negara mengadakan rundingan dua hala bagi mencari jalan untuk menyelesaikan isu tuntutan bertindih kawasan maritim tersebut. Rundingan dua hala yang menyelesaikan isu persempadanan maritim telah diadakan mulai daripada pertengahan tahun 1980-an termasuklah perbincangan di antara Peguam Negara Malaysia dan Peguam Negara Brunei Darussalam pada tahun 1990 dan perbincangan semasa mesyuarat Suruhanjaya Bersama Malaysia – Brunei Darussalam pada tahun 1994.

Tuan Yang di-Pertua, pada tahun 1997, dua mesyuarat di peringkat pegawai kanan diadakan membincangkan isu persempadanan maritim dan darat di antara kedua-dua negara. Perbincangan yang diadakan tidak mencapai sebarang keputusan dan adalah jelas bahawa kedua-dua pihak tidak berganjak daripada pendirian masing-masing dan ini mewujudkan kebuntuan di dalam perundingan.

Pada awal tahun 2002, Malaysia mendapat maklumat bahawa Brunei Darussalam telah memberi konsesi cari gali minyak dan gas di Blok J dan K yang merupakan blok-blok yang ditandakan sebagai Blok L dan M oleh Malaysia kepada satu konsortium yang terdiri daripada TotalFinaElf, BHP Biliton dan Amerada Hess. Sebagai tindak balas, Kerajaan Malaysia telah mengarah agar Petronas turut memberi konsesi cari gali minyak di Blok L dan M. Susulan daripada itu, Petronas telah memberi konsesi cari gali minyak dan gas di Blok L dan M kepada Petronas Cari Gali Sendirian Berhad dan *Murphy Oil Corp.* Pemberian konsesi cari gali minyak dan gas oleh kedua-dua pihak ini telah menyebabkan wujud satu situasi tegang di kawasan tersebut di mana pasukan tentera laut kedua-dua negara telah menghalang kontraktor-kontraktor yang berkaitan daripada menjalani operasi masing-masing.

Pada 23 Mei 2003, Duli Yang Maha Mulia Paduka Seri Sultan dan Yang di-Pertuan Negara Brunei Darussalam, Sultan Haji Hassanal Bolkiah mengadakan lawatan kerja ke Malaysia dan bertemu dengan Yang Amat Berbahagia Tun Mahathir Mohamad, Perdana Menteri Malaysia pada ketika itu. Di dalam pertemuan tersebut, kedua-dua pemimpin bersetuju agar pegawai-pegawai kanan daripada Kementerian Luar Negeri masing-masing bertemu untuk membincangkan penyelesaian kepada isu pembatasan sempadan maritim dan darat di antara kedua-dua negara.

Kedua-dua pemimpin juga bersetuju agar aktiviti-aktiviti berkaitan dengan cari gali minyak dan gas di Blok L dan M, (J dan K bagi Brunei Darussalam) dihentikan. Ini bermaksud satu moratorium ke atas aktiviti eksplorasi dan eksploitasi minyak dan gas telah diwujudkan di kawasan tersebut.

Tuan Yang di-Pertua, pegawai-pegawai kanan kedua-dua pihak telah bertemu dan berbincang bagi menyelesaikan isu ini mulai Mei 2003. Sebanyak 29 mesyuarat telah diadakan di antara bulan Mei 2003 sehingga bulan Julai 2008. Beberapa cadangan dan cadangan balas telah dikemukakan oleh kedua-dua pihak. Rundingan yang diadakan pada 19 Ogos 2007 telah berjaya merapatkan jurang perbezaan dan kedua-dua pihak bersetuju bahawa penyelesaian

menyeluruh meliputi kawasan maritim dan darat di antara kedua-dua negara adalah merupakan pilihan terbaik.

Rundingan-rundingan selanjutnya telah membolehkan kedua-dua pihak memperincikan cadangan penyelesaian tersebut dari segi substantif dan *modality* pelaksanaannya. Penyelesaian ini telah dipersetujui secara prinsip oleh Yang Amat Berhormat Perdana Menteri Malaysia dan Duli Yang Maha Mulia Paduka Seri Baginda Sultan dan Yang di-Pertuan Negara Brunei Darussalam semasa perundingan tahunan yang diadakan di Pulau, Johor pada 26 Ogos 2008.

Tuan Yang di-Pertua, penyelesaian yang dipersetujui tersebut telah di bincang dan diluluskan oleh Mesyuarat Jemaah Menteri pada mesyuarat bertarikh 11 Februari 2009. Penyelesaian tersebut telah dimeterai melalui pertukaran surat dengan izin, *exchange of letters* yang telah disempurnakan oleh Perdana Menteri Malaysia pada ketika itu, Yang Amat Berhormat Tun Abdullah Haji Ahmad Badawi dengan Duli Yang Maha Mulia Paduka Seri Baginda Sultan dan Yang di-Pertuan Negara Brunei Darussalam Sultan Haji Hassanah Bolkiah di Istana Nur Iman, Bandar Seri Begawan, Brunei Darussalam pada 16 Mac 2009.

Tuan Yang di-Pertua, elemen-elemen penyelesaian yang terkandung di dalam pertukaran surat adalah seperti berikut:

- (i) persempadanan maritim di antara Malaysia dan Brunei Darussalam;
- (ii) aturan komersial (*commercial arrangement*) dengan izin;
- (iii) persempadanan darat di antara Malaysia dan Brunei Darussalam; dan
- (iv) akses maritim (*maritime access*) dengan izin.

Izinkan saya untuk menjelaskan satu persatu bagi keempat-empat elemen yang telah dinyatakan tadi. Yang pertamanya, berkaitan dengan persempadanan maritim di antara Malaysia dan Brunei Darussalam. Di bawah pertukaran surat tersebut, sempadan laut wilayah atau *territory waters* dengan izin, pelantar benua *continental shelf* dan zon ekonomi eksklusif atau *exclusive economic zone*, dengan izin di antara kedua-dua negara telah ditentukan. Peruntukan sempadan maritim ini dicapai berdasarkan kepada peruntukan-peruntukan berkaitan konvensyen Pertubuhan Bangsa-Bangsa Bersatu mengenai Undang-undang Laut 1982 atau *United Nation Convention on the Law of the Sea 1992 (UNCLOS 1982)*.

Di bawah UNCLOS 1982, setiap negara berpantai adalah berhak kepada laut wilayah, pelantar benua dan zon ekonomi eksklusif. Malaysia dan Brunei Darussalam merupakan negara ahli kepada UNCLOS 1982 dan mempunyai obligasi dan tanggungjawab untuk melaksanakan peruntukan-peruntukan UNCLOS 1982. Pembatasan sempadan maritim yang telah dipersetujui ini adalah bersifat kekal atau *final* dengan izin. Dengan adanya sempadan maritim ini, tuntutan bertindih kawasan maritim di antara kedua-dua negara telah dapat diselesaikan.

Keduaanya Tuan Yang di-Pertua, berkaitan dengan aturan komersial atau dengan izin *commercial arrangement*. Di bawah pertukaran surat bagi maksud aturan komersial ini, Malaysia dan Brunei Darussalam bersetuju bahawa dua blok iaitu Blok CA1 dan CA2 diwujudkan. Untuk makluman Dewan yang mulia ini, Blok CA1 diasaskan kepada Blok L Malaysia dan Blok J Brunei Darussalam dan Blok CA2 diasaskan kepada Blok M Malaysia dan Blok K Brunei Darussalam. Dari segi lokasinya, kedua-dua blok ini adalah terletak di dalam kawasan maritim Brunei Darussalam di mana Brunei Darussalam mempunyai hak-hak kedaulatan atau

sovereign rights dengan izin, terhadap sumber-sumber hidupan dan bukan hidupan, *living and non living resources*. Walau bagaimanapun, aturan komersial yang diwujudkan akan membolehkan perkongsian hasil atau *revenue sharing* daripada eksploitasi minyak dan gas dilaksanakan.

Ini bermaksud, walaupun Brunei Darussalam mempunyai hak-hak kedaulatan terhadap sumber-sumber di dalam kawasan maritim tersebut, melalui aturan komersial Brunei Darussalam akan berkongsi hasil tersebut dengan Malaysia. *Modality* kewangan dan operasi bagi melaksanakan aturan komersial ini serta penyelesaian-penyelesaian isu-isu berkaitan termasuklah isu lapangan rentas sempadan atau *straddling field*, dengan izin akan dibincangkan oleh pegawai-pegawai kanan kedua-dua negara termasuklah pegawai-pegawai Petronas. Dalam hal ini, sukacita saya maklumkan bahawa pegawai-pegawai kanan kedua-dua negara bertemu beberapa kali memperincikan *modality* kewangan dan operasi ini.

Tuan Yang di-Pertua, elemen ketiga adalah persempadanan darat di antara Malaysia dan Brunei Darussalam. Di bawah pertukaran surat ini, kedua-dua pihak bersetuju bahawa pembatasan sempadan darat di antara kedua-dua negara akan diselesaikan berdasarkan kepada dua *modality* iaitu penandaan atau *demarcation* sempadan berdasarkan kepada lima perjanjian darat sedia ada yang telah ditandatangani antara Kerajaan Negeri Sarawak dan Kerajaan Negeri Brunei Darussalam iaitu perjanjian bertarikh 4 Februari 1920, perjanjian bertarikh 25 Ogos 1931, perjanjian bertarikh 31 Oktober 1931, perjanjian bertarikh 24 Februari 1933 dan perjanjian bertarikh 4 November 1939 dari tahun 1920 hingga tahun 1939.

■ 1130

Kedua, penggunaan *Friendship Watershed* bagi kawasan-kawasan yang mana tiada sebarang perjanjian.

Penyelesaian sempadan darat ini adalah bersifat kekal dan mengikat ataupun dengan izin *final and binding*. Sehubungan dengan itu, sukacita saya maklumkan bahawa apabila kerja-kerja menandakan atau *demarcate* sempadan kedua-dua negara berdasarkan modaliti yang telah ditentukan ini selesai dilaksanakan, tidak akan wujud lagi isu tuntutan terhadap Limbang oleh Brunei Darussalam.

Tuan Yang di-Pertua, elemen keempat yang terkandung di dalam pertukaran surat adalah laluan maritim atau *maritime access*, dengan izin. Di bawah pertukaran surat tersebut, rakyat dan penduduk Malaysia diberi hak laluan melalui zon maritim Brunei Darussalam dalam perjalanan pergi dan balik daripada Sarawak dan hak laluan maritim ini tidak boleh digantung atau *unsuspendable* oleh Brunei Darussalam. Walau bagaimanapun, undang-undang dan peraturan negara tersebut perlulah dipatuhi di dalam menggunakan hak laluan maritim ini.

Tuan Yang di-Pertua, kedua-dua negara yakin bahawa peningkatan hubungan dan kerjasama di antara kedua-dua negara di dalam pelbagai bidang khususnya di dalam sektor perdagangan dan pelaburan akan dapat dipertingkatkan. Dalam hal ini, sukacita saya ingin maklumkan bahawa Kerajaan Brunei Darussalam telah menyatakan komitmen untuk terlibat secara aktif dalam bidang ekonomi dan pelaburan Malaysia khususnya di Sabah, Sarawak dan Iskandar Malaysia. Kedua-dua negara juga berbincang mengenai peluang-peluang pelaburan secara bersama di negara ketiga.

Tuan Yang di-Pertua, pada masa ini, kedua-dua pihak sedang dalam proses melaksanakan elemen-elemen penyelesaian seperti yang terkandung dalam pertukaran surat. Pegawai-pegawai kanan kedua-dua negara sedang

memperincikan modaliti pelaksanaan tersebut. Dalam hal ini sukacita saya maklumkan bahawa beberapa jawatankuasa bersama telah ditubuhkan di antara kedua-dua negara bagi memastikan pelaksanaan yang teratur dan lancar bagi setiap elemen seperti yang terkandung di dalam pertukaran surat tersebut.

Tuan Yang di-Pertua, izinkan saya untuk menjelaskan bahawa elemen-elemen terkandung dalam pertukaran surat ini terutamanya yang melibatkan persempadanan maritim dan darat di antara kedua-dua negara adalah sah dan tidak bercanggah dengan peruntukan Perlembagaan Persekutuan, Artikel 2 Perlembagaan Persekutuan - Parlimen boleh dengan undang-undang:

- (i) memasukkan negeri-negeri lain dalam Persekutuan;
- (ii) mengubah sempadan mana-mana negeri tetapi undang-undang yang mengubah sempadan sesuatu negeri tidak boleh diluluskan dengan tiada persetujuan negeri itu yang dinyatakan dengan undang-undang yang dibuat oleh penaung negeri itu dan juga Majlis Raja-Raja.

Dalam hal ini, sukacita saya ingin maklumkan bahawa elemen-elemen yang terkandung dalam pertukaran surat khususnya melibatkan persempadanan maritim dan darat tidak mengubah sempadan mana-mana negeri yang berkaitan malahan mengesahkan sempadan yang wujud di antara Sabah dan Sarawak dengan Brunei Darussalam.

Berhubung dengan penyelesaian persempadanan maritim, Artikel 2 Perlembagaan Persekutuan tidak terpakai kepada kawasan maritim dan ini adalah kerana semua perundangan Malaysia menyatakan dengan jelas bahawa bidang kuasa di kawasan maritim adalah terletak kepada Kerajaan Persekutuan dan bukannya kerajaan-kerajaan negeri.

Seksyen 3 Akta Pelantar Benua 1966, misalnya menyatakan bahawa dengan izin,

"All rights with respect to the exploration of the continental shelf the exploitation of its natural resources are hereby vested in Malaysia and shall be exercisable by the Federal Government."

Selain daripada itu Tuan Yang di-Pertua, sempadan maritim yang wujud di antara Sabah dan Sarawak dengan Brunei Darussalam apabila kedua-dua negeri ini menyertai Malaysia adalah *the Sarawak* atau *definition of boundaries Order in Council* nombor 1518 bertarikh 11 September 1958 dan *North Borneo definition of boundaries Order in Council* nombor 1517 bertarikh 11 September 1958.

Kedua-dua *Order in Council* ini membatasi sempadan kawasan maritim sehingga ke dalaman dengan izin, 100 *fathom isobaths*. Bagi kawasan selepas kedalaman 100 *fathom isobaths* tidak wujud sebarang sempadan di antara kedua-dua negeri dengan Brunei Darussalam. Kedua-dua *Order in Council* ini tidak berubah di bawah pertukaran surat dan sehubungan dengan ini, tidak wujud sebarang pengubahan sempadan negeri seperti dinyatakan oleh sesetengah pihak.

Modaliti pembatasan sempadan darat di antara Malaysia dan Brunei Darussalam seperti yang terkandung di dalam pertukaran surat juga tidak bercanggah dengan Artikel 2 Perlembagaan Persekutuan ini. Ini kerana pertukaran surat mengesahkan sempadan sedia ada di antara Sarawak dan Brunei Darussalam seperti yang terkandung di dalam lima perjanjian yang sedia ada.

Tuan Yang di-Pertua, seperti yang telah saya maklumkan di dalam Dewan yang mulia ini sebelum ini, Malaysia berpendirian bahawa isu-isu tuntutan bertindih kawasan maritim atau tuntutan bertindih ke atas ciri-ciri geografi seperti pulau, terumbu dan sebagainya wajar diselesaikan melalui rundingan dua hala. Hanya apabila rundingan dua hala gagal dan tidak dapat diselesaikan walaupun melalui pertimbangan politik, barulah isu tersebut dirujuk kepada pihak ketiga seperti Mahkamah Keadilan Antarabangsa (ICJ) ataupun tribunal timbang tara untuk diselesaikan. Saya ingin tegaskan di sini bahawa rujukan kepada pihak ketiga adalah merupakan opsyen terakhir di dalam mencapai penyelesaian terhadap satu-satu isu tuntutan bertindih.

Tuan Yang di-Pertua, pertukaran surat atau *exchange of letters* pada 16 Mac 2009 telah menyelesaikan isu-isu berbangkit di antara kedua-dua negara. Dengan ini, hubungan dua hala yang sedia terjalin di antara kedua-dua negara telah memasuki fasa baru yang lebih akrab dan memberikan kebaikan kepada kedua-dua pihak.

Lembaran baru dalam hubungan dua hala Malaysia-Brunei Darussalam dijangka membuka jalan kepada kerjasama yang lebih erat di antara kedua-dua negara khususnya dalam bidang pelaburan dan ekonomi. Pertukaran surat juga menentukan sempadan di antara Sarawak dengan Brunei Darussalam khususnya di kawasan Limbang dimuktamadkan dan tidak akan wujud lagi isu tuntutan Limbang oleh Brunei Darussalam. Sekian, terima kasih.

Tuan Yang di-Pertua: Terima kasih.

Dato' Seri Anwar Ibrahim [Permatang Pauh]: Tuan Yang di-Pertua, soalan tambahan.

Tuan Yang di-Pertua: Ahli Yang Berhormat, saya telah pun menggunakan kuasa saya yang sebenarnya...

Dato' Seri Anwar Ibrahim [Permatang Pauh]: Terima kasih tetapi kita mula lambat tadi.

Tuan Yang di-Pertua: Ya, saya tahu. Akan tetapi, kalau soalan tambahan itu tidak sempat dijawab oleh Yang Berhormat Menteri dalam keadaan tergantung, maka tidak elok. Jadi, biarlah soalan asal itu dijawab tadi dengan satu jawapan yang saya rasa memadai.

Ahli Yang Berhormat, dengan selesainya jawapan daripada Yang Berhormat Menteri Luar Negeri kepada soalan nombor 4 daripada Yang Berhormat Permatang Pauh, maka sesi pertanyaan-pertanyaan bagi jawab lisan untuk pagi ini berakhir. Setiausaha sila.

[Masa untuk Pertanyaan-pertanyaan bagi Jawab Lisan telah tamat]

RANG UNDANG-UNDANG DIBAWA KE DALAM MESYUARAT**RANG UNDANG-UNDANG MAHKAMAH RENDAH (PINDAAN) 2010****Bacaan Kali Yang Pertama**

Rang undang-undang bernama Suatu Akta untuk meminda Akta Mahkamah Rendah 1948; dibawa ke dalam Mesyuarat oleh Menteri di Jabatan Perdana Menteri [Dato' Seri Mohamed Nazri bin Abdul Aziz]; dibaca kali yang pertama; akan dibacakan kali yang kedua pada Mesyuarat kali ini.

**RANG UNDANG-UNDANG SURUHANJAYA PELANTIKAN KEHAKIMAN
(PINDAAN) 2010****Bacaan Kali Yang Pertama**

Rang undang-undang bernama Suatu Akta untuk meminda Akta Suruhanjaya Pelantikan Kehakiman 2009; dibawa ke dalam Mesyuarat oleh Menteri di Jabatan Perdana Menteri [Dato' Seri Mohamed Nazri bin Abdul Aziz]; dibaca kali yang pertama; akan dibacakan kali yang kedua pada Mesyuarat kali ini.

USUL**MENGUTUK TENTERA REJIM ZIONIS YANG MENYERANG KONVOI
BANTUAN KEMANUSIAAN KE GAZA**

11.39 pg.

Perdana Menteri dan Menteri Kewangan [Dato' Sri Mohd. Najib bin Tun Haji Abdul Razak]: *Bismillaahir Rahmaanir Rahiim*. Tuan Yang di-Pertua, pagi ini dalam Dewan yang mulia ini, di tapak istana demokrasi yang berkeramat, kita sama-sama berkumpul dengan satu tekad, satu matlamat dan satu suara tanpa dikekang batas agama, bangsa mahupun haluan politik untuk mengangkat satu isu penting yang bukan sahaja menyentuh hati rakyat Malaysia bahkan majoriti warga antarabangsa.

■ 1140

Dengan izin Tuan Yang di-Pertua saya ingin mengungkapkan kata-kata Nelson Mandela... [*Dewan riuh*] Yang cukup bermakna, "*Palestin is the greatest moral issue of our ages*". Justeru sebelum berbicara lebih lanjut, seelok-eloknya saya merentik kembali empat peristiwa besar yang melibatkan salah laku kotor dan busuk oleh Rejim Zionis.

Pertama, bermula lebih 60 tahun yang lalu, rakyat Palestin terus-terusan dinafikan hak untuk menghirup udara kebebasan di tanah tumpah sendiri. Seawal tragedi Nakba tahun 1948, penduduk Palestin telah dihalau dari kampung halaman masing-masing secara kejam oleh Israel yang telah buat pertama kali ketika itu memperkenalkan *terrorism* sebagai kaedah untuk mencapai matlamat mereka.

Kedua, sekitar akhir tahun 60-an, selepas apa yang digelar 'Peperangan 6-Hari' di atas tanah-tanah yang dirampas daripada bangsa Palestin didirikan pula penempatan-penempatan haram tanpa rasa bersalah atau segan silu.

Kemudiannya, peristiwa ketiga pada tahun 1982, tentu tidak dapat dilupakan yakni tragedi pembantaian ganas ke atas kanak-kanak, wanita dan mereka yang tidak berdosa di Kem Pelarian Sabra dan Shatila.

Keempat pula, saya yakin masih segar dalam ingatan ramai akan serangan ketenteraan Regim Zionis ke atas wilayah Gaza sehingga mengakibatkan kehilangan nyawa rakyat awam Palestin termasuk golongan wanita, kanak-kanak, bayi dan warga tua.

Apa yang jelas, tragedi-tragedi ini ternyata lukanya masih lagi bukan sahaja belum sembuh, bahkan kekal kuning bernanah di sanubari masyarakat dunia. Kini, tampaknya kesan hirisan itu terus dilukai oleh satu lagi episod tidak perikemanusiaan. Peristiwa pembunuhan kejam sembilan orang sukarelawan oleh Komando Israel tanggal 31 Mei 2010 baru-baru ini, pastinya telah menyimbah minyak ke atas api kemarahan masyarakat dunia yang kini marak menyala dan membakar perabung-perabung dada.

Jadinya, demi menyuarakan ketegasan negara tentang peristiwa berdarah yang telah terjadi, saya menyeru Ahli-ahli Yang Berhormat sekalian bersama-sama saya sepakat, seia, sekata, sederap menyampaikan kepada seluruh dunia akan pendirian Malaysia mengutuk sekeras-kerasnya tindakan... [*Tepuk*] Yang tidak berperikemanusiaan oleh Regim Zionis ini.

Tuan Yang di-Pertua, dengan ini saya mencadangkan mengikut Peraturan Mesyuarat 27(3), Dewan ini mengambil ketetapan-ketetapan berikut:

Bahawa, Tentera Regim Zionis di bawah kerajaan pimpinan Perdana Menteri Israel Benjamin Netanyahu, telah menyerang tanpa alasan dalam perairan antarabangsa, konvoi kapal Freedom Flotila yang membawa bantuan kemanusiaan ke Gaza pada 31 Mei 2010. Kejadian itu mengakibatkan banyak kematian dan kecederaan kepada ahli kumpulan konvoi bantuan kemanusiaan tersebut;

Bahawa, serangan Regim Zionis ke atas kapal misi bantuan kemanusiaan itu merupakan tindakan yang mencabuli undang-undang antarabangsa, termasuk undang-undang hak asasi manusia, undang-undang kemanusiaan antarabangsa dan Piagam Pertubuhan Bangsa-Bangsa Bersatu;

Bahawa, sentimen yang sama telah pun disampaikan melalui Kenyataan Bersama Menteri-Menteri Luar Negeri ASEAN – Majlis Kerjasama Negara-Negara Teluk (GCC) di Singapura pada 1 Jun 2010, yang menyuarakan kutukan keras terhadap tindakan Regim Zionis Israel ini;

Bahawa, rakyat Malaysia berpegang teguh pada pendirian bahawa tiada alasan bagi penggunaan kekerasan yang melampau ke atas kapal misi bantuan kepada rakyat Palestin di Gaza tersebut; dan

Bahawa, rakyat Malaysia sangat kecewa dengan ketidakmampuan masyarakat antarabangsa terutamanya Majlis Keselamatan Pertubuhan Bangsa-Bangsa Bersatu untuk

membuat bantahan keras terhadap tindakan ganas Regim Zionis itu.

DENGAN INI DEWAN mengambil ketetapan seperti berikut:

- (1) Mengutuk sekeras-kerasnya serangan tentera Regim Zionis di bawah arahan Perdana Menteri Israel, Benjamin Netanyahu, ke atas kapal misi bantuan kemanusiaan ke Gaza yang telah mengakibatkan kehilangan banyak nyawa dan kecederaan kepada orang awam;
- (2) Merakamkan rasa kecewa tidak terhingga tindakan Majlis Keselamatan Pertubuhan Bangsa-Bangsa Bersatu di atas kenyataan yang begitu lemah terhadap serangan ganas Regim Zionis ke atas kapal misi bantuan tersebut;
- (3) Memutuskan untuk mendesak Majlis Keselamatan Pertubuhan Bangsa-Bangsa Bersatu untuk mencela Israel dan bukannya membuat kenyataan lemah semata-mata;
- (4) Memutuskan bagi Malaysia untuk bekerjasama dengan negara-negara Anggota Pertubuhan Persidangan Islam (OIC), Pergerakan Negara-Negara Berkecuali (NAM), Liga Arab dan negara-negara sependapat, untuk mendukung prinsip undang-undang antarabangsa termasuk undang-undang hak asasi manusia, undang-undang kemanusiaan antarabangsa dan Piagam Pertubuhan Bangsa-Bangsa Bersatu dalam menangani krisis kemanusiaan di Gaza;
- (5) Menggesa negara-negara sependapat untuk mengemukakan usul kepada Majlis Keselamatan Pertubuhan Bangsa-Bangsa Bersatu bagi merujuk situasi akibat serangan Tentera Regim Zionis Israel ke Mahkamah Jenayah Antarabangsa (ICC);
- (6) Menggesa negara-negara sependapat untuk mengemukakan usul kepada Perhimpunan Agung Pertubuhan Bangsa-Bangsa Bersatu bagi mendapatkan *Advisory Opinion* Mahkamah Keadilan Antarabangsa (ICJ);
- (7) Memohon supaya negara Turki mempertimbangkan untuk mengambil tindakan di bawah peruntukan *Statut Rome*, Mahkamah Jenayah Antarabangsa (ICC);
- (8) Menyeru supaya satu siasatan bebas yang penuh dibuat terhadap serangan Tentera Regim Zionis dan bukannya setakat siasatan yang tidak berpihak;
- (9) Menyokong sepenuhnya desakan masyarakat antarabangsa terutamanya Majlis Hak Asasi Manusia melalui Resolusi yang telah diterima pada 2 Jun 2010

- supaya siasatan yang berakauntabiliti dan bebas sepenuhnya dibuat mengenai serangan ini;
- (10) Menuntut Israel supaya tidak menghalang sebarang konvoi bantuan kemanusiaan kepada rakyat Palestin, khususnya di Gaza, selaras dengan Resolusi 1860, Majlis Keselamatan Pertubuhan Bangsa-Bangsa Bersatu;
 - (11) Mengalu-alukan tindakan negara Mesir membuka Sempadan Rafah tanpa syarat bagi memastikan bantuan kemanusiaan dapat disalurkan tanpa sebarang halangan;
 - (12) Merayu kepada masyarakat antarabangsa supaya terus menghulurkan bantuan kemanusiaan kepada penduduk Wilayah Palestin di Gaza tanpa menghiraukan dan gentar kepada ancaman Rejim Zionis;
 - (13) Merakamkan penghargaan kepada negara-negara Jordan, Turki, Ireland, Filipina dan juga negara-negara lain yang terlibat dalam usaha-usaha membebaskan rakyat Malaysia yang telah ditahan oleh Rejim Zionis;
 - (14) Menyeru rakyat Palestin supaya bersatu dengan tujuan mempertahankan hak mutlak mereka bagi menubuhkan negara Palestin yang bebas, merdeka dan berdaulat; dan
 - (15) Menzahirkan sokongan padu rakyat Malaysia kepada perjuangan rakyat Palestin ke arah pembentukan negara yang bebas, merdeka dan berdaulat.

■1150

Sehubungan itu, saya ingin mengucapkan ribuan terima kasih kepada Tuan Yang di-Pertua kerana membenarkan Dewan yang mulia ini membahaskan isu serangan kejam oleh tentera Rejim Zionis Israel ke atas konvoi kapal Freedom Flotilla yang membawa bantuan kemanusiaan ke Gaza.

Tuan Yang di-Pertua, Malaysia mengecam tindakan kejam tentera Rejim Zionis Israel [*Tepuk*] di bawah kerajaan pimpinan Perdana Menteri Benjamin Netanyahu yang telah bertindak menyerang konvoi bantuan kemanusiaan Freedom Flotilla di kawasan perairan antarabangsa pada 31 Mei 2010 yang lepas.

Malaysia dengan ini mengutuk sekeras-kerasnya tindakan melampau dan biadab [*Tepuk*] Rejim Zionis yang bukan sahaja melanggar norma-norma perundangan antarabangsa tetapi juga tata kelakuan bertamadun. Serangan subuh oleh tentera Rejim Zionis Israel ini ternyata telah mencabul prinsip kebebasan perairan antarabangsa, kerana faktanya tindakan ala “kelanun” terhadap Freedom Flotilla ini dilakukan 65 kilometer dari persisiran pantai Gaza iaitu di luar dari perairan Wilayah Israel.

Perbuatan durjana ini telah mengakibatkan kehilangan sembilan nyawa dan puluhan kecederaan kepada mereka yang sedang menjalankan misi mulia membawa bantuan kemanusiaan kepada ribuan rakyat Gaza. Tidak cukup dengan itu, anggota konvoi ini juga telah diculik dan diperlakukan seperti penjenayah.

Mereka diikat berbelas jam tanpa memberikan hak tanpa sewajarnya seperti makanan, minuman, bersolat dan keperluan ke bilik air. Bagi Malaysia tiada sebarang alasan untuk mereka bertindak sedemikian terhadap misi yang merentas kepercayaan agama, sempadan bangsa dan fahaman politik.

Tuan Yang di-Pertua, serangan tidak berperikemanusiaan ini telah memperlihatkan sekali lagi kepada masyarakat antarabangsa kekejaman tentera Rejim Zionis yang tidak menghormati kesucian nyawa manusia dan membelakangkan undang-undang antarabangsa. Mereka tanpa rasa bersalah menggunakan kekerasan semasa menawan kapal Mavi Marmara kepunyaan Turki. Seperti dilaporkan sembilan orang yang terkorban itu telah ditembak dari jarak dekat dan apa yang lebih menyayat hati, ada yang ditembak secara curi dari arah belakang. Ini mempamerkan sikap pengecut yang tidak dapat dimaafkan.

Untuk makluman sidang Dewan yang mulia ini semalam saya berpeluang mendengar sendiri daripada mulut 12 orang rakyat Malaysia yang terlibat akan detik-detik cemas dilalui oleh mereka semasa serangan sedang berlangsung. Saya telah dimaklumkan bahawa mereka telah turut didera secara mental semasa dalam tahanan. Dalam hal ini kerajaan berasa bangga walaupun Malaysia sederhana dari segi saiz, namun terbukti kita tidak sekali-kali berjiwa kerdil bahkan memiliki semangat kental yang menggunung lagi membumbung di medan juang. *[Tepuk]*

Sesungguhnya kerajaan telah mengambil segala tindakan yang wajar dan perlu bagi memungkinkan kebebasan para sukarelawan negara termasuk dengan menghantar Yang Berhormat Dato' Seri Anifah Aman, Menteri Luar ke Jordan. Tahniah kepada Kementerian Luar Negara. *[Tepuk]* Lantaran itu saya bagi pihak kerajaan dan seluruh rakyat Malaysia ingin menegaskan bahawa kumpulan 12 ini bukanlah penjenayah mahupun penceroboh sebaliknya mereka adalah wira-wira Malaysia. *[Tepuk]* Sesungguhnya keberanian kumpulan 12 ini yang sanggup menghadapi bahaya muncung senjata demi matlamat dan prinsip yang tulus murni akan suatu hari nanti tersepuh dengan tinta emas dalam susul galur sejarah negara. Hakikatnya kita mengiktiraf mereka semua sebagai pejuang kebebasan sejati yang amat dibanggakan.

Tuan Yang di-Pertua, kita tahu benar sekiranya perbuatan yang sama dilakukan oleh negara lain, nescaya negara tersebut akan dikenakan pelbagai tindakan tegas oleh Majlis Keselamatan Pertubuhan Bangsa-bangsa Bersatu. Ini jelas membuktikan betapa Majlis Keselamatan Pertubuhan Bangsa-Bangsa Bersatu bersikap berat sebelah dalam melaksanakan amanah yang telah diberikan kepada mereka.

Sungguhpun begitu Malaysia mengalu-alukan tindakan Majlis Keselamatan Pertubuhan Bangsa-Bangsa Bersatu mengadakan sidang tergepar pada 31 Mei yang lalu bagi membincangkan serangan tentera Rejim Zionis ke atas konvoi kapal yang membawa bantuan kemanusiaan kepada penduduk Palestin di Gaza. Nyatalah sejak enam dekad yang lalu Rejim Zionis telah terus-menerus menzalimi rakyat Palestin. Walaupun pelbagai resolusi telah diluluskan oleh Majlis Keselamatan Pertubuhan Bangsa-Bangsa Bersatu tetapi semuanya tidak dihiraukan oleh pihak Israel. Perbuatan "Beraja di mata dan beraja di hati" ini berlaku kerana samseng dunia Israel berasa mereka dilindungi oleh satu-satunya kuasa besar dunia.

Sehubungan dengan itu, Malaysia ingin mendesak Amerika Syarikat untuk tampil tanpa sebarang dolak-dalik menunaikan tanggungjawab moral dalam memastikan rejim tersebut mematuhi tata kelakuan negara bangsa yang bertanggungjawab dan bertamadun. Ketahuilah bahawa piawai moral dan etika

sebuah negara bangsa tidak boleh berbeza dengan piawai yang dikenakan kepada individu. Tambahan lagi kepentingan nasional sesebuah negara bangsa tidak boleh mengatasi piawai asas kemanusiaan hanya kerana mereka mempunyai kekuasaan. Pegangan bahawa siapa kuat dialah kudrat sudah tidak boleh dipakai lagi. Dalam kata lain tidak ada bezanya keganasan kumpulan dan individu berbanding keganasan yang dilakukan negara bangsa ia tetap keganasan yang perlu di pertanggungjawaban serta diadili.

Tuan Yang di-Pertua, jika kebenaran berpunca dari muncung senjata bukannya dari kebenaran undang-undang prinsip moral universal maka keamanan dunia akan sentiasa berada di hujung tanduk. Bukankah sejarah sudah cukup mengajar kita bahawa peperangan dunia pertama dan kedua mengorbankan nyawa bukan sedikit jumlahnya dan mengakibatkan kemusnahan yang bukan enteng adalah berpunca daripada kekuatan daripada muncung senapang. Dunia telah tidak boleh menggunakan rasisme yang berteraskan prinsip bahawa adalah ada bangsa yang lebih mulia dari bangsa yang lain menjadi satu pegangan di dunia ini. Bukankah dunia telah membayar harga yang mahal untuk menewaskan Nazisme dan Fascisme. Makanya selagi sokongan Amerika Syarikat kepada Regim Zionis Israel bersifat menyeluruh bukannya bersyarat kepada pematuhan nilai-nilai kemanusiaan yang universal selagi itu keangkuhan rejim ini tidak akan ada kesudahannya.

Tuan Yang di-Pertua, dalam pada Malaysia kecewa di atas kegagalan masyarakat antarabangsa mengambil tindakan keras yang sewajarnya terhadap Regim Zionis Israel, Malaysia akan tetap berusaha bersungguh-sungguh untuk memperjuangkan nasib rakyat Palestin yang sedang menderita. Perjuangan ini tidak akan tamat sehingga sebuah negara Palestin yang merdeka, berdaulat dan sendiri ekonomi dapat dibangunkan. Saya sendiri baru-baru ini telah menyuarakan komitmen serta pendirian Malaysia ini kepada Tuan Yang Terutama Presiden Negara Palestin Mahmoud Abbas semasa lawatan beliau ke Malaysia.

Malaysia akan terus mendesak Majlis Keselamatan Pertubuhan Bangsa-Bangsa Bersatu untuk mencela tindakan ganas Israel dan supaya pemimpin-pemimpin Regim Zionis yang bertanggungjawab dihadapakan ke Mahkamah Jenayah Antarabangsa. Malaysia juga akan menggesa negara-negara sependapat untuk mengemukakan usul kepada Perhimpunan Agung Bangsa-bangsa Bersatu bagi mendapatkan *advisory opinion* dari Mahkamah Keadilan Antarabangsa.

■1200

Tuan Yang di-Pertua, Malaysia juga akan mendesak supaya rejim Israel membayar ganti rugi serta pampasan ke atas semua harta benda, bahan makanan, alat-alat binaan dan perubatan termasuk kapal-kapal yang telah ditawan serta semua barangan persendirian ahli konvoi yang telah dirampas secara haram oleh tentera Regim Zionis. Di samping itu Malaysia juga mendesak agar Israel membayar ganti rugi akibat dari kesan trauma secara psikologi, mental dan fizikal serta apa-apa pampasan yang difikirkan layak oleh mahkamah antarabangsa.

Malaysia juga berasa amat sedih dan kesal akan situasi kemanusiaan yang meruncing yang sedang berlaku di Gaza akibat kepungan Regim Zionis. Sekatan dan kepungan kejam Regim Zionis ini telah mengakibatkan kesukaran untuk mendapatkan bekalan makanan, perubatan, bahan mentah serta minyak bagi keperluan kehidupan harian masyarakat Palestin di Gaza.

Tuan Yang di-Pertua, mutakhir semalam perkembangan terbaru kita mendapat berita tentang usaha-usaha Pertubuhan Bangsa-Bangsa Bersatu untuk menubuhkan suruhanjaya siasatan bebas berkaitan isu ini. Suka saya nyatakan

Malaysia menyokong sebarang cadangan untuk menubuhkan Suruhanjaya Penyiasatan Antarabangsa yang bebas, adil dan berkecuali bagi menyiasat insiden yang telah berlaku. Malaysia tiada masalah menyokong pelantikan Sir Geoffrey Palmer mantan Perdana Menteri New Zealand diamanahkan untuk mengetuai penyiasatan antarabangsa ini.

Tuan Yang di-Pertua, *alhamdulillah* di atas segala-galanya, kita memanjatkan kesyukuran ke hadrat Ilahi kerana rakyat Malaysia yang ditahan oleh Rejim Zionis telah berjaya diselamatkan dan dibawa pulang ke tanah air. Kejayaan ini tidak akan dicapai tanpa bantuan dan pertolongan negara-negara sahabat. Dalam hal ini Malaysia ingin merakamkan setinggi-tinggi penghargaan kepada kerajaan Jordan, Turki, Ireland dan juga Filipina dan juga negara-negara lain yang bersedia menghulurkan bantuan dalam usaha membebaskan rakyat Malaysia yang telah ditahan oleh Rejim Zionis.

Begitulah kita juga berbangga dengan semangat waja enam lagi wira Malaysia yang berlayar dengan kapal Rachel Corrie kerana dicelah-celah ketidaktentuan suasana telah memilih untuk mara ke hadapan sekalipun mengetahui risiko yang bakal ditempuhi. Syukurlah tiada sebarang perkara yang tidak diingini berlaku. Setakat hari ini kita mendapat maklum bahawa usaha-usaha membawa mereka kembali sedang diatur dan disusun. Didoa agar semuanya berada dalam keadaan selamat sehingga pulang ke Malaysia nanti.

Tuan Yang di-Pertua, dunia terus menyaksikan pelbagai gelagat dan tindakan zalim yang telah dilakukan oleh Rejim Zionis Israel termasuk insiden terbaru ini. Perlu saya gariskan, kezaliman seumpama ini akan berterusan dan mungkin tiada noktahnya sekiranya masyarakat dunia terus berpeluk tubuh membisu dan berdiam diri. Tindakan ini akan hanya membuatkan Rejim Zionis Israel terus bersikap angkuh dan ghairah dan bermaharajalela melakukan keganasan tanpa had dan batasan sehingga rakyat Palestin kian terbelenggu mencari sinar kedamaian. Harus juga dinyatakan kepada semua Ahli Yang Berhormat, bahawa tanggungjawab untuk menghentikan penindasan yang berlarutan di Palestin selama ini adalah tanggungjawab kita bersama, perlu ditangani di mana keamanan boleh dicapai sekiranya wujud keikhlasan.

Namun kita menyedari bahawa tidak semua orang Yahudi menyokong dan bersekongkol dengan Rejim Zionis Israel. Ramai orang Yahudi juga yang cintakan keamanan, yang mahukan keadilan diberi pada bangsa Palestin. Jelaslah situasi yang menimpa rakyat Palestin khususnya di Gaza, bukan sahaja penindasan terhadap umat Islam tetapi sesuatu yang melangkaui kepercayaan agama, melibatkan hak asasi, keadilan dan kemanusiaan. Bersama-samalah kita memanjatkan doa kepada Yang Maha Esa agar bencana kemanusiaan yang menimpa rakyat Palestin ini dapat dihentikan dengan serta-merta. Tuan Yang di-Pertua, saya mohon mencadangkan. *[Tepuk]*

Tuan Yang di-Pertua: Sila Yang Berhormat.

12.04 tgh.

Timbalan Perdana Menteri [Tan Sri Dato' Haji Muhyiddin bin Haji Mohd. Yassin]: Tuan Yang di-Pertua. Saya berdiri untuk menyokong usul yang dibentangkan oleh Yang Amat Berhormat Perdana Menteri sebentar tadi. Sesungguhnya usul tersebut telah pun memberikan gambaran yang sangat jelas tentang pendirian seluruh rakyat Malaysia tanpa mengira agama, bangsa dan fahaman politik mengenai serangan tidak berperikemanusiaan oleh tentera Rejim Zionis Israel ke atas konvoi kapal Freedom Flotilla yang membawa misi bantuan kemanusiaan ke Gaza.

Marilah kita mengetepikan perbezaan politik dan merapatkan saf untuk bersama-sama bersatu di bawah kepimpinan Yang Amat Berhormat Perdana Menteri dalam menzahirkan kecaman dan celaan sekeras-kerasnya terhadap tindakan melampau tentera Rejim Zionis Israel menyerang dan membunuh sukarelawan tidak bersenjata di perairan antarabangsa.

Sesungguhnya peristiwa malang ini meninggalkan satu lagi titik hitam dalam sejarah kemanusiaan sejagat. Demi menyatakan kecaman kita yang sekeras-kerasnya, terhadap keganasan dan kezaliman tentera Rejim Zionis Israel yang secara jelas mencabuli Undang-undang Hak Asasi Manusia, Undang-undang Kemanusiaan Antarabangsa dan Piagam Pertubuhan Bangsa-bangsa Bersatu. Marilah kita bersatu hati dan berpadu suara menyertai masyarakat antarabangsa menggesa supaya satu siasatan yang berakuntabiliti dan bebas sepenuhnya dibuat dengan segera dan pemimpin-pemimpin Rejim Zionis Israel yang bertanggungjawab dalam serangan ini dihadapkan ke Mahkamah Jenayah Antarabangsa.

Kita juga mendesak seperti Rejim Zionis Israel segera membuka laluan kepada misi bantuan kemanusiaan ke Gaza menghentikan kepungan haram ke atas Gaza dan berundur secara menyeluruh dari wilayah yang diduduki. Tuan Yang di-Pertua, daripada usul yang dibentangkan oleh Yang Amat Berhormat Perdana Menteri sebentar tadi, jelas kepada kita bahawa Rejim Zionis Israel semakin angkuh dan kebal dengan kuasa kekerasan ataupun dengan izin *repressive power* yang mereka miliki.

Tindakan Rejim Zionis Israel yang melampau zalim lagi kejam sejak daripada awal pendudukan haram mereka di bumi Palestin telah pun menyebabkan kehilangan nyawa termasuk puluhan ribu wanita, kanak-kanak dan warga tua yang tidak berdosa. Tragedi kemanusiaan yang melanda bumi Palestin ini membayangkan seolah-olah Rejim Zionis Israel sentiasa kebal daripada penguatkuasaan undang-undang antarabangsa, *the long arms of the law* dengan izin. Bagaikan tidak berupaya untuk menghalang tentera rejim Israel daripada menguatkuasakan undang-undang rimba Zionis yang tidak mengenal erti perikemanusiaan ini.

Lebih mendukacitakan kita Tuan Yang di-Pertua, Majlis Keselamatan Pertubuhan Bangsa-bangsa Bersatu juga telah gagal untuk mengambil tindakan tegas terhadap rejim Israel di atas segala kekejaman, kezaliman dan kejahatan yang dilakukan terhadap rakyat Palestin selama ini. Malah kenyataan lemah Majlis Keselamatan Pertubuhan Bangsa-bangsa Bersatu mengenai serangan ke atas kapal Mavi Marmara yang membawa misi bantuan kemanusiaan ke Gaza tidak membayangkan institusi penting PBB untuk mencela tindakan biadab Rejim Zionis Israel apatah lagi untuk menamatkan jenayah kemanusiaan yang paling meruncing pada abad ini yang dialami oleh penduduk Gaza.

Tuan Yang di-Pertua, pada tanggal 12 Januari 2009, Dewan yang mulia ini telah pun meluluskan satu usul yang mengutuk sekeras-kerasnya tindakan ganas tentera Rejim Zionis Israel menyerang Gaza. Serangan selama tiga minggu dalam musim sejuk di penghujung tahun 2008, dan awal tahun 2009 itu telah pun menyebabkan lebih 1,400 orang penduduk Gaza terkorban. Puluhan ribu rumah musnah, 15 buah hospital ranap, 50,000 orang kehilangan tempat tinggal, 500,000 yang lain terputus bekalan air bersih dan 1.5 juta penduduk Gaza menghadapi krisis kekurangan bekalan makanan yang amat serius.

Menurut laporan Kumpulan Misi Pencarian Fakta Majlis Hak Asasi Manusia, Pertubuhan Bangsa-Bangsa Bersatu yang diketuai oleh Hakim Richard Goldstone dari Afrika Selatan, serangan dan kepungan ke atas Gaza ini adalah satu bentuk jenayah perang dan jenayah terhadap kemanusiaan sejagat yang amat serius. Seraya memperakukan agar pemimpin Rejim Zionis Israel yang bertanggungjawab dihadapkan ke mahkamah jenayah antarabangsa.

Namun begitu, laporan Goldstone ini yang disokong oleh kebanyakan negara Asia dan Timur Tengah telah pun dikecam hebat oleh rejim Israel dan para sekutunya yang mendakwa konon ia berat sebelah. Lebih mengecewakan lagi, tanpa mengendahkan desakan dan kecaman hebat masyarakat antarabangsa, Rejim Zionis Israel terus meningkatkan sekatan dan kepungan ke atas Gaza dan sekali gus menambah kepiluan dan kesengsaraan penduduk Gaza.

Apa yang menyusul daripada tindakan kejam ini Tuan Yang di-Pertua, ialah satu tragedi kemanusiaan yang semakin parah. Pada bulan Januari 2010, Pertubuhan Kesihatan Dunia (*World Health Organization*), dengan izin telah melaporkan bahawa Gaza sedang pun menghadapi krisis kesihatan yang meruncing ekoran masalah kekurangan bekalan air bersih, ketiadaan bahan binaan yang mencukupi dan kemiskinan tegar yang membelenggu penduduk Gaza akibat kepungan zalim Rejim Zionis Israel.

Dengan izin saya ingin memetik laporan ini yang menyebut, *"The economy of Gaza is in virtual collapse with rising unemployment and poverty which will have long term adverse effects on the physical and mental health of the population"*. Menurut laporan ini, 41.5% daripada tenaga kerja Gaza menganggur dan 70% keluarga hidup dengan pendapatan kurang USD1 sehari. Pada bulan Februari tahun ini Tuan Yang di-Pertua, sepucuk surat yang dihantar kepada Presiden Barrack Obama oleh *Foundation for Middle East Peace, American for Peace Now, Arab-American Institute, Churches for Middle East Peace, B'Tselem* dan *Rabbis for Human Rights – North America* menyenaraikan beberapa fakta mengenai situasi yang amat membimbangkan di Gaza. Antaranya:

- (i) hanya 128 buah trak membawa masuk makanan, barangan dan bahan api ke Gaza setiap hari berbanding 850 buah trak sebelum kepungan;
- (ii) sebelum tahun 2007, 70 buah trak sehari membawa eksport dari Gaza ke Israel dan Tebing Barat yang bernilai lebih USD330 million atau 10.8% daripada keluaran negara kasar Gaza. Kini, industri pembuatan dan bahan eksport pertanian Gaza terencat sepenuhnya;
- (iii) 11% kanak-kanak Gaza menghadapi masalah kekurangan zat akibat kemiskinan dan kekurangan import bahan makanan;
- (iv) 281 daripada 641 buah sekolah musnah akibat perang. Daripada jumlah ini, hanya beberapa buah sahaja yang dapat dibina semula sementara ribuan murid tidak mempunyai bekalan buku yang mencukupi; dan
- (v) keengganan Rejim Zionis Israel membenarkan import simen telah menyebabkan ribuan rumah yang musnah akibat perang gagal dibina semula dan mengakibatkan puluhan ribu keluarga tinggal di dalam khemah ataupun struktur sementara yang serba kekurangan.

Kualiti perkhidmatan kesihatan pula semakin merosot. Import ubat-ubatan tergendala dan ramai penduduk Gaza menemui ajal ketika sedang menunggu rawatan dan akhirnya dokumen ini juga menyatakan bahawa kekurangan bekalan air bersih dan sistem pembetungan yang teratur akan menyebabkan bencana kesihatan yang serius di Gaza.

Apa yang saya sebutkan ini Tuan Yang di-Pertua, hanyalah secebis daripada siri tragedi kemanusiaan yang menyayat hati yang sedang pun melanda bumi Gaza. Tatkala penduduk Gaza sedang menderita menahan sengsara, Rejim Zionis Israel terus-menerus membelakangi gesaan dan desakan masyarakat antarabangsa supaya mereka menghentikan kepungan ke atas Gaza dan membenarkan misi bantuan kemanusiaan memasuki wilayah itu. Sebaliknya tentera Rejim Zionis bertindak biadab dan melampau dengan menyerang dan membunuh sukarelawan antarabangsa. Serangan dan pembunuhan sukarelawan antarabangsa di atas kapal Mavi Marmara ini adalah puncak keangkuhan dan kejahatan Rejim Zionis Israel yang tidak boleh dimaafkan. Tidak cukup dengan kezaliman yang telah dilakukan terhadap rakyat Palestin, mereka ini semakin angkuh dan bebal melakukan pembunuhan dan penjarahan terhadap aktivis antarabangsa pula.

Tuan Yang di-Pertua, selagi mana institusi antarabangsa seperti Majlis Keselamatan Pertubuhan Bangsa-Bangsa Bersatu gagal untuk mengambil tindakan tegas terhadap kekejaman dan kezaliman Rejim Zionis Israel, selagi itulah rakyat Palestin akan mengganggu sengsara dan saya percaya selagi itulah juga masyarakat antarabangsa yang prihatin akan bertindak dengan lebih berani untuk memecah tembok kepungan rejim Israel itu.

Ketika kita sedang bersidang pada pagi ini Tuan Yang di-Pertua, Rejim Zionis Israel terus-menerus menghalang kemasukan misi bantuan kemanusiaan ke Gaza. Terbaru, kapal *Rachel Corrie* yang turut dinaiki sekumpulan sukarelawan Malaysia termasuk Yang Berhormat dari Parit [*Tepuk*] dihalang untuk memasuki Gaza dan barangan yang dibawa dirampas secara haram. Kita bersyukur kerana semua anggota konvoi ini tidak mengalami sebarang kecederaan dan telah pun dibebaskan dengan selamatnya. Mereka dijangka tiba ke tanah air kita, *insya-Allah* pada malam ini.

Namun begitu, kita mendesak Rejim Zionis Israel supaya membayar ganti rugi serta pampasan ke atas semua harta benda, bahan makanan, alat-alat binaan, perubatan dan kapal yang telah pun dirampas. Kita sesungguhnya tidak mahu tragedi Mavi Marmara tidak berulang lagi. Kita juga tidak mahu rakyat Palestin terus-menerus menanggung derita akibat kekejaman melampau Rejim Zionis Israel. Dengan itu saya menyokong penuh usul yang dibawa oleh Yang Amat Berhormat Perdana Menteri sebentar tadi.

Saya juga merafakkan rasa syukur yang tidak terhingga ke hadrat Allah SWT kerana semua sukarelawan Malaysia yang turut berada di atas kapal Mavi Marmara ketika serangan dilakukan tentera rejim Israel telah pun selamat tiba di tanah air, *alhamdulillah*.

Para wira negara kita ini perlu diberikan penghargaan, penghormatan dan pengiktirafan yang sewajarnya setimpal dengan keberanian mereka menghadapi risiko berdepan dengan kekejaman tentera Zionis yang biadab dan juga ke atas komitmen mereka yang tinggi kepada keamanan sejagat. Semoga peristiwa hitam ini tidak akan sekali-kali mematahkan semangat para wira kita untuk meneruskan misi membantu saudara-saudara kita di Gaza yang amat memerlukan bantuan masyarakat antarabangsa.

Tuan Yang di-Pertua, marilah kita sama-sama memanjatkan doa ke hadrat Yang Maha Esa agar memberikan pertolongan dan kekuatan kepada saudara-saudara kita yang tertindas dan teraniaya di Gaza, di Tebing Barat dan di mana sahaja mereka berada. Marilah kita berdoa agar tragedi kemanusiaan yang menyayat hati ini akan segera berakhir dan mereka yang bertanggungjawab diheret ke muka pengadilan.

Tuan Yang di-Pertua, saya mohon menyokong. *[Tepuk]*

Tuan Yang di-Pertua: Terima kasih.

Dato' Seri Anwar Ibrahim [Permatang Pauh]: *[Bangun]*

Tuan Yang di-Pertua: Okey, sila. Belum lagi.

Dato' Seri Anwar Ibrahim [Permatang Pauh]: *[Bangun]*

Tuan Yang di-Pertua: Belum lagi Yang Berhormat Permatang Pauh. Belum lagi.

Dato' Seri Anwar Ibrahim [Permatang Pauh]: Belum?

Tuan Yang di-Pertua: Nanti saya panggil kemudian. Silakan Menteri baca usul dahulu.

■ 1220

USUL

WAKTU MESYUARAT DAN URUSAN DIBEBAHKAN DARIPADA PERATURAN MESYUARAT

Menteri di Jabatan Perdana Menteri [Dato' Seri Mohamed Nazri bin Abdul Aziz]: Tuan Yang di-Pertua, saya mohon mencadangkan:

“Bahawa mengikut Peraturan Mesyuarat 12(1), Majlis Mesyuarat pada hari ini tidak akan ditangguhkan sehingga selesai diputuskan Usul Yang Amat Berhormat Perdana Menteri di nombor satu dalam Aturan Urusan Mesyuarat hari ini dan sehingga selesai Ucapan-ucapan Penangguhan dan selepas itu Majlis Mesyuarat akan ditangguhkan sehingga jam 10 pagi, hari Selasa, 8 Jun 2010”.

Menteri Dalam Negeri [Dato' Seri Hishammuddin bin Tun Hussein]: Tuan Yang di-Pertua, saya mohon menyokong.

Tuan Yang di-Pertua: Ahli-ahli Yang Berhormat, sekarang saya kemukakan masalah kepada Majlis untuk diputuskan. Masalahnya ialah usul seperti yang dikemukakan tadi hendaklah disetujukan.

Usul dikemuka bagi diputuskan; dan disetujukan.

Tuan Yang di-Pertua: Ahli-ahli Yang Berhormat masalah usul yang dibentangkan oleh Yang Amat Berhormat Perdana Menteri tadi itu terbuka untuk dibahas. Akan tetapi sebelum saya memanggil senarai nama-nama yang

membahas usul ini, sukacita saya memaklumkan bahawa saya menggunakan kuasa di bawah Peraturan Mesyuarat 35(7) iaitu untuk mengehendkan masa dan bilangan Ahli-ahli Yang Berhormat yang berucap. Saya sedar bahawa isu ini penting dan banyak yang hendak kita semua perkatkan atau hujahkan.

Akan tetapi masa tidak mengizinkan. Jadi saya telah minta daripada awal tadi persetujuan daripada Barisan Nasional. Jadi saya telah difahamkan bahawa sebelas yang akan bercakap. Saya sebut nama-nama ini dan nama-nama ini pun mewakili parti masing-masing. Jadi saya harap pada pihak pembangkang, begitu juga. Nama yang dikemukakan nanti daripada wakil parti, iaitu daripada MCA – Yang Berhormat daripada Bentong, MIC – Yang Berhormat Segamat, GERAKAN – Yang Berhormat Simpang Renggam, PBB – Yang Berhormat Betong ia diganti oleh Yang Berhormat Tuan Haji Fadillah bin Yusof daripada Petra Jaya. Daripada PBS – Yang Berhormat Datuk Seri Joseph Pairin Kitingan, SUBP – Yang Berhormat Miri, UPKO – Yang Berhormat Putatan, PRS – Yang Berhormat Selangau, SPDP – Yang Berhormat Bintulu, LDP – Yang Berhormat Sandakan dan PBRS – Yang Berhormat Pensiangan.

Jadi saya juga telah tetapkan bahawa setiap pembahas itu cuma dibenarkan sepuluh minit dan bagi Ketua Pembangkang, Yang Berhormat Permatang Pauh saya benarkan 15 minit. Jadi wakil-wakil yang lain sepuluh minit, jadi untuk kumpulan Bebas lebih kurang lapan orang. Pilih mana satu yang kamu mahu untuk mewakili [*Dewan riuh*] kumpulan itu [*Dewan riuh*] Yang Berhormat Pasir Mas awal-awal telah mendaftarkan nama untuk bahas dan terpulang kepada Bebas siapa wakil yang mereka pilih.

Sekarang saya persilakan Yang Berhormat Permatang Pauh, 15 minit, silakan.

12.23 tgh.

Dato' Seri Anwar Ibrahim [Permatang Pauh]: Tuan Yang di-Pertua, terima kasih. Saya menyambut baik langkah inisiatif Yang Amat Berhormat Perdana Menteri mengemukakan usul dan usul ini kita anggap menyeluruh dan tegas. Walaupun beberapa reaksi awal itu agak terlambat. Akan tetapi usul ini sekurang-kurangnya pada keseluruhannya memenuhi hasrat rakyat yang mahu tindakan yang tegas dan kenyataan yang tegas.

[Timbalan Yang di-Pertua (Datuk Dr. Wan Junaidi bin Tuanku Jaafar) **mempengerusikan Mesyuarat**]

Tuan Yang di-Pertua, kita memerhati usul ini dan saya ingin mengucapkan terima kasih. Walau bagaimanapun ada beberapa cadangan untuk memperketat isu Palestin ini, isu *disposition*. Isu hak wilayah dan tanah yang dirampas secara haram. Oleh demikian sementara flotila itu menjadi mauduk perbahasan awal, saya perhatikan usul ini menyentuh isu Palestin secara menyeluruh termasuk tuntutan kepada Majlis Keselamatan Bangsa-Bangsa Bersatu (PBB) dan juga tuntutan supaya Israel dihadapkan ke Mahkamah Jenayah Antarabangsa.

Ini penting kerana kita tidak mahu juga masyarakat Malaysia dan antarabangsa terkeliru. Misi kemanusiaan ini kalau diberi laluan bukan penyelesaian. Ini hanya satu daripada permasalahan yang dibangkitkan. Ini saya akui tertera dalam usul yang dibentangkan oleh Yang Amat Berhormat Perdana Menteri. Isu ini juga tidak menyentuh hanya Gaza, kerana Gaza ini *open air prison*. Penyelesaian masalah Gaza bukan penyelesaian menyeluruh dan mutlak masalah Palestin. Oleh sebab itu, usul ini juga menyentuh penyelesaian masalah Palestin

dan juga menyangkut kedudukan Tebing Barat dan penyelesaian untuk mengembalikan wilayah yang dirampas setelah 1997.

Kedua, merujuk Israel ke Mahkamah Jenayah Antarabangsa. Selama ini tidak ada negara kerana mengikut *Statute Rome*, memerlukan usul negara. Perdana Menteri mengusulkan agar Turki menimbangkan. Dalam kes dan perkembangan mutakhir, negara Turki di bawah pimpinan Recep Tayyip Erdogan sebagai Perdana Menteri muncul sebagai salah satu tokoh yang paling tegas dan berani menghadapi masalah Israel. [Tepuk]

Saya mengusulkan kepada Perdana Menteri supaya bekerjasama dan tidak hanya menyerahkan kepada Turki. Malaysia bersama-sama mengambil tindakan di bawah peruntukan *Statute Rome* mengemukakan usul bersama Turki menghadapi Israel ke Mahkamah Jenayah Antarabangsa. [Tepuk] Berikutnya, usul ini dalam menyentuh soal demokrasi dan kebebasan rakyat Palestin. Di antara puncanya permasalahan berbangkit dalam perkembangan terbaru ialah keengganan masyarakat antarabangsa menerima keputusan rakyat Palestin, manakala diadakan pilihan raya yang bebas dan adil.

Pada Januari 2006, pilihan raya bebas dan adil di Palestin mengangkat Hamas sebagai parti yang memenangi pilihan raya. Israel enggan mengiktiraf. Manakala Israel enggan mengiktiraf, Amerika Syarikat mendesak membatalkan pengiktirafan itu. Oleh sebab itu saya mahu Perdana Menteri mengkaji semula agar Malaysia tidak dilihat hanya sebagai tunduk kepada kehendak Amerika Syarikat dan Israel dan dengan itu mengiktiraf kuasa Hamas sekurang-kurangnya di Gaza. [Tepuk]

Jika tidak, kita bicara soal kebebasan dan keadilan. Kita melahirkan rasa kesal mengutuk Rejim Zionis Israel akan tetapi kita masih berikan keterbatasan, kebimbangan kerana tidak bersedia mengatakan satu sikap yang tegas. Ada masalah iaitu isu berbangkit dengan Hamas atau dasar yang kita tidak persetujui, boleh kita kemukakan kepada Hamas. Akan tetapi untuk menafikan suara majoriti rakyat Palestin, mengangkat pimpinan dan parti yang mereka kehendaki semata-mata kerana takut dengan tekanan politik antarabangsa khususnya Amerika Syarikat, tidak akan meletakkan Malaysia sebagai negara yang bebas, merdeka dan berani dalam memutuskan dasar luar.

Seperkara yang lain, yang ingin saya menyentuh ialah ketegasan usul ini mengutuk Rejim Zionis, memarahi sikap Benjamin Netanyahu, Perdana Menteri Israel yang dianggap sosok yang paling keras di Israel sekarang ini. Tekanan terhadap PBB, Majlis Keselamatan yang mengeluarkan ketetapan yang sangat lemah. Mengapakah PBB dan Majlis Keselamatan memutuskan satu usul yang lemah? Jawapannya kerana dukungan Amerika Syarikat. Oleh sebab itu, saya minta supaya Perdana Menteri dalam usul ini secara spesifik dan tegas, Israel tidak mungkin mengepung Gaza, sehingga hari ini.

Israel tidak mungkin mempunyai kekuatan untuk menyerang flotila dan misi keamanan tanpa dokongan pentadbiran Amerika Syarikat.

■1230

Oleh yang demikian, usul dari Parlimen haruslah melahirkan sikap kita menuntut supaya Amerika Syarikat lebih tegas menghalang Zionis Israel daripada terus melakukan kezaliman, kekejaman, dan keganasan ke atas rakyat Palestin. Oleh yang demikian, saya mengusulkan secara spesifik supaya dimasukkan satu para kecil tambahan, supaya luahan hati rakyat Malaysia didengar oleh Presiden Barack Obama di Washington D.C. Kalau tidak, kita hanya keras mengutuk Zionis

Israel. Tidak perlu kita imbau sikap semula, sejarah satu per satu kekejaman, sejak *Balfour Agreement* sehinggalah serangan kepada misi keamanan.

Malah dalam rumusan bahagian akhir ucapan Perdana Menteri ada menyinggung tentang peranan kuasa besar, tetapi ternyata tidak sama sekali tercatat dalam usul, dan saya percaya Menteri Luar pun ada, tidak ada masalah dengan dasar luar negara kita supaya memasukkan satu peruntukan yang jelas, kerana tidak perlu kita nafikan kenyataan. Israel negara kecil mempunyai kekuatan di rantau itu tetapi Israel tidak mampu rakus, ganas dan zalim sebegitu rupa tanpa dukungan Amerika Syarikat. Sebab itu kenyataan mesti tegas, kenyataan kita harus jelas, tidak menutup dan melindungi sesiapa.

Ini kerana sudah sampai disebut oleh Perdana Menteri kisah 60 tahun, sebenarnya sejarahnya lebih awal daripada itu yang menyebabkan kebongkakan dan keangkuhan negara Israel. Saya ulangi, keperluan masukkan satu kenyataan selain dari perkara nombor (7) tadi, supaya Malaysia dan Turki bersama-sama mengambil tindakan di bawah peruntukan *Statute Rome*, Mahkamah Jenayah Antarabangsa.

Kedua, soal pengiktirafan kepada sesiapa sahaja yang dipilih oleh rakyat Palestin. Kalau mereka pilih Hamas, maka Hamas lah yang kita iktiraf dan jangan kita pinggirkan mereka seperti mana yang kita lakukan sekarang.

Ketiga, kenyataan yang jelas dan tegas mendesak Amerika Syarikat supaya tidak melindungi kegiatan jenayah, keganasan Israel terhadap rakyat Palestin.

Tuan Yang di-Pertua, oleh kerana ramai rakan yang ingin mengambil bahagian, saya akhiri dengan menyatakan penghargaan kepada inisiatif yang telah diambil, simpati kepada keluarga yang menjadi mangsa, bukan sahaja daripada Malaysia tetapi di seluruh dunia termasuk yang ditembak di kalangan rakyat Turki. Saya ada mengalu-alukan juga semangat yang ditunjukkan untuk memberikan penghargaan kepada rakan-rakan kita yang sanggup berjuang untuk menyampaikan bantuan kepada rakan-rakan, keluarga kita di Gaza. Terima kasih.

Timbalan Yang di-Pertua [Datuk Dr. Wan Junaidi bin Tuanku Jaafar]: Terima kasih Yang Berhormat. Yang Berhormat Bentong.

12.33 tgh.

Menteri Kesihatan [Dato' Seri Liow Tiong Lai]: Terima kasih Tuan Yang di-Pertua, saya bangun untuk menyambung usul yang dibawa oleh Yang Amat Berhormat Perdana Menteri. MCA mengutuk sekeras-kerasnya tindakan kejam rejim Israel yang tidak berkemanusiaan dan mendesak Majlis Keselamatan Bangsa-Bangsa Bersatu mengambil tindakan tugas ke atas Rejim Zionis ini. Rakyat Malaysia amat terkejut dan tidak menerima perbuatan kejam rejim Israel, bukan sahaja untuk menahan kapal-kapal bantuan kemanusiaan ke Gaza tetapi lebih buruk lagi perbuatan ganas yang diperlakukan ke atas sukarelawan-sukarelawan misi bantuan kemanusiaan ke Gaza, ke atas kapal Mavi Marmara dan juga kapal misi bantuan Rachel Corrie yang dirampas oleh tentera Israel.

Tindakan ganas tentera laut dan komando-komando Israel menggempur kapal-kapal misi bantuan kemanusiaan antarabangsa membuktikan rejim Israel langsung tidak mempedulikan, malah memperlekehkan undang-undang antarabangsa. Sebenarnya selama ini pun resolusi-resolusi yang diluluskan oleh Bangsa-Bangsa Bersatu tidak pernah dihiraukan langsung oleh Israel, dan kerap dilanggar begitu sahaja. Oleh itu kali ini, kita tidak boleh biarkan ianya terus berlaku begitu sahaja. Dunia tidak boleh biarkan Israel terus bermaharajalela.

Rakyat Malaysia terus bersatu padu dengan suara lantang meminta rejim Israel dihadapkan ke Mahkamah Jenayah Antarabangsa.

Tuan Yang di-Pertua, penderitaan penduduk di Gaza, yang berjumlah lebih daripada sejuta orang yang kekurangan bekalan-bekalan keperluan harian terutama makanan dan ubat-ubatan sangat mendesak. Ini adalah disebabkan sekatan haram yang dilaksanakan oleh Israel ke atas penduduk-penduduk buat sekian lamanya.

Pada minggu yang lalu, saya telah berpeluang untuk mengadakan perbincangan dengan seorang pegawai Pertubuhan Kesihatan Sedunia (WHO). Beliau yang pernah melawat Gaza, menyifatkan keadaan hidup rakyat Palestin di sana begitu terdesak dan keperluan asas yang mereka perlukan sangat berkurangan dan tidak mencukupi. Pegawai WHO itu tersebut juga pernah melawat Benua Afrika dan lain-lain kawasan yang mundur, menyifatkan kawasan Gaza sebagai kawasan yang paling mendesak yang memerlukan bantuan kemanusiaan. Kata beliau, lawatan beliau ke sana telah membuka matanya sendiri dan beliau merasakan amat simpati dengan penderitaan rakyat Palestin di sana yang setiap hari yang menghadapi kekurangan makanan dan bekalan air yang bersih.

Rakyat Malaysia daripada setiap lapisan masyarakat, setiap keturunan dan agama sesungguhnya tidak boleh menerima keganasan dan kekejaman tentera rejim Israel ke atas sukarelawan-sukarelawan yang terdiri daripada pelbagai *nationality*. Tidak pernah sebelum ini berlaku sebuah negara kononnya mendakwa, mengamalkan dan menjunjung prinsip-prinsip demokrasi bertindak sedemikian rupa iaitu membelakangkan *international public opinion* dengan pelbagai alasan yang tidak munasabah. Kita dapat lihat reaksi spontan rakyat di seluruh dunia yang mengutuk dan mengecam pembunuhan dan penahanan sukarelawan-sukarelawan yang tidak bersenjata dan tidak berupaya melindungi diri. Rakyat di seluruh dunia menunjukkan bantahan mereka melalui tunjuk perasaan secara besar-besaran di negara mereka.

Tuan Yang di-Pertua, kita rakyat Malaysia sesungguhnya berasa sangat sedih dan bersimpati di atas nasib sebilangan rakyat daripada negara Turki yang ditembak bertubi-tubi sehingga mati oleh tentera Israel di atas kapal Mavi Marmara. Selain daripada itu, ada laporan yang mengatakan terdapat pula beberapa orang sukarelawan yang masih tidak dapat dicari. Rejim Israel tidak pernah serik melakukan kezaliman ke atas rakyat Palestin yang tidak berupaya, terutamanya ke atas orang tua dan kanak-kanak. Mereka kerap melakukan demikian dengan sewenang-wenangnya kerana rejim ini merasakan kebal daripada sebarang tindakan antarabangsa disebabkan dilindungi oleh Amerika Syarikat. Kita harap Amerika Syarikat tidak lagi terus menyalahgunakan kuasa beliau, kuasa veto Amerika Syarikat di Majlis Keselamatan Bangsa-Bangsa Bersatu kali ini.

Tuan Yang di-Pertua, kezaliman dan ketidakadilan terhadap rakyat Palestin oleh rejim yang ganas ini tidak boleh dibiarkan berterusan dalam dunia yang kita semua akui sudah pun bertamadun. Perlakuan rejim Israel pada hari ini terhadap rakyat Palestin perlu dikutuk sehabis-habisnya. MCA mengajak dan menyeru rakyat Malaysia yang cintakan keamanan dan keadilan, sekali lagi mengutuk sekeras-kerasnya tindakan ganas pembunuhan dan penahanan kapal-kapal misi bantuan kemanusiaan di perairan antarabangsa. Oleh yang demikian, satu tindakan yang berkesan dan wajar perlu dikenakan ke atas rejim Israel. Masyarakat antarabangsa seluruhnya, tidak berkecuali. Amerika Syarikat perlu memainkan peranan untuk mencegah perkara seperti ini daripada terus berulang.

Tuan Yang di-Pertua, saya mohon menyokong usul ini.

Timbalan Yang di-Pertua [Datuk Dr. Wan Junaidi bin Tuanku Jaafar]:
Ya Terima kasih Yang Berhormat. Ya, Yang Berhormat Bagan.

■ 1240

Tuan Lim Guan Eng [Bagan]: Terima kasih Tuan Yang di-Pertua. Saya bangun untuk memberikan sokongan terhadap usul yang dibentangkan oleh Yang Amat Berhormat Perdana Menteri di mana dalam isu perikemanusiaan, isu kedaulatan negara untuk menentukan nasib dan masa hadapan mereka, saya rasa kita tidak ada pandangan yang berbeza. Dalam aspek ini kita harapkan bahawa sebulat suara dan saya percaya akan diluluskan nanti dapat disampaikan kepada peringkat antarabangsa.

Tuan Yang di-Pertua, sudah sekian banyak desakan dan tuntutan dibuat oleh masyarakat dunia terhadap Pertubuhan Bangsa-Bangsa Bersatu untuk mengenakan tindakan keras terhadap rejim Israel di atas kesalahan mencabul hak asasi manusia dan penindasan biadab terhadap rakyat Palestin. Malangnya tidak ada sebarang ketetapan tegas untuk mengenakan hukuman terhadap rejim Tel Aviv oleh Pertubuhan Bangsa-Bangsa Bersatu yang masih bermaharajalela dalam tindakan keganasan dan kebiadabannya.

Tindakan terbaru Israel memang telah mengejutkan dunia. Pihak tentera Israel telah menyerang kapal-kapal yang membawa bantuan kemanusiaan ke Gaza dan telah membunuh orang awam atau sukarelawan serta mencederakan ramai di antara mereka. Selain daripada itu, mereka juga menahan sukarelawan termasuk daripada Malaysia dan kita juga bersyukur bahawa mereka semua selamat tanpa sebarang kecederaan. Di sini saya ingin menyatakan kebanggaan yang tidak berbelah bahagi daripada pihak kami dan saya percaya juga rakyat Malaysia ke atas semangat mereka untuk memberikan sumbangan dan juga sokongan ke atas penduduk dan bangsa Palestin yang sudah sekian lama tertindas.

Tuan Yang di-Pertua, tindakan pembunuhan ini bukan sahaja kejam dan zalim, tetapi adalah satu jenayah perang. Mereka yang melakukan kesalahan ini sepatutnya dibawa ke muka pengadilan tetapi sehingga sekian lama sungguhpun betapa ramai kanak-kanak dan wanita dibunuh, tidak ada sebarang tindakan diambil. Di sini saya ingin menyahut seruan daripada Yang Berhormat Ketua Pembangkang iaitu Yang Berhormat daripada Permatang Pauh bahawa kita masukkan lagi satu ayat untuk mendesak Amerika Syarikat untuk membawa Israel ke muka pengadilan. Ini adalah perlu kerana tanpa sokongan dan dukungan daripada Amerika Syarikat, tidak mungkin Israel berani bermaharajalela, tidak mungkin Israel berani bersikap dan bertindak begitu biadab. Tidak mungkin Israel sehingga hari ini memang tidak menimbulkan perasaan bersalah ataupun bahawa mereka harus bertaubat atas kesalahan besar yang mereka lakukan. Oleh itu, jikalau kita hendak menghukum Israel, jalan tunggalnya adalah menerusi Amerika Syarikat.

Tuan Yang di-Pertua, sokongan Amerika Syarikat ke atas Israel adalah berlandaskan moral dan etika. Itu mengikut pandangan daripada Amerika Syarikat. Ini adalah ekor sejarah *Holocaust* dan juga sikap anti *Semitism* yang menyebabkan dasar luar negara Amerika Syarikat cenderung menyebelahi Israel. Saya rasa sebagai sebuah negara yang memang ada hubungan dengan Amerika Syarikat, patut menyampaikan kepada Amerika Syarikat sebagai seorang kawan, sebagai seorang rakan bahawa ini bukanlah berkepentingan Amerika Syarikat kalau mereka terus memberikan sokongan tanpa syarat kepada Israel. Ini akan

menggugat keselamatan negara Amerika Syarikat kalau mereka terus memberikan sokongan tanpa syarat ke atas kebiadaban, keganasan, kezaliman kepada Israel. Kalau ini berterusan, maka Israel akan dilihat sebagai satu negara yang tidak lain tidak beza daripada Nazi Germany iaitu mereka yang membunuh begitu ramai rakyat Yahudi dengan kejam dan zalim sekali. Kalau inilah kata putusnya, maka Amerika Syarikat juga sama-sama bersalah dengan Israel.

Oleh sebab itu, saya berharap Yang Amat Berhormat Perdana Menteri yang sekarang selepas lawatan rasmi ke Washington dan ada hubungan mesra dengan Presiden Barack Obama boleh sampaikan mesej ini kepada Amerika Syarikat. Saya ingin hendak cadangkan, kalau boleh minta satu lawatan istimewa untuk sampaikan perasaan bukan sahaja rakyat Malaysia, tetapi di rantau ini kepada Presiden Barack Obama supaya menilai dan menimbang semula sokongan tanpa syarat kepada Israel. Ini adalah kerana, sekiranya Amerika Syarikat menarik balik sokongan ke atas Israel, maka saya percaya bahawa Israel tidak berani bertindak liar seperti ini.

Oleh itu, sekiranya kita boleh memasukkan ungkapan yang dicadangkan oleh Yang Berhormat daripada Permatang Pauh, saya rasa itu adalah lebih berkesan daripada mengambil semua langkah sungguhpun langkah yang dicadangkan oleh Yang Amat Berhormat Perdana Menteri adalah baik, tetapi hanya kalau direstui oleh Amerika Syarikat baru ia boleh diluluskan ataupun dibenarkan. Saya rasa lebih baik kita ambil jalan pintas, terus pergi ke Washington. Minta Washington memberikan sokongan supaya ini semua boleh digunakan...

Dato' Mahfuz bin Haji Omar [Pokok Sena]: APCO tak bagi, APCO tak bagi.

Tuan Lim Guan Eng [Bagan]: Tanpa tindakan sedemikian Tuan Yang di-Pertua, saya percaya semua usaha ini sungguhpun datang dari hati yang murni, tidak akan berhasil. Kenyataan yang dikeluarkan oleh Presiden Barack Obama, saya rasa amat mengecewakan. Apa yang diserukan oleh Presiden Barack Obama bahawa pembunuhan yang zalim dalam perairan antarabangsa adalah satu peristiwa yang tragik – itu sahaja, tetapi tidak ada sebarang hukuman diambil kepada Israel. Saya rasa kita perlu sampaikan terus kepada Washington. Tidak guna kita pergi ke ICJ dan juga Pertubuhan Bangsa-Bangsa Bersatu kerana selagi Amerika Syarikat tidak halalkan atau tidak benarkan, maka semua ini akan sia-sia sahaja.

Oleh sebab itu kita berharap dalam aspek ini, jalan yang saya rasa paling berkesan ialah terus pergi ke Washington. Saya tahu, dalam aspek ini mungkin Washington tidak akan gembira atau tidak akan suka sekiranya kita berbuat demikian. Namun begitu, kalau kita adalah kawan yang baik, kita mestilah berani bercakap benar. Berani bercakap benar bukan hanya di Dewan Rakyat tetapi di hadapan muka Presiden Amerika Syarikat... [Tepuk] Bukan sekarang apabila kita berjumpa Presiden Barack Obama, kita bercakap semua yang manis-manis, semua yang sedap-sedap hati. Kita mesti berani beritahu dia, jangan benarkan Israel menindas rakyat Palestin lagi... [Tepuk] Itu baru berkesan. Saya minta Yang Amat Berhormat Perdana Menteri kalau boleh pergi ke Washington, akan menerima sokongan padu daripada Pakatan Rakyat dan semua rakyat Malaysia! [Tepuk] Kita sedia menganggap Yang Amat Berhormat Perdana Menteri sebagai seorang wira kalau berani bercakap sedemikian kepada Presiden Amerika Syarikat - Presiden Barack Obama, kuasa yang paling besar di dunia...

Dato' Mahfuz bin Haji Omar [Pokok Sena]: Mana boleh, APCO tak kasi cakap... [Ketawa]

Tuan Lim Guan Eng [Bagan]: Dalam aspek ini Tuan Yang di-Pertua, sebelum saya mengakhiri ucapan saya, saya ingin menyatakan bahawa sungguhpun kita memberikan sokongan kepada usul ini, saya harap bahawa daripada pihak kerajaan kerana ada satu peristiwa rasa saya perlu sebutkan iaitu dalam satu demonstrasi terhadap kedatangan pasukan kriket dari Israel. Ada beberapa yang membantah kedatangan pasukan kriket dari Israel ke Malaysia telah didakwa dan dipenjarakan oleh Kerajaan Malaysia. Saya rasa itu mungkin pada masa rejim yang lainlah di mana mereka mendukung Israel. Kalau boleh, kita betulkan ketidakadilan ini dan meminta maaf kepada mereka yang menentang kemasukan atau kedatangan pasukan kriket Israel supaya kita betulkan keadaan.

■ 1250

Ini saya rasa akan memberikan keadilan kepada mereka yang menentang Israel dan sekurang-kurangnya menebus balik maruah Malaysia yang pada masa itu tidak sepatutnya membenarkan pasukan kriket Israel masuk ke tanah air Malaysia. *[Tepuk]*

Timbalan Yang di-Pertua [Datuk Dr. Wan Junaidi bin Tuanku Jaafar]: Baik, Yang Berhormat.

Tuan Lim Guan Eng [Bagan]: Saya dengan ikhlas meminta bahawa perkara ini boleh dibetulkan.

Timbalan Yang di-Pertua [Datuk Dr. Wan Junaidi bin Tuanku Jaafar]: Baik, Yang Berhormat.

Tuan Lim Guan Eng [Bagan]: Pada masa yang sama, kita harap dalam usaha kita boleh meminta bahawa negara Mesir, jangan hanya pada masa ini hanya membuka sempadan di Rafah kerana sebelum ini mereka menutup sempadan. Bukan sahaja pada masa ini tetapi pada sepanjang masa. Janganlah selepas peristiwa ini, lalu mereka akan tutup balik. Itu yang kita bimbangkan dan kita harap bahawa pihak Kerajaan Malaysia boleh minta Mesir untuk buka sempadan di Rafah sepanjang masa sehingga rakyat Palestin boleh bebas, sehingga negara Palestin boleh ditubuhkan dengan sepenuhnya.

Dengan ini saya ingin menyatakan sokongan ke atas usul ini dengan harapan bahawa kita boleh masukkan usul untuk meminta bahawa Amerika Syarikat memberitahu di depan muka Presiden dan meminta Amerika Syarikat supaya jangan lagi menyokong satu rejim yang begitu ganas, begitu zalim dan saya rasa dengan izin, *on the wrong side of history*. Sekian, terima kasih. *[Tepuk]*

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat dari Segamat.

12.51 tgh.

Menteri Sumber Manusia [Datuk Dr. S. Subramaniam]: Terima kasih Tuan Yang di-Pertua. Saya menyokong sepenuhnya usul yang dibawa oleh Yang Amat Berhormat Perdana Menteri kita di Dewan yang mulia ini dalam mengutuk Rejim Zionis ke atas kapal misi kemanusiaan Mavi Marmara. Sesungguhnya kekejaman Rejim Yahudi dengan membunuh dan mencederakan orang-orang yang tidak berdosa mesti dikutuk dengan sekeras-kerasnya. Dunia dikejutkan dengan pembunuhan ini oleh askar-askar rejim Israel. Kita telah melihat sendiri melalui kaca televisyen bagaimana mereka melakukan kekejaman terhadap orang-orang yang tidak berdosa, termasuk rakyat kita sendiri.

Mereka langsung tidak menghiraukan usaha murni pasukan sukarelawan di atas kapal Mavi Marmara dan terus mengacukan senjata mereka kepada para

sukarelawan. Ramai daripada mereka dibunuh dengan kejam dan kita hanya dapat melihat dan mendengar cerita daripada sukarelawan yang terselamat sahaja. Apakah justifikasi pembunuhan kejam ini. Apakah dunia hanya akan memerhatikan kekejaman rejim Israel yang tiada hadnya tanpa membuat sesuatu. Dunia kini tidak boleh lagi berdiam diri dan hanya sekadar memprotes terhadap kekejaman Rejim Zionis ini.

Masanya sudah tiba untuk bertindak dengan menggunakan saluran-saluran perundangan antarabangsa dan tekanan terhadap kuasa-kuasa besar. Kita tidak harus sekadar meminta Rejim Zionis untuk memohon maaf terhadap tindakan ketidakberperikemanusiaan mereka. Walaupun laporan terbaru media mengatakan bahawa Pertubuhan Bangsa-Bangsa Bersatu telah bersetuju untuk menubuhkan sebuah panel penyiasatan pelbagai negara bagi menyiasat insiden di atas kapal Mavi Marmara, namun Kerajaan Malaysia mesti membawa satu usul segera Pertubuhan Bangsa-Bangsa Bersatu mendesak supaya penjenayah yang mengarahkan kekejaman terhadap orang-orang yang tidak berdosa ini dibawa ke muka pengadilan.

Sudah tentu arahan yang diberikan kepada pasukan komando untuk melepaskan tembakan terhadap pasukan *civilian* di atas kapal Mavi Marmara ialah atas arahan pihak Tel Aviv. Mereka tidak boleh dibiarkan begitu sahaja kerana sudah pasti mereka akan mengulangi kekejaman ini dengan menggunakan alasan mempertahankan diri. Pihak Israel perlu dengan segera menarik balik sekatan atau dengan izin, *blockade* yang dikenakan terhadap kapal-kapal yang membawa bantuan kemanusiaan ke Gaza. Adalah amat penting supaya bantuan kemanusiaan sampai dengan segera kepada penduduk Gaza.

Laporan media mengatakan sudah wujud krisis kemanusiaan di Gaza dan perkara ini perlu diberi perhatian yang utama. Masanya juga sudah tiba untuk satu penyelesaian tetap dan segera bagi penderitaan yang dialami oleh rakyat Palestin. Sampai bila lagi kita akan melihat mereka ditindas dan dibunuh? Sebelum ini pun Malaysia telah menggesa Perhimpunan Agung Pertubuhan Bangsa-Bangsa Bersatu supaya menubuhkan satu tribunal jenayah antarabangsa untuk Palestin bagi menyiasat dan mendakwa penjenayah perang Israel yang disyaki terlibat dengan kekejaman dan keganasan atas rakyat Palestin.

Malaysia juga telah berkali-kali mendesak Majlis Keselamatan Pertubuhan Bangsa-Bangsa Bersatu supaya bertindak untuk mengisytiharkan gencatan senjata tanpa syarat dan memaksa pihak Israel berundur dari bumi Gaza. Bagaimanapun, kedua-dua usaha ini tidak kesampaian kerana kuasa-kuasa besar telah menggunakan kuasa veto mereka dalam menyekat Majlis Keselamatan Pertubuhan Bangsa-bangsa Bersatu daripada bertindak.

Jadi kita berhadapan dengan satu keadaan yang agak rumit, tetapi kita tidak boleh berputus asa malah kita perlu mengadakan usaha dengan rakan-rakan kita, khususnya dari kalangan negara-negara OIC untuk mencari satu penyelesaian yang segera dan tetap. Pada kesempatan ini saya ingin mengucapkan terima kasih dan tahniah kepada pasukan sukarelawan, khususnya dari Malaysia yang berani mengambil risiko untuk membawa bantuan kemanusiaan kepada penduduk Palestin di Wilayah Gaza.

Kita juga gembira dengan berita pembebasan enam aktivis keamanan di atas kapal MV Rachel Corrie yang ditawan ketika dalam pelayan ke Gaza. Rakyat Malaysia menanti kepulangan mereka ke tanah air dengan selamat. Yang Amat Berhormat Perdana Menteri kita telah memberikan gelaran Wira Negara kepada mereka. Bagaimanapun saya ingin mencadangkan supaya Kerajaan Malaysia

memberikan pengiktirafan yang sewajarnya terhadap pejuang-pejuang kemanusiaan ini di atas keberanian mereka.

Kami berharap insiden yang menimpa sukarelawan kita ketika di atas perairan di tangan rejim Yahudi tidak akan melemahkan semangat mereka. Malah saya yakin mereka lebih berani dan tabah lagi selepas insiden ini dan sanggup meneruskan usaha murni yang mereka mulakan. Inilah kekuatan yang dimiliki oleh rakyat Malaysia.

Tuan Yang di-Pertua, keberanian wira-wira Malaysia ini harus menjadi pedoman kepada generasi masa kini supaya mereka akan tahu apakah maksud sebenar perjuangan dan juga keperitan yang dialami oleh rakyat Palestin. Dengan ini saya menyokong usul ini. Terima kasih.

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat Marang.

12.57 tgh.

Dato' Seri Haji Abdul Hadi Awang [Marang]: *Assalamualaikum Warahmatullaahi Wabarakaatuh.* Yang Berhormat Tuan Yang di-Pertua, bagi mengukuhkan usul yang dikemukakan oleh pihak kerajaan, saya ingin mengemukakan beberapa perkara.

Yang pertama, apa yang berlaku daripada keganasan Zionis Israel telah didedahkan oleh Al-Quran UI-Karim sejak 1430 yang lalu, Allah SWT menegaskan di dalam Quran. *[Membawa beberapa potong ayat Al-Quran] Surah Al-Imran', ayat 21 hingga 22 yang bermaksud "Sesungguhnya mereka yakni golongan Zionis Yahudi yang kufur terhadap ayat-ayat Allah. Mereka membunuh nabi-nabi. Mereka membunuh orang-orang yang menyeru kepada yang baik dan adil di kalangan manusia. Berilah amaran berita azab kepada mereka. Sesungguhnya Allah menghapuskan segala amal baik yang dilakukan oleh mereka di dunia dan di akhirat, dan mereka tidak akan dapat pertolongan daripada Allah."*

Hari ini seluruh dunia melihat kebenaran mukjizat berita Al-Quran UI-Karim apabila misi Freedom Flotilla, di mana anggotanya terdiri di kalangan orang awam, campuran daripada bukan sahaja orang tua, termasuk kanak-kanak dan wanita, termasuk pemimpin-pemimpin agama dan pemimpin masyarakat. Mereka menuju ke Gaza dalam suasana yang tidak perang. Bukan suasana perang, suasana biasa. Akan tetapi mereka diperlakukan dengan tindakan yang begitu rupa. Maka tindakan yang dilakukan oleh Rejim Zionis...

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat ada tujuh minit lagi, boleh sambung pada waktu petang, Yang Berhormat.

Dato' Seri Haji Abdul Hadi Awang [Marang]: Terima kasih.

Timbalan Yang di-Pertua [Datuk Dr. Wan Junaidi bin Tuanku Jaafar]: Duduk, Yang Berhormat.

Dato' Seri Haji Abdul Hadi Awang [Marang]: Tidak boleh teruskan?

Timbalan Yang di-Pertua [Datuk Dr. Wan Junaidi bin Tuanku Jaafar]: Boleh sambung petang.

Dato' Seri Haji Abdul Hadi Awang [Marang]: Tidak apa.

Timbalan Yang di-Pertua [Datuk Dr. Wan Junaidi bin Tuanku Jaafar]: Ahli-ahli Yang Berhormat, Mesyuarat Dewan ditangguhkan dahulu dan Dewan bersidang semula jam 2.30 petang nanti.

Mesyuarat dtempohkan pada pukul 1.00 petang.

Mesyuarat disambung semula pada pukul 2.30 petang.

[Timbalan Yang di-Pertua (Datuk Ronald Kiandee) ***mempengerusikan Mesyuarat***]

■ 1430

Timbalan Yang di-Pertua [Datuk Ronald Kiandee]: Saya menjemput Yang Berhormat Marang untuk menyambung tujuh minit.

2.32 ptg.

Dato' Seri Haji Abdul Hadi Awang [Marang]: Tuan Yang di-Pertua, oleh kerana misi yang menyertai Freedom Flotilla dan Armada ini adalah misi kemanusiaan bersifat kebajikan dan mereka yang menyertai rombongan adalah orang awam, maka tindakan bersenjata oleh tentera Regim Zionis adalah pencabulan terhadap fitrah kemanusiaan sejagat yang biasa. Sifat semula jadi kemanusiaan sejagat yang biasa mesti wujud kasihan belas terhadap sesama manusia bahkan terhadap binatang pun. Dengan adanya rasa kasihan di kalangan binatang dengan binatang disebut dalam hadis Qudsi, Allah membahagikan rahmatnya kepada seratus bahagian. Hanya seratus diberi kepada alam dunia sebelum alam akhirat. Satu perseratus itulah menjadikan manusia berkasih sayang di antara satu sama lain. Adanya binatang buas yang tidak memamah anaknya yang kasihan di antara satu sama lain. Namun di sana ada manusia yang di luar peri kemanusiaan fitrah yang semula jadi ini.

Tindakan ini jelas ganas dan di luar daripada fitrah yang sebenarnya. Apa yang berlaku ialah pencabulan terhadap *ghuruf* antarabangsa yang bertamadun sejak berkurun. Ini kerana mengikut amalan antarabangsa dalam masyarakat yang bertamadun, dalam suasana perang pun tidak boleh bertindak terhadap mereka yang dianggap sebagai orang awam, orang tua, kanak-kanak, kaum wanita yang tidak bersenjata, peniaga, petani dan sebagainya. Apa lagi dalam suasana yang tidak perang. Rombongan yang menyertai misi ini adalah rombongan damai dan kebajikan dalam suasana tidak perang. Maka tindakan itu adalah pencabulan terhadap *ghuruf* antarabangsa. Pencabulan terhadap undang-undang antarabangsa dan Piagam Bangsa-Bangsa Bersatu di mana undang-undang antarabangsa dan Piagam Bangsa-Bangsa Bersatu pun, walaupun dalam suasana perang ada peraturan terhadap tawanan perang, terhadap orang awam.

Apa yang berlaku ialah di perairan antarabangsa dalam suasana yang tidak perang. Ini jelas sangat melampaui batas undang-undang dan Piagam Bangsa-Bangsa Bersatu. Sebenarnya tindakan Regim Zionis adalah manifestasi daripada ideologi Zionisme. Di sana terdapat empat rukun dalam ajaran Zionisme. Mungkin ramai di kalangan masyarakat tidak didedahkan dengan ajaran ini. Pertama, mereka menganggap bangsa Yahudi adalah bangsa yang mulia pilihan Tuhan. Bangsa lain adalah *goyum*, bangsa kelas kedua. Ada di kalangan mereka yang sanggup mengatakan bangsa manusia yang berupa binatang, haiwan yang boleh dilakukan sewenang-wenang dengan apa sahaja.

Kedua, mereka merancang untuk membina semula Kuil Haikal Sulaiman yang dibayangi oleh dongeng kepercayaan penganut Zionis kononnya di bawah Masjid al-Aqsa itu ada keranda yang diisi dengan bahan-bahan peninggalan

warisan Nabi Musa dan Nabi Harun. Ini yang memberi semangat kepada mereka untuk menjadi bangsa yang perkasa yang boleh menakluk dunia.

Ketiga, berjuang untuk menubuhkan negara Israel Agung yang bukan sekadar perbatasan Israel yang ada pada hari ini, bahkan sempadannya daripada Nil sehingga Ukraine. Itu kawasan negara Israel Agung yang akan menakluk dunia kononnya bagi mengembalikan empayar Nabi Sulaiman A'lahihsalam yang disanjung oleh mereka. Mengikut Islam itu bukan sifat Nabi Sulaiman A'lahihsalam.

Keempat, Zionisme menunggu kelahiran Al-Mashi yang dianggap pemimpin bangsa Yahudi yang akan memimpin negara besar yang menakluk seluruh dunia. Barangkali ramai di kalangan kita tidak menyedari bagaimana Zionisme telah meresap ke dalam bidang-bidang politik, ekonomi, media dan lain-lain khususnya kepada negara besar. Siapa yang mahu menang menjadi Presiden Amerika mesti sokong Israel. Kalau tidak sokong Israel payah menang dan mereka menguasai media. Mereka menggunakan media untuk membela seolah-olah mereka bangsa yang dizalimi dan dianiyai. Hari ini terdedah merekalah yang sebenarnya bangsa yang zalim yang mengganas yang menganiyai orang lain dan bangsa lain.

Dalam bidang hubungan antarabangsa mereka mempengaruhi Bangsa-Bangsa Bersatu. Sehingga hari ini kuasa veto yang dipunyai oleh kuasa-kuasa besar dunia sering kali memberi perlindungan kepada negara Israel. Sebarang tindakan yang diputuskan oleh Bangsa-Bangsa Bersatu oleh badan-badannya termasuk Majlis Keselamatan termasuk perhimpunan agung boleh diveto oleh kuasa-kuasa besar, khusus kuasa besar yang menyokong Rejim Zionis Israel. Bahkan mereka mempermainkan dalam bidang ekonomi, mereka menguasai Bank Dunia, mereka menguasai Tabung Kewangan Antarabangsa, mereka menjadikan dolar sebagai sandaran kepada kewangan antarabangsa.

Kita tidak tahu mungkin masyarakat antarabangsa ditipu. *One dollar* hanyalah kertas yang tidak ada sandaran yang boleh dicetak untuk mempermainkan ekonomi dunia. Apa yang paling menyentuh perasaan kita ialah tindakan masyarakat antarabangsa yang dikuasai oleh Amerika yang dipengaruhi oleh Zionis tidak mengiktiraf kemenangan Hamas secara demokratik dalam pilihan raya 2006. Pilihan raya yang dipantau oleh NGO antarabangsa termasuk NGO daripada Amerika sendiri yang dipimpin oleh mantan Presiden Jimmy Carter yang membuat kenyataan Hamas menang dengan pilihan raya yang telus, pilihan raya yang baik dan yang adil. Namun, kemenangan itu tidak diiktiraf. Apa yang malang Amerika, sekutu-sekutunya dan ramai negara yang terbabit membantu parti yang kalah, membantu parti yang kalah untuk menubuhkan kerajaan. Memaksa rakyat Palestin menerima parti yang kalah.

■ 1440

Hamas tertekan, rakyat Palestin tidak menerima PLO dan masih ada termasuk negara kita pun masih menerima wakil PLO di sini yang tidak diiktiraf oleh rakyat Palestin kerana ditolak dalam pilihan raya kononnya rakyat Palestin hendak dipaksa untuk bersatu padahal kita memaksa mereka untuk menerima kerajaan atau parti yang kalah dan tidak menang pilihan raya.

Maka sikap yang adil perlu ditunjuk supaya Hamas benar-benar mempunyai kedudukan yang sebenar dan merekalah yang sebenarnya mewakili majoriti besar rakyat Palestin. Tanpa menyedari ataupun disedari cara ini adalah cara untuk melagakan rakyat Palestin sendiri. Kemudian Israel terus-menerus tidak menandatangani pengharaman senjata nuklear. Sampai sekarang mereka

yang mendesak orang lain tidak boleh mempunyai teknologi nuklear walaupun teknologi itu untuk keamanan, untuk tenaga tidak dibenarkan tetapi Israel sudah mempunyai senjata nuklear sejak tahun 1960-an dibantu oleh negara Barat, teknologi Perancis dibantu oleh Britain, dibantu oleh Amerika sejak 1960-an lagi dan ada tanda-tanda yang didedahkan oleh NGO daripada Eropah telah digunakan secara kecilan dalam peperangan di selatan Lubnan dan peperangan di Gaza.

Israel hendak memaksa dunia supaya menerima undang-undang jakun di rimba, undang-undang siapa yang kuat, dialah yang benar. Kita mesti tolak dengan sekeras-kerasnya. Ini satu sikap yang sangat melampau. Di sini kita mempunyai satu tanggungjawab bersama yang sangat besar, kita lupakan perbezaan agama, perbezaan ideologi, politik bersatu di atas sifat kemanusiaan bagi mengutus satu mesej yang keras terhadap Israel dan bertindak dengan cara yang seadil-adilnya sekurang-kurangnya dengan cara yang segera memecahkan kepungan yang berlaku ke atas Gaza.

Kepungan hendaklah dihentikan daripada sekarang dan mendesak supaya masyarakat antarabangsa dan Malaysia menggunakan pengaruhnya melalui OIC, melalui NAM, melalui Bangsa-Bangsa Bersatu. Kalau boleh dilakukan anjakan yang lebih maju supaya bukan sahaja misi kebajikan dan misi damai ini diteruskan bahkan bantuan-bantuan kemanusiaan yang dihantar dilindungi di bawah payung ketenteraan, payung tentera yang disokong oleh Bangsa-Bangsa Bersatu untuk menghalang Israel bertindak dengan cara yang sebegitu rupa.

Timbalan Yang di-Pertua [Datuk Ronald Kiandee]: Habiskan Yang Berhormat. Masa sudah habis Yang Berhormat.

Dato' Seri Haji Abdul Hadi Awang [Marang]: Ya. Seterusnya kita mengharapkan supaya Israel hendaklah diseret ke dalam Mahkamah Antarabangsa walaupun memaksa tokoh-tokoh Israel, pemimpin Israel, pemimpinnya diseret ke mahkamah kerana melakukan jenayah perang dan banyak lagi tindakan yang lain. Oleh kerana masa tidak mengizinkan, saya mengharapkan supaya pihak kerajaan mengambil kira pandangan yang diberi dan supaya cadangan yang dikemukakan lebih tegas dan lebih teguh dengan tindakan bersama dengan negara yang sepakat dengan kita dan kami daripada pihak PAS menyokong usul ini. Sekian, terima kasih.

Timbalan Yang di-Pertua [Datuk Ronald Kiandee]: Yang Berhormat Kulim Bandar Baru.

2.43 ptg.

Tuan Zukifli bin Noordin [Kulim Bandar Baharu]: Terima kasih Tuan Yang di-Pertua atas kesempatan untuk bersama dalam usul yang telah dibentangkan oleh Yang Amat Berhormat Perdana Menteri pagi tadi. Saya mengambil kesempatan ini untuk merakamkan pandangan kami bagi mewakili lima rakan saya daripada Yang Berhormat Bagan Serai, Yang Berhormat Bayan Baru, Yang Berhormat Nibong Tebal dan Yang Berhormat Wangsa Maju mengutuk keras tindakan rejim haram Zionis Israel laknatullah yang telah menceroboh dan telah menyerang kapal pengangkut bantuan kemanusiaan Mavi Marmara dan Rachel Corrie di perairan antarabangsa di luar Palestin.

Kita mengambil kesempatan ini untuk mengucapkan tahniah kepada khasnya 12 sukarelawan Malaysia yang terlibat dan umumnya kepada sukarelawan lain yang mengambil bahagian dalam misi kemanusiaan ini.

Tuan Yang di-Pertua, bumi Palestin adalah bumi para anbia', para nabi dan rasul. Ianya kiblat pertama umat Islam, ianya bumi yang dimuliakan oleh kesemua agama wahyu. Bumi Gaza adalah bumi kelahiran Sheikh Muhammad Idris ataupun dikenali sebagai Imam Syafie.

Saya *alhamdulillah* berkesempatan pada bulan Februari tahun lepas, 2009 bersama dengan kepimpinan dan umat Palestin. Dalam perjumpaan dengan beberapa kepimpinan dan rakyat Palestin kita mendengar pelbagai cerita kisah duka lara yang dihadapi oleh umat Palestin. Saya mendengar kisah bagaimana umat Palestin terpaksa merebus rumput untuk menghilangkan kelaparan, anak-anak yang cedera menjerit ketika luka dijahit tanpa bius, kita dengar bagaimana kebun zaitun dan anggur dimusnahkan, sehinggakan mereka yang sudah mati pun tidak terlepas daripada kezaliman ini apabila kubur pun turut dibom dan dimusnahkan.

Saya berpendapat sudah tiba masanya masyarakat antarabangsa mengambil tindakan keras dan tegas terhadap Regim Zionis laknatullah ini. Mereka langsung tidak menghormati peraturan dan undang-undang antarabangsa dan bertindak sesuka hati tanpa mempedulikan hak asasi kemanusiaan. Ini adalah jenayah kemanusiaan yang jelas dan mesti dikutuk oleh semua bangsa dan negara.

Saya juga berpendapat negara-negara di bawah Pertubuhan Negara Islam terutamanya Malaysia segera mengambil peranan untuk meyakinkan dunia Barat dan kuasa besar khasnya untuk menghukum negara Zionis laknatullah ini dan membuktikan bahawa Regim Zionis Israel inilah punca kepada ketidakstabilan dunia. Mungkin kata-kata Sheikh Mahmoud Ahmedi Nejad, Presiden Iran ada kebenarannya, Regim Zionis Israel laknatullah ini sepatutnya dihapuskan daripada peta dunia ini.

Saya juga mencadangkan supaya negara-negara di bawah naungan Pertubuhan Negara-Negara Islam (OIC) supaya menubuhkan pasukan pengamannya sendiri dan bertindak melindungi negara-negara dan umat Islam yang memerlukan bantuan khususnya dan negara lain jika diperlukan. Kita umat Islam sudah tidak lagi boleh mengharap badan seperti Pertubuhan Bangsa-Bangsa Bersatu untuk melindungi dan menjaga keamanan umat Islam. Saya pernah mencadangkan ini semasa meletusnya keganasan Israel di Gaza pada tahun 2008 dahulu. Kita perlu menimbang perkara ini dengan serius.

Saya tidak nampak mengapa negara-negara di bawah naungan Pertubuhan Negara-Negara Islam (OIC) tidak boleh mengumpulkan bala tentera untuk membentuk pasukan pengaman antarabangsa dan masuk ke bumi Palestin termasuk Gaza untuk melindungi dan membela umat Islam dan rakyat Palestin yang dizalimi dan dianiaya tersebut. Kita tidak perlu mendapat keizinan sesiapa. Undang-undang antarabangsa menyebut bahawa mana-mana tentera daripada mana-mana negara boleh masuk ke dalam sebuah negara atas jemputan negara hos tersebut. Sudah pasti kita yakin Kerajaan Palestin bersedia menyambut kedatangan bala tentera pasukan pengaman negara-negara Pertubuhan Negara-Negara Islam (OIC).

Saya mengambil kesempatan ini mengucapkan tahniah kepada kerajaan atas inisiatif mengadakan sidang khas membawa usul tergegar mengutuk pencabulan terbaru Regim Zionis Israel laknatullah ini. Saya mendesak supaya Kerajaan Malaysia mengambil tindakan yang lebih konkrit dan jelas untuk menterjemahkan kemarahan rakyat Malaysia tentang pembunuhan terbaru. Saya berpendapat Parlimen perlu mendesak Kerajaan Malaysia mengambil inisiatif berbincang dengan negara-negara Pertubuhan Negara-Negara Islam (OIC) yang

lain untuk menubuhkan bala tentera pasukan pengaman OIC untuk menjaga keamanan penduduk Palestin. Parlimen juga perlu mendesak kerajaan dan menekan Kerajaan Amerika dan Britain dan dunia barat untuk memutuskan hubungan diplomatik dan mengambil tindakan keras terhadap Rejim Zionis Israel laknatullah ini.

Dalam pertemuan yang saya berkesempatan bersama dengan kepimpinan dan rakyat Palestin tahun lepas, walaupun mereka mengalu-alukan bantuan gandum, tepung dan lain-lain tetapi masih terngiang-ngiang di telinga saya kata-kata seorang remaja Palestin yang memberitahu kepada saya dengan izin, *"Brother we don't need flour, we need bullets...."* iaitu kami tidak memerlukan tepung, kami perlukan peluru. *"...Give us bullets, and we know what to do..."*, dengan izin.

Akhirnya saya menyeru umat Islam di Malaysia dan seluruh dunia marilah kita menghidupkan semula semangat jihad *fi sabilillah* di kalangan umat Islam.

■ 1450

Mutakhir ini, umat Islam semakin lesu dan bisu. Kehidupan duniawi sudah menenggelamkan umat Islam ke dalam krisis keimanan yang serius. Harimau-harimau Islam sudah tiada. Mana dia Umar Ibnu Khattab, hilang sudah Khalid al-Walid, ghaib sudah Ikramah bin Abu Jahal, Salahuddin al-Ayubi hanya tinggal nostalgia sejarah, Sultan Muhammad al-Fateh berkubur tanpa pengganti. Kita perlu melahirkan lebih ramai mujahidin dan syuhada yang mencintai mati syahid dan syurga. Saya juga meminta supaya dapat mimbar khutbah termasuk pada minggu ini, menyampaikan khutbah mengenai jihad dan syahid agar umat Islam kembali menjadi singa di siang hari dan abid di malam hari. Semoga Allah merahmati roh mukminin yang terkorban dan menjumlahkan mereka termasuk dalam golongan para syuhada dan memberi pengampunan kepada mereka, dan meletakkan mereka ke dalam syurga yang tinggi bersama para anbia dan para syahid. Terima kasih Tuan Yang di-Pertua atas peluang ini, saya mohon menyokong.

Timbalan Yang di-Pertua [Datuk Ronald Kiandee]: Yang Berhormat Petra Jaya.

2.51 ptg.

Timbalan Menteri Sains, Teknologi dan Inovasi [Tuan Haji Fadillah bin Yusof]: Terima kasih Tuan Yang di-Pertua. Saya mengucapkan ribuan terima kasih kepada Tuan Yang di-Pertua kerana membenarkan Dewan yang mulia ini membahaskan isu serangan kejam oleh tentera Rejim Zionis Israel ke atas Konvoi Kapal Freedom Flotilla yang membawa bantuan kemanusiaan ke Gaza. Saya berdiri untuk mewakili Parti Pesaka Bumiputera Bersatu (PPB), bukan 'Bangsa-Bangsa Bersatu' tapi Parti Pesaka Bumiputera untuk menyokong dengan sebulat suara dan sepenuh iltizam atas usul mengutuk serangan kejam oleh tentera Rejim Zionis Israel yang dibentangkan oleh Yang Amat Berhormat Perdana Menteri pagi tadi.

Tuan Yang di-Pertua, kita memang merasa amat kesal dengan tindakan kejam tentera Rejim Zionis Israel di bawah arahan Perdana Menteri Benjamin Netanyahu menyerang tanpa alasan, kapal konvoi bantuan kemanusiaan Freedom Flotilla di perairan antarabangsa pada 31 Mei 2010.

Kita mengutuk sekeras-kerasnya tindakan melampau itu dan berpandangan bahawa tindakan kejam tentera Rejim Zionis menyerang kapal bantuan kemanusiaan tersebut adalah bertentangan dengan Undang-undang

Antarabangsa, termasuk Undang-undang Hak Asasi Manusia, Undang-undang Kemanusiaan Antarabangsa dan Piagam Pertubuhan Bangsa-Bangsa Bersatu. Justeru itu, saya menyokong sepenuhnya kesemua 15 usul yang telah dibentangkan oleh Yang Amat Berhormat Perdana Menteri pagi tadi. Tindakan ini saya kira bukan sekadar untuk kita membahaskan pada hari ini, tapi yang lebih penting ialah untuk kita mencari penyelesaian menyeluruh kepada isu yang melibatkan Palestin. Tindakan kita mestilah tindakan berterusan, tindakan yang konsisten dan tindakan yang *persistence* untuk mencapai matlamat iaitu menyelamatkan bumi Palestin daripada terus tertindas, terus dianiayai oleh Rejim Zionis.

Tuan Yang di-Pertua, kalau kita melihat kepada isu pertama di Palestin, ianya merangkumi tiga perkara utama iaitu:

- (i) penjajahan oleh Israel;
- (ii) merampas hak mereka dari segi terutamanya tanah-tanah mereka; dan
- (iii) pencabulan hak dari segi kebebasan bergerak rakyat Palestin di tanah mereka sendiri.

Jadi inilah yang harus kita lihat dalam konteks keseluruhan dan saya mengajak rakan-rakan semua untuk kita melihat dan membahaskan, mencari penyelesaian yang berterusan yang konsisten dan *persistence* untuk mengajak rakan-rakan kita, negara-negara yang menyokong Palestin supaya duduk semeja, duduk untuk mengutuk bukan sahaja mengutuk Israel, tetapi mencari penyelesaian membawa kepada Pertubuhan Bangsa-Bangsa Bersatu, membawa kepada OIC, membawa kepada NAM, dan semua negara dunia supaya kita mendesak Israel supaya duduk berunding dan mencari penyelesaian supaya mereka tidak lagi menjajah, merampas dan menyekat segala hak yang ada di bumi Palestin tersebut. Oleh sebab itu kita menyokong saranan ataupun usul yang telah dikemukakan dan mengucapkan terima kasih kepada Mesir yang sudah sudi untuk membuka laluan sempadan untuk menyampaikan sokongan kemanusiaan kepada rakyat Palestin. Untuk itu kita mengharapkan supaya pembukaan sempadan ini akan berterusan tanpa syarat dan akan dikekalkan supaya misi kemanusiaan akan dapat disampaikan melalui sempadan dengan Mesir ini.

Tuan Yang di-Pertua, kalau kita melihat, memang Israel telah memaklumkan dua bulan yang lalu bahawa, apa-apa kapal yang menghampiri perairan mereka, mereka akan mengambil tindakan. Akan tetapi ini merupakan suatu langkah ataupun ugutan yang begitu besar sekali yang menjadi ancaman kepada perundangan dunia sebab kalau kita melihat Tuan Yang di-Pertua, bahawa *preemptive action* yang mereka ingin ambil. Kalau tidak dibendung, kalau tidak ditentang oleh masyarakat dunia, maknanya kita akan menghantar signal yang begitu jelas sekali bahawa Israel boleh menakluki dunia, boleh membuat *preemptive strike* dengan izin, kepada seluruh dunia. Asalkan mereka berpendapat ada ancaman kepada sempadan mereka, kepada negara mereka, mereka boleh mengambil tindakan.

Jadi inilah saya kira sepatutnya kita mengambil tindakan tegas untuk membawa ke peringkat antarabangsa, malahan merujuk kepada Mahkamah Antarabangsa sekalipun supaya mengambil tindakan supaya tindakan jenayah dunia dapat diambil kepada kepimpinan Israel yang telah menyerang misi keamanan ini. Untuk itu Tuan Yang di-Pertua, selaku mewakili PPB, kami menyokong keseluruhan usul yang telah dibentangkan, dan mengutuk segala

serangan dan tindakan zalim yang diambil oleh Israel ini. Dengan itu saya mohon menyokong.

Timbalan Yang di-Pertua [Datuk Ronald Kiandee]: Yang Berhormat Gombak.

14.56 ptg.

Tuan Mohamed Azmin Ali [Gombak]: Terima kasih Tuan Yang di-Pertua. Saya juga turut ingin mengambil bahagian dalam membahaskan usul yang telah dibawa oleh Yang Amat Berhormat Perdana Menteri pagi tadi. Cuma persoalan yang timbul dalam perbahasan ini ialah, apakah yang mendorong secara tiba-tiba Perdana Menteri untuk membawa usul dalam Dewan Rakyat pagi ini?... *[Dewan riuh]* Apakah kerana Perdana Menteri melihat Pakatan Rakyat telah berjaya memimpin... *[Tepuk]* Satu demonstrasi yang luar biasa, mengutuk kebiadaban dan keganasan Zionis Israel pada 4 Jun yang lalu...

Datuk Bung Moktar bin Radin [Kinabatangan]: Jangan main politik, kita ini serius!

Tuan Mohamed Azmin Ali [Gombak]: Ya, ini serius. Pada 4 Jun yang lalu, Pakatan Rakyat memimpin sejumlah 20,000 rakyat Malaysia pelbagai kaum untuk mengutuk kebiadaban Zionis Israel, sedangkan demonstrasi Pemuda UMNO tidak sampai 100 orang... *[Tepuk]*

Saya tidak lihat wakil PPB dalam demonstrasi tersebut. Saya tidak lihat wakil MCA mewakili demonstrasi tersebut, UMNO pun hanya segelintir sahaja yang benar-benar memahami sentimen rakyat Palestin yang ditekan oleh Zionis Israel...

Datuk Haji Mohamad bin Haji Aziz [Sri Gading]: Yang Berhormat Gombak..

Tuan Mohamed Azmin Ali [Gombak]: Saya tidak ada laluan, saya tidak ada masa...

Datuk Haji Mohamad bin Haji Aziz [Sri Gading]: ...Kita dalam usul yang serius, jangan main politiklah...

Tuan Mohamed Azmin Ali [Gombak]: ...Serius, serius! Ini bukan politik, ini serius. Sedangkan Pakatan Rakyat...

Datuk Haji Mohamad bin Haji Aziz [Sri Gading]: ...Kalau Barisan Nasional hendak anjurkan, 500,000 pun boleh... *[Dewan riuh]*

Timbalan Yang di-Pertua [Datuk Ronald Kiandee]: Yang Berhormat..

Datuk Bung Moktar bin Radin [Kinabatangan]: ...Kalau kita *organise* sendiri...

Timbalan Yang di-Pertua [Datuk Ronald Kiandee]: Yang Berhormat Gombak tidak beri jalan Yang Berhormat.

Datuk Haji Mohamad bin Haji Aziz [Sri Gading]: ...Kita bukan hendak main politik...

Tuan Mohamed Azmin Ali [Gombak]: ...Dengar dahulu...

Datuk Haji Mohamad bin Haji Aziz [Sri Gading]: ...Mari kita bersama-sama, apa yang diusulkan oleh Yang Amat Berhormat Perdana Menteri...

Tuan Mohamed Azmin Ali [Gombak]: ...Saya hendak cadangkan..

Datuk Haji Mohamad bin Haji Aziz [Sri Gading]: ...Usul Perdana Menteri kita rakyat Malaysia menyokong Palestin...

Tuan Mohamed Azmin Ali [Gombak]: Ada cadangan. Yang Berhormat Sri Gading, lepas ini bangun berbahaslah. Yalah, dia dah bersungguh-sungguh, tidak dapat juga jadi Timbalan Menteri, Senator yang dapat Tuan Yang di-Pertua...

Dato' Shamsul Anuar bin Haji Nasarah [Lenggong]: ...Apalah Gombak.

Tuan Mohamed Azmin Ali [Gombak]: Tuan Yang di-Pertua, walau bagaimanapun saya menyambut baik inisiatif yang diambil oleh Perdana Menteri untuk mengemukakan usul ini walaupun agak lambat dan lembap, dalam mengambil pendirian sebelum ini. Cuma kadang-kadang saya bimbang kesungguhan dan komitmen kita untuk memberikan mesej yang jelas terhadap keganasan dan kebiadaban Zionis Israel ini, perlu didukung oleh semua pihak. Namun ketika rakyat Malaysia bangun untuk menentang keganasan ini, pada hari Jumaat yang lalu, 4 Jun yang lepas, kita solat Jumaat di Masjid Kampung Baru.

■ 1500

Khutbah Masjid Kampung Baru yang sepatutnya mengambil kesempatan untuk memahami dan menghayati sentimen umat Islam di Palestin mengemukakan cadangan-cadangan untuk mengutuk keganasan. Pada hari yang sama, khutbah Jumaat di Kampung Baru bertajuk "*Marilah Kita Mendukung Semangat 1Malaysia*". Tidak langsung sensitif. Puluhan ribu umat Islam dan rakyat Malaysia sedang berhimpun untuk menegur dan mengutuk keganasan Israel. Khutbah Jumaat bertajuk "*Marilah Dukung Gagasan 1Malaysia*".

Di mana tanggungjawab Majlis Agama Islam Wilayah Persekutuan? Di mana tanggungjawab Menteri Agama untuk membangkitkan semangat kesepaduan menentang keganasan di bumi Palestin khususnya di Gaza?

Tuan Yang di-Pertua, sebab itu saya lihat usul ini tempang. Walaupun ada beberapa cadangan yang baik tetapi masih tempang dan tidak sempurna. Telah dinyatakan tadi dalam usul yang dibentangkan oleh Yang Amat Berhormat Perdana Menteri langsung tidak menegur dan menekankan peranan Amerika Syarikat dalam melindungi Zionis Israel. Tidak ada. Sebab itu beberapa pembahas bangun mencadangkan supaya Kerajaan Malaysia lebih berani untuk memasukkan satu lagi para dalam usul ini. Memberikan amaran yang keras kerana kerajaan Amerika Syarikat juga mempunyai tanggungjawab moral untuk menghentikan kebiadaban dan keganasan Zionis Israel.

Kalau Yang Amat Berhormat Perdana Menteri boleh bersetuju dengan Presiden Barack Obama ketika lawatannya ke Washinton D.C. untuk menyokong usul sekatan ekonomi terhadap Iran atas alasan kononnya Iran sedang membangunkan senjata nuklear, mengapa Yang Amat Berhormat Perdana Menteri tidak berani untuk mengambil pendirian yang sama menegur Presiden Barack Obama hentikan pembangunan senjata nuklear oleh Israel... [Tepuk] Maknanya kerajaan UMNO dan Barisan Nasional mengambil sikap *double standard*, bersekongkol dengan Amerika dalam satu perkara tetapi pada masa yang sama tidak berani menegur Amerika Syarikat untuk mengenakan sekatan ekonomi terhadap Zionis Israel yang secara terang-terangan juga terlibat dalam pembangunan senjata nuklear.

Apakah ini pendirian yang perlu kita sokong? Sebab itu apabila Yang Amat Berhormat Perdana Menteri mencadangkan supaya Turki memainkan peranan yang lebih agresif, mengambil tindakan di bawah peruntukan *Statute Rome*, saya tidak ada halangan. Namun saya juga bersetuju dengan Yang

Berhormat Permatang Pauh. Sementara kita boleh meminta dan merayu dan menggesa Turki, Jordan dan Mesir untuk memainkan peranan yang lebih besar, di mana peranan Malaysia, di mana peranan Malaysia? Apakah Kerajaan UMNO dan Barisan Nasional bersedia untuk menamatkan perkhidmatan yang diberikan kepada APCO Worldwide Sdn. Bhd.? [Tepuk]

Jawab, Yang Berhormat Sri Gading. Mungkin wakil parti APCO ada di sini, daripada Putatan... [Ketawa] Di mana kesungguhan kita? APCO ditunjangi oleh Zionis Israel. UMNO boleh tandatangan perjanjian dengan Zionis Israel. Di mana, di mana pendirian kita? Ini yang saya kata *double standard*. Namun rakyat Malaysia bukan bodoh. Sebab itu bila UMNO anjurkan demonstrasi, orang tidak mahu pergi. Mereka tahu ini hipokrit... [Dewan riuh] [Tepuk]

Dalam satu masa mereka menyerang Amerika, menyerang Israel, dalam masa senyap-senyap UMNO tandatangan perjanjian dengan APCO. Wahai Yang Berhormat Sri Gading, jawab dengan pengundi Sri Gading. Di mana pendirian UMNO dalam perkara ini? Apakah UMNO bersedia untuk menamatkan perkhidmatan dengan APCO Worldwide Sdn. Bhd... [Dewan riuh]

Tuan Mohd. Yusmadi Mohd. Yusoff [Balik Pulau]: Yang Berhormat Gombak.

Tuan Mohamed Azmin Ali [Gombak]: Kerajaan...

Tuan Mohd. Yusmadi Mohd. Yusoff [Balik Pulau]: Sedikit. Balik Pulau.

Tuan Mohamed Azmin Ali [Gombak]: Ya, Yang Berhormat Balik Pulau.

Tuan Mohd. Yusmadi Mohd. Yusoff [Balik Pulau]: Yang Berhormat Gombak, saya mohon pandangan Yang Berhormat Gombak sebab saya ada maklumat bahawa Ambassador Marc Ginsberg, Senior Vice President APCO bersama-sama dengan AIPAC iaitu pelobi Yahudi yang paling kuat yang menggesa dasar yang memihak kepada Israel di Amerika dan ini merupakan hubungan terang-terangan APCO dan juga AIPAC, pelobi Israel.

Timbalan Yang di-Pertua [Datuk Ronald Kiandee]: Masa sudah habis, ya.

Tuan Mohd. Yusmadi Mohd. Yusoff [Balik Pulau]: Apakah pendirian kerajaan? Satu. Yang kedua, saya hendak mohon sedikit penjelasan. Baru-baru ini, satu badan yang tertua Yahudi, *B'nai B'rith International* menggesa, menghantar surat kepada John Kerry dan Richard Lugar selaku Jawatankuasa Hubungan Luar Amerika Syarikat agar mengenakan tindakan ataupun memboikot Ketua Pembangkang atas alasan kerana membangkitkan isu menentang APCO dengan menghubungkan kait Israel...

Timbalan Yang di-Pertua [Datuk Ronald Kiandee]: Yang Berhormat.

Tuan Mohd. Yusmadi Mohd. Yusoff [Balik Pulau]: ...Di dalam *Intelligent Personal in the Police IT Unit*. Saya mohon penjelasan.

Timbalan Yang di-Pertua [Datuk Ronald Kiandee]: Yang Berhormat Gombak, habiskan, Yang Berhormat.

Tuan Mohamed Azmin Ali [Gombak]: Ya, terima kasih Yang Berhormat Balik Pulau. Maklumat yang diberikan memang sudah menjadi maklumat umum. Dunia mengetahui bahawa hipokrasi di dalam UMNO dan Barisan Nasional itu luar biasa sama sekali. Sebagai contoh, apabila Hamas menang dalam pilihan raya yang dibuat secara demokratik, adil dan bebas, Israel tidak mengiktirafnya. Amerika juga tidak mengiktirafnya. Maka budak suruhan seperti UMNO juga tidak

mengiktiraf Hamas. Kalau benar, kalaulah usul ini mahu dijadikan usul yang serius, Yang Berhormat Sri Gading. Kalau benar kamu serius, kalau benar UMNO serius untuk membawa usul ini, hari ini Yang Amat Berhormat Perdana Menteri kena tampil semula ketika menggulung. Yang Amat Berhormat Perdana Menteri, UMNO dan Barisan Nasional mesti mengiktiraf kerajaan Hamas yang dipilih oleh rakyat Palestin... [Tepuk]

Kalau berani. Namun, kalau menjadi budak suruhan Amerika, kalau mendengar nasihat APCO, saya percaya perkara ini tidak akan diulas oleh Yang Amat Berhormat Perdana Menteri atau Yang Berhormat Menteri Luar yang hadir pada petang ini...

Timbalan Yang di-Pertua [Datuk Ronald Kiandee]: Ya, terima kasih Yang Berhormat.

Tuan Mohamed Azmin Ali [Gombak]: Akhirnya, Tuan Yang di-Pertua, kalau... *You help me, I help you...* [Ketawa]

Tuan Yang di-Pertua, ini isu serius. Serius! Kalau UMNO boleh bayar RM77 juta kepada APCO, UMNO boleh bayar RM77 juta kepada Zionis Israel, apa makna usul ini? Tidak ada makna. Pembobongan! Lebih baik RM77 juta ini kita ambil dan hantar terus kepada pejuang-pejuang dan rakyat di Palestin... [Tepuk] UMNO sanggup bagi pada Zionis RM77 juta tetapi UMNO tidak sanggup berkorban demi rakyat Palestin.

Akhirnya, Tuan Yang di-Pertua, saya ingin mengucapkan penghargaan dan syabas kepada sukarelawan-sukarelawan daripada Malaysia dan daripada seluruh negara yang telah berani berdepan dengan sikap angkuh, sombong dan biadab Zionis Israel untuk menghantar mesej keadilan dan keamanan sejagat. Mudah-mudahan Allah akan membantu kita, memberikan kekuatan kepada kita semua. Jangan lagi bersekongkol dengan Zionis Israel dan jangan lagi bersekongkol dengan APCO Worldwide Sdn. Bhd. yang ditaja oleh UMNO dan Barisan Nasional. Terima kasih.

Timbalan Yang di-Pertua [Datuk Ronald Kiandee]: Yang Berhormat Keningau.

3.08 ptg.

Datuk Seri Joseph Pairin Kitingan [Keningau]: Terima kasih Tuan Yang di-Pertua. Saya turut berdiri untuk menyokong usul yang telah dibentangkan oleh Yang Amat Berhormat Perdana Menteri pada pagi hari ini. Terlebih dahulu, saya bersyukur kepada Tuhan Yang Maha Esa kerana dengan berkat perlindungannya, dalam keadaan huru-hara serangan tentera Rejim Zionis Israel, rakyat Malaysia kita telah kembali ke negara dengan selamatnya.

Tuan Yang di-Pertua, serangan tentera Rejim Zionis Israel itu mengingatkan saya peristiwa yang telah berlaku pada 9 September 2001 yang mana serangan oleh pengganas antarabangsa dilakukan terhadap rakyat Amerika Syarikat termasuklah beberapa rakyat Malaysia yang tidak bersalah sama sekali turut terkorban.

■1510

Saya melihat bahawa apa yang dilakukan oleh tentera Israel adalah sama dalam erti kata tindakan keganasan yang tidak berkemanusiaan dan tidak seharusnya dilakukan terutama sekali terhadap kumpulan misi aman yang hanya ingin membantu rakyat Gaza dan Palestin yang memerlukan ubat, khidmat

perubatan serta juga makanan. Ini adalah satu peristiwa yang paling gelap dalam sejarah usaha kita untuk membawa keamanan dan kemajuan di rantau itu.

Oleh sebab itu Parti Bersatu Sabah (PBS) turut bersetuju bahawa tindakan ganas yang tidak berkemanusiaan itu, yang tidak bermoral dan tidak mengikuti undang-undang antarabangsa dan yang telah mengakibatkan beberapa nyawa yang tidak bersalah terkorban, dikutuk sekeras-kerasnya dan harus diambil tindakan keadilan antarabangsa dengan secepat mungkin. Justeru, Parti Bersatu Sabah (PBS) menyokong sekuat-kuatnya usul yang telah dibentangkan dan dibawa oleh Yang Amat Berhormat Perdana Menteri sebentar pagi tadi.

Tuan Yang di-Pertua, bagi pihak PBS saya turut menyokong. Terima kasih.

Timbalan Yang di-Pertua [Datuk Ronald Kiandee]: Yang Berhormat Bachok.

3.12 ptg.

Tuan Haji Nasharudin Mat Isa [Bachok]: Terima kasih Tuan Yang di-Pertua. Saya juga ingin mengambil kesempatan ini untuk memberikan pandangan bagi memberikan input daripada pihak PAS terhadap isu yang sedang dibincangkan di seluruh dunia berkaitan dengan keganasan Yahudi terhadap kemanusiaan.

Beberapa perkara telah dibangkitkan oleh Yang Amat Berhormat Perdana Menteri ketika membentangkan usul pada pagi tadi. Ingin saya sentuh perkara keempat yang dibangkitkan oleh Yang Amat Berhormat Perdana Menteri untuk memutuskan bagi Malaysia untuk bekerjasama dengan negara-negara anggota pertubuhan persidangan OIC, NAM dan sebagainya dalam para keempat tersebut.

Tuan Yang di-Pertua, artikel sembilan OIC ada menyebut, dengan izin saya bacakan, *"Extraordinary Sessions will be held, whenever the interests of Ummah warrant it, to consider matters of vital importance to the Ummah and coordinate the policy of the organization accordingly. An Extraordinary Session may be held at the recommendation of the Council of Foreign Ministers or on the initiative of one of the member states or the Secretary-General, provided that such initiative obtains the support of simple majority of the member states."*

Soalan saya, apa peranan Malaysia? Sebagai bekas mantan Pengerusi OIC anggota yang dihormati oleh OIC tetapi sampai ke hari ini saya lihat belum ada sebarang usaha untuk memanggil kepada persidangan khas yang diperuntukkan oleh Artikel 9 dalam *Chapter* OIC ini, bagi membolehkan OIC bertindak secara yang lebih konkrit, teratur dan dapat dimanfaatkan oleh rakyat di Palestin. Beberapa cadangan telah dikemukakan tadi. Antaranya termasuk cadangan dari Yang Berhormat Marang, sudah sampai masanya untuk diwujudkan angkatan tentera bersama di kalangan negara-negara OIC bagi membantu negara-negara yang sedang diancam oleh musuh khususnya Palestin yang berada di hadapan mata kita.

Perkara kedua yang ingin saya bangkitkan adalah pengiktirafan yang hendak diberikan oleh kerajaan kepada sukarelawan kita yang kembali seramai 12 orang, yang dalam perjalanan akan sampai pada malam ini. Tuan Yang di-Pertua, kita perlu mengiktiraf semua usaha yang dilakukan oleh badan-badan bukan kerajaan yang begitu komited dan serius untuk membantu rakyat terutamanya umat Islam di Palestin ataupun rakyat di Palestin secara keseluruhannya. Pengiktirafan ini seharusnya dengan cara memberikan ruang dan beberapa

insentif supaya mereka dapat terus memperjuangkan isu ini dengan lebih luas dan terbuka.

Misi kemanusiaan ke Palestin seharusnya menjadi agenda tahunan yang perlu dipusatkan oleh Kerajaan Malaysia malah seluruh negara umat Islam di dunia ini. Ini sebagai tanda keprihatinan kita tidak bermusim dan tidak hanya menunggu hanya apabila berlaku peristiwa yang menyayat hati seperti mana yang dialami baru-baru ini. Saya telah mencadangkan kepada Kerajaan Negeri Selangor yang telah pun mendapat respons yang positif daripada Yang Amat Berhormat Menteri Besar dan juga EXCO di mana contohnya pada bulan Rejab akan datang ini sebagai bulan untuk kita bersama dengan Palestin, bulan bersama dengan Masjid Al-Aqsa kerana dalam bulan Rejab inilah berlakunya peristiwa al Isra' wal Mikraj. Tidak hanya *al Isra' wal Mikraj* itu kita sambut dan ingati hanya sekadar perjalanan Rasulullah SAW daripada Masjidil Haram ke Sidratul Muntaha tanpa kita hubung kaitkan dengan Masjid Al-Aqsa dengan Palestin sebab dalam perjalanan itu Rasulullah SAW dibawa singgah dahulu ke Palestin. Dibawa singgah dahulu di Masjid Al-Aqsa sudah tentulah ada petanda-petanda yang hendak ditunjukkan oleh Allah SWT terhadap ummah, terhadap orang Islam dalam hal yang berkaitan dengan Palestin dan Masjid Al-Aqsa.

Seterusnya Tuan Yang di-Pertua, menyedari bahawa ekonomi negara haram Yahudi semakin berkembang dan telah menyertai *Organization of Economic Corporation and Development* (OECD) pada bulan Mei 2010, maka satu usaha kolektif perlu dilakukan bagi menyekat dan melumpuhkan seluruh aktiviti ekonomi di negara haram tersebut. Saya mengambil *indicator* kekuatan ekonomi negara haram Yahudi itu seperti mana yang dilaporkan beberapa pihak, telah meletakkan negara Yahudi ini contohnya sebagai *the second-largest number of startup companies in the world (after the United States)* dan dengan izin juga, *the largest number of NASDAQ-listed companies outside North America*.

Kita menyedari terdapat segelintir pihak yang telah melancarkan kempen boikot barangan Israel namun ianya perlu diperhalusi lagi dan dijalankan dengan lebih sistematik dan efektif agar rakyat Malaysia yang bekerja di syarikat-syarikat berkaitan dengan Yahudi dan Israel tidak dizalimi dengan serta-merta. Contohnya pemberian lesen kepada industri-industri yang kita semua tahu ada kaitannya dengan Amerika, ada kaitannya dengan Israel yang banyak beroperasi dalam negara kita. Ini harus diberikan perhatian oleh kerajaan, jangan semudah itu sahaja hendak diberikan lesen perniagaan dan ruang untuk mereka menjalankan aktiviti dan perniagaan mereka dalam apa sahaja bentuk syarikat ataupun perniagaan yang ada dalam Malaysia ini.

Tuan Yang di-Pertua, seterusnya kesedaran terhadap isu Palestin di Malaysia seharusnya diperhebat dan diperluaskan kerana ia bukan sahaja isu agama dan umat Islam tetapi ia merentas aspek keagamaan dan kemanusiaan. Kerajaan Malaysia seharusnya 'mengagendakan' isu Palestin sebagai satu misi bersama rakyat Malaysia contohnya hari yang disebut di peringkat antarabangsa sekarang, adakan hari Naqbah Palestin kenapa tidak diadakan di peringkat pusat? Hari Al-Quds sedunia contohnya, kita adakan satu hari yang khusus untuk mengaitkan Masjid Al-Aqsa dengan perjuangan rakyat Palestin dengan penderitaan yang dialami oleh rakyat Palestin.

Saya khuatir Tuan Yang di-Pertua sekiranya perjuangan dan pembelaan kita terhadap isu Palestin ini hanya akan berakhir apabila selesai isu kapal ataupun misi keamanan dan misi bantuan kapal-kapal yang menghantar bantuan ke Gaza. Umat Islam di Malaysia khususnya golongan muda sewajarnya terus disegarkan dengan isu ini. Kita percaya tentera-tentera Israel membunuh pemuda-

pemuda di Palestin dengan menggunakan senjata dan bom sehingga berceraai jasad dan nyawa mereka. Akan tetapi kita juga harus sedar bahawa tindakan Zionis membunuh jiwa dan hati pemuda-pemuda ataupun golongan muda di Malaysia ini dengan menggunakan segmen hiburan yang melampau dan melalaikan.

Saya telah membangkitkan isu bagaimana lesen telah diberi kepada satu pesta nyanyi-nyanyian dan hiburan yang berlangsung selama 24 jam, yang diberikan izin oleh pihak kerajaan menjemput Kumpulan Pete Bone untuk berpesta yang asalnya hendak dibuat di Pahang kemudiannya dibatalkan dan diganti di Bukit Kiara. Kenapa harus ini diberikan laluan yang begitu mudah? Tadi setelah saya sebut kalau di sana mereka membunuh anak-anak muda dengan peluru dan senjata, di sini mereka membunuh anak-anak muda kita dengan merosakkan akhlak mereka dengan berbagai-bagai jenama-jenama bentuk hiburan yang bersifat hedonistik. Bersifat melampau yang boleh membawa kepada kecurangan ataupun juga boleh membawa kepada kehancuran jati diri akhlak anak-anak muda kita. Setiap sahaja kelakuan buruk ini berlaku pasti akan kita lihat di belakangnya agenda Yahudi yang seperti mana juga disebutkan oleh Yang Berhormat Marang tadi mereka punya satu konsep yang telah dididik di dalam agama mereka apa yang disebut sebagai *the chosen people on earth*.

■1520

Merekalah umat yang terpilih, merekalah Shakbullah Al-Mokhtar, merekalah yang merupakan umat yang terbaik di atas muka bumi ini, yang lain daripada mereka semuanya jahat belaka, semuanya adalah *goyum* yang harga, nilai, nyawa manusia dan akhlak yang lain daripada Yahudi ini adalah amat rendah.

Akhirnya Tuan Yang di-Pertua, saya ingin mencadangkan di sini, pernah seperti mana yang kita cadangkan ataupun saya cadangkan ketika kita mengadakan satu sidang khas di Parlimen ini sempena dengan peperangan Gaza baru-baru ini, iaitu bagaimana kita harus membantu rakyat Palestin khususnya golongan muda. Saya ingin mendapat penjelasan walaupun tidak pada petang ini, berapa banyakkah biasiswa contohnya ataupun kemudahan pembelajaran yang diberikan kepada rakyat Palestin yang ada datang belajar di Malaysia contohnya?

Kemudahan-kemudahan perubatan yang suatu ketika dahulu kita terkenal ketika berlaku peristiwa di Bosnia, bagaimana rawatan perubatan dapat kita berikan kepada mereka yang cedera di Medan, dibawa ke sini diberikan percuma sehingga mereka sihat. Ada yang terus tinggal di sini, ada yang kembali ke tanah air mereka. Mengapa tidak agenda dan program yang sama kita lakukan kepada mangsa-mangsa perang, mangsa-mangsa kezaliman yang kita lihat setiap hari di dalam media, bagaimana penderitaan mereka sampai kepada peringkat ketika embargo kepada Gaza berlaku, banyak sekali *operation*, pembedahan di Palestin itu tanpa menggunakan bius kerana kekurangan peralatan.

Jadi kenapa tidak kita rangkakan program yang sedemikian? Apatah lagi sekarang ini selepas ditekan, selepas kita menyatakan pendirian kita, sempadan Rafah yang sudah pun dibuka, saya rasa mungkin sudah ada sedikit laluan di sana untuk memudahkan cadangan saya yang terakhir tadi. Terima kasih Tuan Yang di-Pertua.

Beberapa Ahli: [Bangun]

Timbalan Yang di-Pertua [Datuk Ronald Kiandee]: Yang Berhormat Serian... [Disampuk] Dia bangun Yang Berhormat.

3.22 ptg.

Datuk Richard Riot anak Jaem [Serian]: Terima kasih Tuan Yang di-Pertua kerana telah memberi peluang kepada saya untuk berucap bagi pihak parti saya iaitu SUPP. Parti Rakyat Bersatu Sarawak (SUPP) menyokong sekuat-kuatnya usul yang dibentangkan oleh Yang Amat Berhormat Perdana Menteri pada pagi tadi.

Tuan Yang di-Pertua, parti SUPP turut menyertai semua rakyat Malaysia mengutuk sekeras-kerasnya tindakan zalim dan tidak berperikemanusiaan rejim Israel menghantar komandonya menyerang kapal Mavi Marmara di perairan antarabangsa yang membawa misi bantuan kemanusiaan iaitu keperluan asas seperti makanan, perubatan dan bahan binaan bagi keperluan rakyat Palestin di Gaza.

Adalah difahamkan bahawa kesemua objektif dan pergerakan *Freedom Flotilla* atau konvoi itu dilaksanakan berpanduan kepada Resolusi 1860 (2009) yang ditetapkan oleh Majlis Keselamatan Pertubuhan Bangsa-Bangsa Bersatu serta undang-undang maritim lain yang berkaitan. Mereka tidak membawa bersama apa-apa bentuk senjata kerana konvoi ini merupakan sebuah konvoi bantuan kemanusiaan yang akan disampaikan oleh sukarelawan-sukarelawan dari kalangan masyarakat awam sahaja.

Tuan Yang di-Pertua, kita rasa terkejut apabila terbaca laporan laman web Pergerakan Pembebasan Gaza yang menyatakan, *"Ketika keadaan masih gelap, komando Israel yang turun dari helikopter ke kapal Mavi Marmara terus melepaskan tembakan sebaik menjejakkan kaki di dek kapal itu"*. Tindakan tidak berperikemanusiaan komando Israel ini telah menyebabkan sembilan orang sukarelawan maut dan beberapa orang lagi cedera. Kerakusan rejim Israel yang tidak menghormati undang-undang antarabangsa patut dikutuk dan dikecam sekeras-kerasnya.

Tuan Yang di-Pertua, tindakan tidak berperikemanusiaan rejim Israel ini jelas melanggar undang-undang antarabangsa dan ia dikesali kerana turut membabitkan rakyat Malaysia. Dakwaan media Barat yang mengatakan Mavi Marmara memulakan serangan ke atas tentera Israel juga tidak berasas dan amat dikesali.

Tuan Yang di-Pertua, kita rasa amat bersyukur setelah mendapat berita bahawa 12 rakyat Malaysia yang berada di dalam kapal Mavi Marmara yang diserang tentera Israel sudah dibebaskan dan dihantar ke Jordan. Kita bersyukur kepada Tuhan Yang Maha Esa kerana wira-wira Malaysia ini telah selamat tiba di tanah air.

Tuan Yang di-Pertua, akhir sekali saya mewakili SUPP mengulangi pendirian kami iaitu pendirian SUPP bahawasanya kami mengutuk sekeras-kerasnya rejim Israel serta askar-askarnya di atas perbuatan yang sangat keji, kejam dan tidak berperikemanusiaan itu. Tuan Yang di-Pertua, saya menyokong.

Beberapa Ahli: [Bangun]

Timbalan Yang di-Pertua [Datuk Ronald Kiandee]: Yang Berhormat Bukit Bendera.

3.27 ptg.

Tuan Liew Chin Tong [Bukit Bendera]: Terima kasih Tuan Yang di-Pertua. Saya mewakili DAP sebagai Setiausaha Antarabangsa DAP untuk menyertai perbahasan usul ini berkenaan dengan isu keganasan rejim Israel.

Datuk Haji Mohamad bin Haji Aziz [Sri Gading]: Tuan Yang di-Pertua, boleh saya tumpang tanya? Apakah perbincangan ini dibuka kepada semua atau wakil-wakil parti dan wakil-wakil parti itu berapa orang? Saya mohon sedikit penjelasan.

Timbalan Yang di-Pertua [Datuk Ronald Kiandee]: Ya, saya ada *list*. Yang Berhormat, kita ada buat usul tadi dan perbincangan ini akan dilanjutkan sehingga selesai perbincangan. Kalau wakil parti, maknanya 13 dari sini... [*Merujuk kepada blok kerajaan*] dan empat dari sini... [*Merujuk kepada blok pembangkang*] Jadi kita ikut *sequence* itu, wakil parti dari sini dan kita akan mengambil wakil dari sini Yang Berhormat.

Dato' Mahfuz bin Haji Omar [Pokok Sena]: Ketua Bahagian Sri Gading kemudian sikit... [*Ketawa*]

Timbalan Yang di-Pertua [Datuk Ronald Kiandee]: Jadi sebelah sini akan mendapat peluang, wakil-wakil parti di sebelah kerajaan akan mendapat peluang, semuanya akan mendapat peluang. Bebas sudah berucap seorang dan dalam senarai saya ada seorang lagi akan berucap kemudian. Ya teruskan Yang Berhormat.

Tuan Liew Chin Tong [Bukit Bendera]: Tidak apalah, Yang Berhormat Sri Gading boleh tunggu. Kita mengutuk keganasan Israel sekeras-kerasnya atas prinsip demokrasi, keadilan dan kemanusiaan. Tindak laku Regim Zionis ini tidak boleh diterima langsung tetapi, ini juga satu peluang untuk kita *reflect* ataupun memikirkan lagi peranan Malaysia di dunia atau peranan negara kita di peringkat antarabangsa.

Bayangkan isu ini berlaku pada masa Tun Dr. Mahathir, Malaysia akan tampil ke depan dan memimpin pendapat dunia. Malaysia akan memimpin *opinion leader*, sebagai *opinion leader and to lead and not to be lead*, ini penting. Walaupun negara kita kecil, negara kita hanya ada 27 juta penduduk tetapi ada juga negara-negara yang seperti Malaysia tetapi dapat memainkan peranan yang penting sebagai *middle power*.

■ 1530

Middle power seperti Korea, seperti Australia, walaupun penduduknya bukan besar, tidak ramai tetapi dapat memainkan peranan yang penting untuk *influence opinion*.

Bagi isu ini, isu pokok isu ini bukan – sukarelawan itu memang kita sayangi. Rakyat Malaysia yang kita – ini wira Malaysia tetapi, yang penting isu pokok pilihan raya Palestin pada Januari 2006. Pilihan raya Palestin pada 2006 telah memilih Hamas sebagai kerajaan. Seramai 76 ahli Hamas dipilih dalam Parlimen yang mengandungi 132 orang Ahli Parlimen. Ini isu pokok. Isu pokok ini hendaklah dikendalikan.

Malaysia sebagai bekas Pengerusi NAM, bekas Pengerusi OIC haruslah memimpin pandangan dunia untuk mengiktiraf keputusan pilihan raya 2006 di Palestin. Ini isu pokok kerana *blockage* Gaza ini dilakukan oleh Israel kerana Israel mengatakan Hamas itu *terrorist*, Hamas itu pengganas dan tidak harus diiktiraf oleh dunia. Itulah asas Israel untuk mengadakan *blockage* ini dan *blockage* ini telah mengakibatkan banyak kesan buruk terhadap penduduk di Palestin. Ini juga satu taktik Israel untuk *divide and rule*, satu bahagian Fatah, satu bahagian Gaza dan tidak mengiktiraf keputusan pilihan raya 2006 Palestin.

Parlimen mulia ini telah membahaskan keganasan Israel pada 12 Januari 2009. Kita sudah faham, kita sudah tahu isu Palestin dengan sepenuhnya.

Malangnya, kerajaan terutamanya Yang Amat Berhormat Perdana Menteri, semasa lawatan Yang Amat Berhormat Perdana Menteri ke White House pada 12 April 2010 baru-baru ini tidak membawa isu ini kepada Presiden Obama. Dalam kenyataan rasmi White House, isu ini tidak disebut langsung. Isu Palestin tidak disebut langsung, isu Hamas, masalah Israel langsung tidak disebut dalam perjumpaan 45 minit di antara Yang Amat Berhormat Perdana Menteri dengan Presiden Obama.

Sebagai satu *middle power*, saya harap kerajaan boleh mengambil pandangan pihak sini bahawa isu pokok itu, isu keputusan pilihan raya Palestin pada tahun 2006 dan ini bukan isu...

Tuan Haji Khalid bin Abd. Samad [Shah Alam]: Terima kasih Tuan Yang di-Pertua dan Yang Berhormat Bukit Bendera. Saya hendak tanya pandangan Yang Berhormat Bukit Bendera. Sekiranya Kerajaan Malaysia tidak mengiktiraf Hamas, tidakkah ini bererti bahawa kita memberikan satu legitimasi kepada tindakan Israel dan dakwaan Israel bahawa Hamas itu adalah pengganas dan dengan itu, apa sahaja yang dilakukan oleh Israel terhadap penduduk di Gaza yang menyokong Hamas adalah *justify* ataupun boleh diterima. Tidakkah dengan kita sendiri tidak mengiktiraf Hamas, maka kita membantu Israel dan menghalalkan tindakan Israel walaupun kita mengeluarkan usul yang mengutuknya? Ini satu perkara yang mungkin perlu dijelaskan.

Tuan Liew Chin Tong [Bukit Bendera]: Saya bersetuju...

Prof. Dr. P. Ramasamy [Batu Kawan]: Yang Berhormat Bukit Bendera, mungkin sama dengan Yang Berhormat daripada Shah Alam. Isu Palestin ini bukan semudah seperti yang telah dibentangkan di dalam usul, adalah lebih kompleks. Isu ini politik dalaman antara PLO dan Hamas. Saya rasa sampai hari ini, Malaysia tidak ada pendirian sama ada menyokong PLO, sama ada menyokong Hamas, dunia Arab sendiri kabur, satu bahasa satu agama tetapi pecah dari segi nasionalisme dan ini saya rasa satu yang lebih disukai Amerika Syarikat. Jadi tanya Yang Berhormat Bukit Bendera ini, macam mana pendirian Malaysia ini terhadap Hamas? Adakah Hamas sebagai satu organisasi *terrorist* seperti mana yang dilabelkan oleh Amerika Syarikat atau Hamas ini sebenarnya mewakili aspirasi rakyat Palestin? Saya rasa ini tidak jelas daripada Malaysia sebab itu usul yang telah dibentangkan oleh Yang Amat Berhormat Perdana Menteri adalah usul kosong!... [Tepuk]

Tuan Liew Chin Tong [Bukit Bendera]: Saya bersetuju dengan pandangan Yang Berhormat Shah Alam dan juga Yang Berhormat Batu Kawan bahawa inilah isu pokok...

Datuk Haji Mohamad bin Haji Aziz [Sri Gading]: Yang Berhormat, boleh saya celah? Tidak timbul Tuan Yang di-Pertua, soal Hamas atau Fatah, yang penting seluruh kerajaan dan rakyat Malaysia menyokong perjuangan rakyat Palestin. Kita jangan main politik di sini. Kita jelas menyokong rakyat Palestin yang ditindas oleh Zionis Israel yang kejam dan bersifat bengis, bersifat kebinatangan. Itu yang penting kita menyokong usul ini di Dewan yang mulia ini.

Timbalan Yang di-Pertua [Datuk Ronald Kiandee]: Yang Berhormat Bukit Bendera, saya minta Yang Berhormat habiskan.

Tuan Liew Chin Tong [Bukit Bendera]: Okey. Saya gulung. Ya. Saya ini...

Timbalan Yang di-Pertua [Datuk Ronald Kiandee]: Masa sudah habis Yang Berhormat.

Tuan Liew Chin Tong [Bukit Bendera]: Okey. Apa yang penting seperti apa yang saya katakan tadi adalah Malaysia haruslah memainkan peranan sebagai *middle power* di dunia ini supaya *we lead and not to be lead* supaya kita memimpin pandangan dunia dan bukan dipimpin oleh orang lain dan mengaburkan isu-isu yang pokok, isu-isu pokok seperti apa saya kata dan juga saudara-saudara yang tadi kata itu iaitu keputusan pilihan raya Palestin 2006.

Timbalan Yang di-Pertua [Datuk Ronald Kiandee]: Terima kasih Yang Berhormat.

Tuan Liew Chin Tong [Bukit Bendera]: Saya harap kerajaan boleh menggunakan kejadian ini sebagai satu *lesson* untuk kita memajukan dasar luar negara ini supaya kita tidak jadi pengikut tetapi jadi pemimpin. Terima kasih.

Timbalan Yang di-Pertua [Datuk Ronald Kiandee]: Wakil SPDP, Yang Berhormat Bintulu.

3.38 ptg.

Dato' Seri Tiong King Sing [Bintulu]: Terima kasih Tuan Yang di-Pertua. Saya bagi pihak SPDP dengan lazimnya menyokong sepenuh-penuh usul yang telah dibawa oleh Yang Amat Berhormat Perdana Menteri pada pagi ini.

Saya dengan Parti SPDP berasa begitu bangga kerana Yang Amat Berhormat telah membawa satu usul yang tepat pada masa dan ketikanya yang mencerminkan pegangan yang kuat kerajaan Malaysia kepada keadilan dan keamanan dunia. Hal ini memperlihatkan keprihatinan Yang Amat Berhormat Perdana Menteri begitu khasnya dan kerajaan Malaysia amnya kepada kebiadaban dan tindakan zalim serta ganas kerajaan Rejim Zionis Israel kepada rakyat Gaza khasnya dan rakyat Palestin amnya. Mudah-mudahan usul ini akan membuka mata Majlis Keselamatan khasnya dan amnya kepada Bangsa-Bangsa Bersatu supaya mengambil tindakan sewajarnya kepada kezaliman dan sifat *terrorism* Rejim Zionis Israel yang selama ini telah dibiarkan bermaharajalela mencabuli semua hak-hak kemanusiaan sejagat.

Di samping itu, marilah kira melahirkan rasa terima kasih kepada banyak pihak sehingga membawa pulang enam orang lagi rakyat kita kembali termasuk rakan kita Yang Berhormat Ahli Parlimen Parit... [Tepuk]

Sekali lagi saya bagi pihak SPTP menyokong penuh usul ini dan terima kasih kepada Yang Amat Berhormat Perdana Menteri. Tuan Yang di-Pertua, saya menyokong.

■1540

Timbalan Yang di-Pertua [Datuk Ronald Kiandee]: Yang Berhormat Simpang Renggam.

3.42 ptg.

Tuan Liang Teck Meng [Simpang Renggam]: Terima kasih Tuan Yang di-Pertua. Saya berdiri bagi pihak Parti Gerakan Rakyat Malaysia untuk menyokong sepenuhnya usul yang dibawa oleh Yang Amat Berhormat Perdana Menteri pada pagi ini.

Tindakan Israel menyerang konvoi kapal Freedom Flotila yang membawa 600 aktivis keamanan terdiri daripada 32 buah negara adalah satu tindakan keganasan yang mesti dikecam sehabis-habisnya. Seramai 20 orang aktivis terkorban akibat tindakan komando-komando tentera Zionis adalah bukti yang jelas dan ketara, yang menunjukkan bahawa tindakan ini adalah di luar batasan

norma dan undang-undang antarabangsa. Kebebasan di laut khasnya kebebasan bernavigasi merupakan antara bentuk undang-undang antarabangsa yang tertua. Tindakan Israel yang melanggar undang-undang ini mesti membawa padah yang setimpal dengan tindakan yang tidak masuk akal, Regim Zionis.

Serangan ke atas konvoi keamanan ini juga disangkal dan dikritik oleh semua negara termasuk Majlis Keselamatan PBB. Presiden Majlis Keselamatan PBB, saudara Claude Heller dari Mexico menyatakan dengan izin "*The Council condemn those acts which resulted in the lost at least 10 civilians and many wounded and expresses his condolence to their families*". Menurut Menteri Luar Negeri Turki, Ahmet Davutoğlu, tindakan Israel menyerang konvoi keamanan adalah satu tindakan kelanunan dan *banditisme*. Beliau juga menyatakan bahawa pembunuhan oleh sesebuah negara tidak boleh dipertahankan sama sekali.

Konvoi keamanan yang membawa bekalan asas seperti makanan dan ubat-ubatan, termasuk barang mainan untuk kanak-kanak Gaza tidak patut diserang oleh tentera Zionis sehingga menyebabkan kematian yang ketara. Mereka yang sanggup mengadai nyawa untuk membawa keperluan asas kepada warga Gaza mesti disanjung sebagai syahid. Kepada rakyat Malaysia yang sanggup menganggotai konvoi keamanan ini, saya mengucapkan ribuan terima kasih dan syabas. Mereka adalah dengan izin, "*everyday Heroes*" yang sedia bertindak sejajar dengan prinsip mereka, dan menunjukkan dunia tentang kezaliman Regim Zionis terhadap warga Palestin.

Saya berharap satu penyiasatan yang terbuka dan mendalam akan dikendalikan agar insiden sebegini tidak akan terjadi lagi. Israel sebagai ahli komuniti negara dan ahli Pertubuhan Bangsa-Bangsa Bersatu mesti mematuhi dan menuruti piagam PBB dan juga komitmen-komitmennya di bawah undang-undang antarabangsa. Negara-negara lain khasnya Ahli-ahli Tetap Majlis Keselamatan PBB mesti melakukan apa jua yang diperlukan untuk memastikan Israel berhenti daripada bertindak tanpa menghiraukan komitmen-komitmen ini. Amerika Syarikat yang selalunya menggunakan kuasa vetonya untuk menyangkal resolusi-resolusi yang kritikal terhadap Regim Zionis mesti menjadi dengan izin, *honest broker* untuk keamanan di Palestin.

Tuan Yang di-Pertua, sekatan Israel ke atas Gaza mesti dihentikan sertamerta. Saya berharap Majlis Keselamatan PBB akan bersatu-padu menyeru Israel untuk berbuat demikian. Kalau Majlis Keselamatan gagal mendapat Israel seorang ahli PBB untuk menghormati dan menuruti enam resolusi sejak tahun 1967 sehingga tahun 2009, yang menyatakan bahawa, Gaza adalah Wilayah Palestin, dan akan membentuk satu negara Palestin dan memberi penekanan terhadap keselamatan kesemua warga Gaza dan Palestin, maka PBB dan Majlis Keselamatannya akan dilihat sebagai tidak berwibawa untuk melindungi warga Palestin yang setiap hari ditindas oleh tentera Israel.

Malaysia perlu bergerak cergas mempengaruhi negara-negara lain bersatu-padu, bersatu hati, bergabung dan mendesak kepada pihak terlibat ke meja perundingan, mengadakan gencatan senjata atau menamatkan peperangan. Komitmen Malaysia jelas. Setiap permasalahan yang dihadapi oleh sebuah negara bukan diselesaikan dengan kekerasan tetapi, diselesaikan dengan aman melalui rundingan. Malaysia juga perlu meyakinkan dunia bahawa peperangan di Palestin perlu ditamatkan bukan kerana faktor agama iaitu penindasan Israel terhadap sebahagian besarnya umat Islam Palestin tetapi atas faktor kemanusiaan dan keamanan sejagat yang perlu dipertahankan.

Semua rakyat Malaysia mesti bersatu-padu pada saat yang genting ini dan berdiri bahu ke bahu dengan semua warga Gaza dan Palestin yang ditindas

oleh Rejim Zionis. Seramai 1.5 juta orang rakyat Gaza yang dikepung dan dipenjarakan oleh sekatan Israel ke atas warga Gaza memerlukan sokongan dan doa kita. Sekatan ini yang Majlis Keselamatan sendiri menyatakan sebagai *unjustifiable* mesti ditamatkan serta-merta. Hak asasi warga Gaza yang dicabuli oleh pihak Israel mesti dikembalikan kepada mereka. Malaysia mesti membuat apa jua yang diperlukan dengan menggunakan semua sumber yang kita ada untuk memastikan warga Gaza dan Palestin diberikan penghormatan sebagai insan.

Dengan itu Tuan Yang di-Pertua, Parti Gerakan Rakyat Malaysia dengan penuh hati dan keikhlasan menyokong usul ini.

Timbalan Yang di-Pertua [Datuk Ronald Kiandee]: Yang Berhormat Pasir Mas.

Dato' Ibrahim Ali [Pasir Mas]: Terima kasih Tuan Yang di-Pertua. Bagi pihak pengundi saya di kawasan Pasir Mas, dan juga bagi pihak Ahli-ahli Pertubuhan Pribumi Perkasa Malaysia, dan bagi pihak 126 NGO Melayu di bawah Majlis Perunding Melayu ingin menyatakan setinggi-tinggi tahniah dan menyokong usul yang dibawa oleh Yang Amat Berhormat Perdana Menteri bagi mengecam kekejaman Israel yang telah menyerang rombongan misi kemanusiaan yang berlaku pada 31 Mei baru-baru ini.

Tuan Yang di-Pertua, pada 1 Jun bagi pihak Majlis Perunding Melayu dan Pertubuhan Pribumi Perkasa, saya turut menghantar nota kecaman kepada Presiden Amerika Syarikat Barack Obama melalui kedutaan besarnya di Kuala Lumpur. Antara kandungan dalam surat atas kecaman yang kita buat ialah dengan izin,

"We condemn the attack which was done deliberately to stranger Palestinian leaving Gaza of any aid that could help them breathe and live. It was an act of terrorism on the part of Israel or bribery act down by uncivilized and inhuman people that your country has all this line sanction. We are holding you and your country responsible for the brutal murder of the volunteers who look upon the United State as the super power that protect innocent life and uphold human rights. We have high hopes when you took over the presidency as we thought you will have a different approach in handling the Israel and Palestine issue and also issue regard of Islam but now what we see is that you are no different from the previous president. Israel is very dangerous to the world as the country has never shown any respect for humanity, international law, as well as individual right. "

Ini antara kandungan surat bantahan dan kecaman yang kami hantar kepada Presiden Obama melalui Duta Besar Amerika Syarikat di Kuala Lumpur. Begitu juga surat kepada Benjamin Netanyahu iaitu Perdana Menteri kepada sebuah negara yang tidak diiktiraf bernama Israel, juga lebih kurang mesej yang sama.

Tuan Yang di-Pertua, sukaiah saya di sini mengambil kesempatan untuk mengucapkan tahniah kepada rakyat Malaysia yang telah mengikuti misi kemanusiaan ini, sama ada 12 orang dalam kapal Mavi Marmara ataupun kapal Rachel Corrie iaitu 12 orang dan enam orang termasuklah krew daripada Astro Awani dan juga TV3. Cuma yang saya tidak tahu, kenapa wakil daripada RTM tidak ikut serta?

■1550

Oleh itu Tuan Yang di-Pertua, saya berharap saya tidak perlu lagi banyak beretorik mengenai dengan isu kekejaman Israel, sebab kita semua sudah tahu siapa itu Israel dan keangkuhan dan kebiadaban Israel ini ialah kerana mendapat sokongan daripada kuasa besar iaitu Amerika dan juga barat termasuklah *Great Britain* dan seumpamanya. Jadi negara Israel ini sebuah negara nyamuk sebenarnya tetapi menjadi angkuh kerana mendapat sokongan kuasa besar iaitu Amerika Syarikat dan juga kuasa-kuasa sekutunya yang lain. Jadi kita berharap misi ini akan diteruskan dan kita harap lebih ramai lagi rakyat Malaysia berbilang kaum mengikuti misi keamanan ini. Yang kita tahu antara 12 orang di atas kapal Mavi Marmara dan juga Rachel Corrie ini, kita dapati seorang sahaja iaitu Matthias Chang daripada Perdana *Global Peace* yang turut serta yang lainnya semua iaitu di kalangan umat Melayu rakyat Malaysia. Saya harap lebih ramai lagi rakyat Malaysia berbilang kaum menyertai misi ini pada masa akan datang.

Tuan Yang di-Pertua, saya sebut tadi masalah kuasa besar. Kuasa besar inilah yang menjadi pendorong kepada Israel dan dalam aspek ini Tuan Yang di-Pertua, saya ingin mengambil kesempatan untuk menyampaikan rasa penghargaan, terima kasih dan tahniah kepada Yang Amat Berbahagia Tun Dr. Mahathir bin Mohamad iaitu mantan Perdana Menteri yang menjadi penaung kepada *Perdana Global Peace Organization*, yang menjadi tulang belakang kepada Gerakan Misi Kemanusiaan ini yang sekarang ini menjadi isu yang kita semua pertahankan. Dialah di antara negarawan, tokoh negarawan Malaysia ataupun peringkat antarabangsa yang konsisten dengan pendiriannya dan ada kesungguhan yang tidak jemu-jemu berusaha untuk melancarkan kempen keamanan sejagat dan menentang kezaliman. Beliau bukan seorang pemimpin yang retorik, pemimpin yang hanya bercakap-cakap dan bila ada isu semuanya sampai bangkitkan semua untuk mencari *political mileage*.

Sebab itu kita dengar tadi, saya dengar dengan teliti ada pihak-pihak cuba hendak jadikan isu ini dari segi konteks politik tempatan dalam negara kita untuk *score political mileage* yang saya kira ia satu kesempatan untuk melaksanakan *damage control*. Sebelum ini saya mendapati ada di kalangan pemimpin Malaysia, pemimpin parti politik Malaysia yang bersengkongkol dengan Amerika dan imejnya memang diketahui menjadi alat Amerika tetapi apabila timbul sekarang ini lantas bangkit menyerang Amerika yang saya tahu dan saya rasa ini satu tindakan *damage control* untuk memulihkan imejnya yang menjadi perkakas kepada Amerika selama ini.

Tuan Yang di-Pertua, saya bangkitkan perkara ini, saya menyatakan perkara ini supaya rakyat Malaysia sedar dan tahu dari segi siapakah sebenarnya konsisten, bukan sahaja konsisten tetapi melaksanakan tanggungjawab ini dengan penuh ikhlas. Kerja ikhlas ini tidak perlu kita gembar gemburkan, tidak perlu kita besar-besarkan. Kita buat Allah SWT tahu. Oleh sebab itu Tuan Yang di-Pertua, saya sebagai orang Islam, saya ingin mengajak seluruh umat Islam terus menerus berdoa dan membaca Ummul kitab sedekah seberapa banyak yang boleh kepada para syuhada, sembilan orang daripada Turki yang saya kira telah mati syahid, dibunuh oleh pihak kekejaman laknatullah Israel ini. Mudah-mudahan para syuhada ini ditempatkan di kalangan para anbia, orang-orang yang solihin di alam barzakh dan kita akan mengikuti jejak langkah pejuang-pejuang yang jujur dan ikhlas ini. Bukan semata-mata mencari *political mileage* pada waktu dan ketika tertentu, tetapi bolehlah mereka hendak buat, mereka buatlah. Apa kita hendak kata dengan apa yang dibuat Tuan Yang di-Pertua, asalkan mereka bahagia sudahlah. Asalkan mereka boleh hidup sudahlah tetapi, yang penting kita seluruh

rakyat mengecam habis-habisan di atas perbuatan khianat, biadab, angkuh, sombong dan zalim yang dilakukan oleh pihak tentera Rejim Zionis Israel ini.

Akhir sekali Tuan Yang di-Pertua, saya hendak menarik perhatian Menteri Luar dan juga Kerajaan Malaysia kepada usaha yang dibuat oleh Yang Berbahagia Mantan Perdana Menteri Tun Dr. Mahathir bin Mohamad supaya hendak 'dijenayahkan' apa yang dikatakan *criminalized the war criminal* ini yang mana Perdana Global Peace sudah mengadakan dua kali persidangan antarabangsa di Kuala Lumpur dan sekali di United Kingdom yang saya ikut serta. Jadi saya harap kalau boleh saya hendak minta dan desak kerajaan supaya mengambil isu 'menjenayahkan' perang ini sebagai agenda dasar luar Malaysia. Bawa ke Pertubuhan Bangsa-Bangsa Bersatu, menaja usul ini dan wujudkan *charter*. Minta supaya diadakan sidang kemuncak Bangsa-Bangsa Bersatu supaya *charter* untuk 'menjenayahkan' perang ini dijadikan sebagai satu agenda Bangsa-Bangsa Bersatu di mana semua anggota *merectify* supaya akhirnya nanti mereka yang terlibat dalam jenayah perang ini boleh didakwa di Mahkamah Antarabangsa. Itu cara yang sepatutnya dan itulah cara yang patut dilakukan oleh Kerajaan Malaysia. Dasar Kerajaan Malaysia pun mestilah konsisten dan fokus bukan ikut *ad hoc* semata-mata. Ikut keadaan dan suasana semasa tetapi mengambil daya usaha berada di barisan hadapan walaupun kita negara kecil seperti yang dibuat oleh mantan Perdana Menteri dahulu...

Timbalan Yang di-Pertua [Datuk Ronald Kiandee]: Terima kasih Yang Berhormat .

Dato' Ibrahim Ali [Pasir Mas]: ...Yang Amat Berbahagia Tun Dr. Mahathir bin Mohamad. Sekian terima kasih. Saya menyokong.

Timbalan Yang di-Pertua [Datuk Ronald Kiandee]: Ahli-ahli Yang Berhormat, untuk usul ini kita telah dimaklumkan tadi bahawa ketua-ketua parti, wakil-wakil parti yang akan berucap. Jadi saya akan beri keutamaan kepada wakil-wakil parti. Untuk makluman Ahli-ahli Yang Berhormat, wakil parti daripada pembangkang telah berucap dua wakil untuk tiap-tiap parti seorang dan ramai lagi ketua dan wakil parti yang tidak berucap di sebelah sini.

Datuk Bung Moktar bin Radin [Kinabatangan]: Kenapa dia orang dapat...

Timbalan Yang di-Pertua [Datuk Ronald Kiandee]: Jadi untuk usul ini Yang Berhormat, saya akan panggil wakil-wakil parti untuk berucap.

Datuk Bung Moktar bin Radin [Kinabatangan]: Kenapa dia orang dapat - satu parti dapat dua wakil?

Timbalan Yang di-Pertua [Datuk Ronald Kiandee]: Yang Berhormat Putatan.

Datuk Bung Moktar bin Radin [Kinabatangan]: Itu tidak adil sudah.

3.56 ptg.

Datuk Dr. Marcus Makin Mojigoh [Putatan]: Terima kasih Tuan Yang di-Pertua, saya berdiri bagi pihak keluarga parti saya, UPKO...

Beberapa Ahli: [Menyampuk]

Datuk Dr. Marcus Makin Mojigoh [Putatan]: Mengucapkan syabas dan tahniah kepada kerajaan kerana membuat usul yang sungguh tegas, mesej yang sungguh terang terhadap kerajaan Zionis Israel. Tidak adil saya berdiri di sini kalau saya tidak mengambil kesempatan ini untuk berterima kasih dan

mengucapkan tahniah kepada usaha Menteri Luar kita yang telah berusaha untuk membebaskan wira-wira kita di dalam kapal Mavi Marmara dan Rachel Corrie. Tahniah kepada Menteri Luar yang ada duduk di *corner* situ. Saya juga mengucapkan tahniah dan menyokong bagi pihak keluarga parti UPKO sepenuhnya, secara konsisten seperti mana yang kita tunjukkan sokongan kita kepada usul pada 12 Januari 2009...

Dato' Mahfuz bin Haji Omar [Pokok Sena]: [Menyampuk]

Datuk Dr. Marcus Makin Mojigoh [Putatan]: Yang Berhormat Pokok Sena, ini UPKO lainlah.

Tuan Yang di-Pertua, tindakan kebinatangan... *Sorry* bukan 'Kinabatan', ya. Budaya pengkhianatan Kerajaan Israel terhadap sukarelawan-sukarelawan di atas dua bot ketenteraan Israel menyerang dengan ganas dan zalim itu harus dikutuk bukan sahaja masyarakat di negara-negara Islam tetapi seluruh masyarakat antarabangsa yang mengutuk, mengecam tindakan keganasan zalim oleh tentera Israel terhadap orang-orang yang tidak berdosa. Jadi sebagaimana yang saya katakan Tuan Yang di-Pertua, bagi pihak masyarakat yang bukan beragama Islam termasuk juga orang-orang Yahudi yang kita nampak dari media mengutuk sekeras-kerasnya tindakan yang zalim yang tidak berperikemanusiaan terhadap masyarakat atau komuniti atau rakyat yang tidak berdosa di negara Palestin.

■1600

Apabila kita melihat tindakan yang ganas membakar rumah dan harta benda dirosakkan, maka kita faham keadaan yang sebenarnya di Palestin. Kanak-kanak yang kecil tidak berdosa dibunuh seperti binatang. Wanita-wanita diperkosa, dibunuh. Bayangkan kalau ini berlaku seperti mana yang mereka rasai.

[Timbalan Yang di-Pertua (Datuk Dr. Wan Junaidi bin Tuanku Jaafar) **mempengerusikan Mesyuarat**]

Jadi tidak hairan masyarakat antarabangsa ini membuat satu usaha melaksanakan penghantaran bantuan-bantuan kemanusiaan kepada tempat yang dipanggil Gaza. Apabila kawasan ini dikepung oleh tentera...

Dr. Tan Seng Giaw [Kepong]: [Bangun]

Datuk Dr. Marcus Makin Mojigoh [Putatan]: Yang Berhormat Kepong duduklah, bukan Yang Berhormat Kepong... [Ketawa] Ini salah. Tentera Kerajaan Israel mengepung kawasan Palestin, bukan kawasan Kepong. Jadi walaupun kita telah mendesak, mengecam supaya negara-negara yang besar, yang berkuasa membantu supaya Kerajaan Israel membuat tindakan supaya pengepungan negara Palestin ini dilepaskan. Penutupan sempadan-sempadan antara Mesir dan di Rafah ini haruslah dibuka supaya bantuan-bantuan kemanusiaan, bantuan-bantuan pembinaan perumahan, perubatan dan sebagainya diberikan kepada rakyat yang seperti kita juga untuk hidup.

Jadi walaupun sahabat-sahabat saya daripada pihak-pihak parti yang lain termasuk kawan-kawan daripada pihak pembangkang juga turut, maka banyak sudah perkara yang telah ditimbulkan. Saya tidak harus mengulangi balik sebab-sebab kenapa kita tidak mengutuk tindakan seperti ini dan banyak isu yang telah pun dilontarkan, dibawa, diketengahkan dan tidaklah perlu bagi saya, bagi pihak kami untuk mengulang. Bahkan menyokong usul ini supaya bukan sahaja setakat hari ini tetapi secara konsisten dan *persistent*, terutama sekali kepada Majlis Keselamatan Pertubuhan Bangsa-bangsa Bersatu, negara Amerika dan

sebagainya. Dengan itu Tuan Yang di-Pertua, bagi pihak keluarga UPKO memohon menyokong usul tersebut.

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat Persiangan.

4.04 ptg.

Timbalan Menteri Sumber Asli dan Alam Sekitar [Tan Sri Datuk Seri Panglima Joseph Kurup]: Tuan Yang di-Pertua, saya berdiri di sini bagi pihak parti saya Parti Bersatu Rakyat Sarawak (PBRS) untuk turut sama dengan rakan-rakan di dalam Dewan yang mulia ini untuk mengutuk sekeras-kerasnya. Untuk mengutuk tidak terhingga terhadap perbuatan zalim yang dilakukan oleh Israel kepada beberapa aktivis sukarelawan yang berada dalam Mavi Marmara semasa dalam perjalanan ke Gaza untuk menyampaikan bantuan kemanusiaan, kepada penduduk Palestin di Gaza.

Kapal itu jelas tidak membawa apa-apa senjata selain daripada barang-barang bantuan, yang diperlukan oleh penduduk Gaza yang amat memerlukan. Tindakan ini sangat kejam. Alasan *Israel Ambassador* bahawa *militarynya* bertindak mengguna peluru atau dengan izin, *live ammunition* kerana menyelamatkan diri sendiri atau *acting self-defense* kerana mereka diserang, tidak sama sekali dapat diterima.

Kesemua sukarelawan ini terbukti tidak bersenjata. Kapal itu yang dilengkapi dengan keperluan bantuan kemanusiaan. Oleh yang demikian siapa pun manusia tidak dapat menerima selain daripada menyatakan bahawa tindakan itu merupakan tindakan yang tidak bertamadun. Barangkali tindakan yang lebih jahat lagi daripada orang-orang yang tidak bertamadun. Mengambil tindakan ganas dan kejam ini nampaknya sudah menjadi budaya Kerajaan Israel. Walaupun dunia telah membuat kutukan demi kutukan terhadap perbuatan Israel yang zalim, namun demikian Israel *just them don't bother*. Seolah-olah menunjukkan bahawa peraturan-peraturan dan undang-undang mereka ada, seolah-olah mengatasi dengan undang-undang antarabangsa.

Seperti Yang Amat Berbahagia Tun Dr. Mahathir bekas Perdana Menteri Malaysia berkata dengan izin Tuan Yang di-Pertua, "*Something more is needed to be done than just condemnation by government of the world. You can condemn, but the Israel just doesn't care.*" Beliau terus berkata, "*The Israel is a bunch of rouges with no human feeling.*" Oleh yang demikian parti saya PBRS menyeru tindakan serta-merta diambil bagi menangani isu ini. Kami cadangkan di antaranya:

- (i) oleh sebab ini nampaknya sudah menjadi budaya oleh Kerajaan Israel, maka Israel harus ditunjuk ajar untuk bersikap seperti manusia yang bertamadun, menghormati hak-hak manusia dan menghormati serta sesama sendiri. Sesuatu tindakan yang dirasakan boleh mengajar mereka hendaklah diambil oleh dunia terhadap Israel;
- (ii) mengikat Israel untuk menghormati kewajipannya, seperti mana yang termaktub dan Konvensyen Vienna. Ini haruslah diikuti dengan *sanction* sekiranya Israel enggan mematuhi;
- (iii) tindakan Israel itu merupakan tindakan jenayah. Oleh itu kami bersetuju sangat supaya orang-orang yang

bertanggungjawab dari Israel dihadapkan ke Mahkamah Jenayah Antarabangsa untuk mendapat keadilan bagi sembilan orang yang terbunuh akibat daripada tindakan zalim itu;

- (iv) dalam pada itu Majlis Keselamatan Pertubuhan Bangsa-Bangsa Bersatu dan Mahkamah Jenayah Antarabangsa harus mengisytiharkan, tidak payah bukti lagi oleh sebab ini sudah terang-terang melakukan sesuatu *war crime*, maka daripada itu PBB harus mengisytiharkan bahawa tindakan tentera Israel itu telah melanggar Undang-undang Antarabangsa. Justeru kerajaan Israel hendaklah dikenakan hukuman yang setimpal dengan jenayah yang dilakukannya;
- (v) Pertubuhan Bangsa-Bangsa Bersatu membuat ketetapan segera supaya Israel membuka Sempadan Rafah. Saya setuju tanpa syarat supaya penduduk Palestin yang sekian lama telah mengalami kesengsaraan dapat menikmati bantuan kemanusiaan yang dihantar ke wilayah tersebut;
- (vi) Pertubuhan Bangsa-Bangsa Bersatu juga menerajui usaha-usaha antarabangsa untuk memastikan bantuan kemanusiaan dapat dihantar kepada penduduk Palestin di Gaza;
- (vii) Pertubuhan Persidangan Negara-negara Islam (OIC) meningkatkan lagi peranannya dalam membantu penghantaran bantuan kemanusiaan tersebut dan menubuhkan satu tabung bagi khas tujuan itu; dan
- (viii) Malaysia seharusnya menerajui untuk mempengaruhi masyarakat antarabangsa supaya memboikot barangan dan perkhidmatan yang dikeluarkan oleh Israel.

■1610

Tuan Yang di-Pertua, sebagai kesimpulan, dunia berkehendakkan supaya tindakan tegas diambil. Kita memerlukan tindakan. Kita ingin melihat sesuatu tindakan dapat diambil terhadap Israel dan bukan sekadar kutukan sahaja. Tuan Yang di-Pertua, saya menyokong usul yang dibentangkan oleh Yang Amat Berhormat Perdana Menteri.

Timbalan Yang di-Pertua [Datuk Dr. Wan Junaidi bin Tuanku Jaafar]:
Ya, Yang Berhormat Selangau.

Timbalan Menteri Kemajuan Luar Bandar dan Wilayah II [Datuk Joseph Entulu anak Belaun]: Terima kasih Tuan Yang di-Pertua. Saya berdiri atau bangun di sini untuk bercakap bagi pihak parti saya iaitu Parti Rakyat Sarawak (PRS) untuk menyuarakan sokongan penuh parti kami ke atas resolusi yang telah dibentangkan oleh Yang Amat Berhormat Perdana Menteri pagi tadi. Saya juga ingin merakamkan tahniah dan juga berterima kasih di atas pembentangan resolusi tersebut yang mempunyai banyak *point* yang tepat pada waktunya.

Tuan Yang di-Pertua, tiada sebarang alasan pun yang boleh digunakan oleh kerajaan ataupun rejim Israel di atas tindakan mereka merampas kapal

Freedom Flotilla dan membunuh sembilan orang aktivis keamanan dan kru di dalamnya. Kerajaan ataupun rejim Israel telah menunjukkan sekali lagi dan pada setiap masa bahawa nyawa rakyat asing ataupun nyawa rakyat negara lain adalah begitu murah dan boleh diperlakukan sesuka hati tetapi nyawa rakyatnya pula adalah di sebaliknya iaitu begitu berharga.

Kritikan dan hentaman daripada pelosok dunia kadangkala termasuk juga sekutu mereka Amerika Syarikat sering dipandang remeh oleh rejim Israel. Tenteranya pula bebas mengebom ke atas sesiapa ataupun di mana juga tempat di Gaza dan di tempat yang lain yang mereka fikir perlu semuanya atas nama keselamatan tetapi, polisi tersebut masih tidak memberikan keselamatan dan ketenteraman kepada mereka. Sentiasa hidup dalam perasaan bersalah dan tertekan, negara Israel atau rejim Israel berkelakuan seperti "*A mad emperor state*" ataupun *state* yang dipegang oleh *emperor* yang gila ke atas negara jirannya.

Kejadian terbaru dan terkini nampaknya mencetuskan momentum kesungguhan yang tinggi kepada masyarakat antarabangsa untuk mencabar keangkuhan Israel. Kebanyakan kapal aktivis masih berusaha untuk meneruskan misi kemanusiaan mereka. Insiden ini telah mencipta kesatuan besar masyarakat antarabangsa merentasi batas politik, agama dan geografi untuk meneruskan bantuan kepada rakyat Palestin. Saya berharap Nelson Mandela ataupun Matahama Ghandi yang baru akan muncul untuk mengetuai perjuangan Palestin ini bagi mencapai keamanan dan bantuan yang amat diperlukan.

Akan tetapi, kerajaan Israel sedar berasaskan pengalaman mereka boleh mengetepikan kritikan dan kutukan dunia atas tiga huruf iaitu U-S-A. Dunia sedar Amerika Syarikat hanya memberikan kutukan ringan sahaja. Amerika Syarikat mesti faham bahawa apabila tahap ketidakadilan yang tinggi dirasai, mangsa akan terus mencuba untuk memperbetulkannya.

Di dalam hal ini, ketidakadilan sering menimpa rakyat Palestin dan saya tidak akan terkejut jika senjata pemusnah besar-besaran ataupun *weapon of mass destruction* ataupun cubaan mendapatkan bom-bom atom ataupun nuklear daripada negara-negara tertentu akan dilakukan bagi menamatkan kesengsaraan tersebut. Kita pun sudah mendengar Kerajaan Burma telah cuba mendapat teknologi nuklear ini dari Korea Utara. Jadi, tidak mustahil kalau ada mangsa-mangsa ketidakadilan ini juga cuba berbuat demikian.

Oleh yang demikian, rejim Israel dan Amerika Syarikat perlu cepat sedar bahawa *Holocaust 1* yang telah berlaku tidak dapat dibetulkan dengan *Holocaust 2* yang sedang berlaku. Sehubungan dengan itu, seluruh dunia termasuk Amerika Syarikat mempunyai tanggungjawab besar bagi mencapai penyelesaian persahabatan bersama. Isu yang kita usulkan adalah isu yang besar dan serius.

Saya amat kesal dengan sikap segelintir pembahas-pembahas yang banyak mempolitikkan usul kita pada hari ini. Jikalau tujuannya ialah untuk menunjukkan mereka adalah lebih tegas pendiriannya daripada kerajaan Barisan Nasional, saya rasa kesannya di sebaliknya. Ia hanya memperkecilkan isu yang kita bahaskan kerana ia cukup untuk mementingkan politik orang yang berbahas demikian dalam pandangan saya ialah cuma semasa berbahas menghitung undi berapa yang dia dapat daripada berbahas berkenaan dengan usul ini. Dengan pandangan yang sedemikian, saya sekali Tuan Yang di-Pertua, saya bagi pihak Parti Rakyat Sarawak menyokong penuh usul yang telah dibentangkan oleh Yang Amat Berhormat Perdana Menteri pagi tadi. Sekian.

Timbalan Yang di-Pertua [Datuk Dr. Wan Junaidi bin Tuanku Jaafar]:
Ya, Yang Berhormat Sungai Siput.

4.16 ptg.

Dr. M. Jeyakumar Devaraj [Sungai Siput]: Terima kasih Tuan Yang di-Pertua. Saya berdiri di sini sebagai wakil Parti Sosialis Malaysia untuk menyokong resolusi yang dibentangkan oleh Yang Amat Berhormat Perdana Menteri terhadap penyerangan konvoi Freedom Flotilla oleh tentera Israel. Dalam resolusi ini, *point* nombor tiga menyatakan, “*Memutuskan untuk mendesak Majlis Keselamatan Pertubuhan Bangsa-Bangsa Bersatu untuk mencela Israel dan bukannya membuat kenyataan lemah semata-mata*”.

Parti Sosialis Malaysia mahu Kerajaan Malaysia membawa usul ini secara formal bersama dengan negara-negara lain untuk mencela Israel dan juga untuk mengenakan *sanction* terhadap Israel sekiranya Israel tidak berundur daripada *blockage* di Gaza. Sudah tentunya jika ada usul seperti ini di Pertubuhan Bangsa-Bangsa Bersatu, pelindung terbesar untuk Israel akan juga masuk dan cuba mengurangkan usul itu iaitu Amerika Syarikat. Jika itu berlaku, jika Amerika Syarikat cuba melindungi Israel sekali lagi di Pertubuhan Bangsa-Bangsa Bersatu, Malaysia harus melakukan beberapa tindakan berani untuk tunjuk dengan jelasnya bahawa rakyat Malaysia tidak dapat terima pendirian Amerika Syarikat termasuk memanggil balik Duta Malaysia ke Amerika Syarikat. Hanya ini akan menunjukkan...

Dato' Mahfuz bin Haji Omar [Pokok Sena]: Baik, terima kasih Yang Berhormat Sungai Siput. Adakah Yang Berhormat Sungai Siput juga bersetuju bahawa dalam usul ini lebih banyak kepada kita mengharap orang lain yang akan bertindak, tetapi tidak menampakkan satu tindakan yang serius daripada kerajaan Malaysia? Saya bersetuju dengan apa yang disebut oleh Yang Berhormat tadi mengatakan bahawa memanggil duta di Amerika Syarikat. Akan tetapi juga di dalam usul ini menyatakan kesal terhadap PBB. Sepatutnya kita juga memanggil wakil tetap kita di PBB dipanggil balik sebab kita boleh panggil duta kita di Vienna sebelum itu atas alasan bahawa dia mengundi sesuatu yang tidak selari dengan dasar kerajaan.

Kedua Yang Berhormat Sungai Siput, ini soal isu-isu besar. Adakah Yang Berhormat Sungai Siput bersetuju bahawa kerajaan tidak begitu serius sebab dalam masa yang sama mengikut Minit Mesyuarat Kabinet 20 Mac 1996 masih lagi dan saya percaya bahawa minit itu masih diterima pakai sehingga sekarang iaitu kerajaan mengizinkan untuk urusan perdagangan import eksport dengan negara haram Israel ini yang perlu dibuat permohonan kepada bahagian ataupun kepada pengarah bahagian import eksport dan akan diluluskan secara rahsia. Sehingga sekarang – sehingga Mac dan April, masih terdapat kelulusan yang diberikan kepada syarikat tertentu untuk berurusan import eksport dengan negara haram Israel yang kita tidak ada hubungan diplomatik dan juga hubungan perdagangan.

■ 1620

Jadi, ini menunjukkan bahawa tangan kanan satu masa kerajaan kita memberikan hadiah, memberikan kepada Palestin tetapi, satu masa juga, kita juga menghidupkan tentera Israel untuk terus membunuh rakyat Palestin.

Dr. M. Jeyakumar Devaraj [Sungai Siput]: Terima kasih Yang Berhormat Pokok Sena. Saya tidak tahu seriuskah tidak, saya tidak tahulah tetapi, daripada tindakannya jika Malaysia tidak membawa usul yang serius, yang tegas di Pertubuhan Bangsa-Bangsa Bersatu ataupun jika membawanya selepas itu, bila Amerika Syarikat masuk untuk melindungi Israel, kita berdiam sahaja. Kita semua

akan tahu, rakyat Malaysia akan tahu. Ini resolusi Perdana Menteri hanya untuk *sound bite* sahaja. Satu untuk nilai propaganda sahaja.

Ada banyak perkara yang saya tidak setuju dengan Yang Berhormat Pasir Mas, banyak perkara tetapi, dalam analisisnya terhadap peranan Amerika Syarikat dalam masalah Palestin dan Israel ini, saya ingat adalah tepat apa yang dikatanya itu. So, jika mereka hanya kutuk tindakan Israel akan tetapi, diam sahaja bila Amerika Syarikat masuk untuk melindungi Israel, itu saya ingat satu pendirian yang hipokrit. Rakyat Malaysia pun akan tahu.

Dengan ini saya minta hendak menyokong usul ini. Terima kasih.

Dato' Mahfuz bin Haji Omar [Pokok Sena]: *[Bangun]*

Timbalan Yang di-Pertua [Datuk Dr. Wan Junaidi bin Tuanku Jaafar]:
Ya, Yang Berhormat Sandakan.

4.21 ptg.

Timbalan Menteri di Jabatan Perdana Menteri [Datuk Liew Vui Keong]: Terima kasih Tuan Yang di-Pertua kerana memberi peluang kepada saya selaku Presiden Liberal Demokratik Parti untuk membahaskan usul yang dibawa oleh kerajaan untuk mengutuk serangan kejam oleh militari rejim Israel ke atas konvoi kapal Freedom Flotilla yang membawa bantuan kemanusiaan ke Gaza. Memandangkan Ahli-ahli Yang Berhormat lain telah banyak menyentuh mengenai perkara ini, maka saya akan memberikan fokus lebih daripada segi perundangan. Saya bersama Ahli Parti LDP dan juga semua *same minded people all over the world* dengan izin, berasa amat sedih dan kecewa dengan insiden yang telah berlaku pada Isnin, 31 Mei 2010 yang lalu.

Di mana insiden tersebut telah menjadi satu igauan buruk masyarakat di seluruh dunia. Insiden yang mengakibatkan kematian sembilan orang sukarelawan, berpuluh lagi yang cedera dan beratus orang awam yang dijadikan tahanan dan harta benda telah dirampas oleh militari rejim tersebut telah mencetuskan satu kesedaran mengenai keganasan askar rejim Israel tersebut.

Namun kita bersyukur kepada Tuhan kerana insiden tersebut tidak melibatkan kehilangan nyawa dipihak sukarelawan Malaysia. Mereka telah pun pulang ke tanah air dengan selamatnya sebagai wira negara. Insiden ini sebenarnya telah mencetuskan satu kesedaran di dunia hari ini mengenai pelbagai keterukan tentera rejim Israel tersebut.

Tuan Yang di-Pertua, menurut fakta kes yang telah dilaporkan, kita fahami bahawa Freedom Flotilla adalah merupakan satu usaha sama badan organisasi kemanusiaan antarabangsa untuk memecahkan sekatan haram *military* Israel bagi memberikan bantuan kemanusiaan dan pembangunan yang amat diperlukan oleh rakyat Palestin di Gaza. Lebih 700 orang penumpang lebih dari 40 buah negara telah turut serta dalam Freedom Flotilla tersebut.

Semasa hari kejadian serbuan ke atas kapal Mavi Marmara, Freedom Flotilla juga telah turut serta oleh lima buah kapal yang lain. Daripada laporan yang telah pun diterima, kapal Mavi Marmara telah diserang kira-kira 65 batu nautika dari pantai Netanya dan 80 batu nautika dari Gaza. Tindakan askar Israel menyerang kapal milik negara Turki di perairan antarabangsa ini adalah tindakan yang mencabuli hak negara Turki itu sendiri.

Serbuan ganas tentera komando Israel tersebut terhadap kapal Mavi Marmara menunjukkan bahawa Kerajaan Israel tidak mempedulikan cara bagaimanakah operasi tersebut dilaksanakan. Sama ada ia akan membawa

implikasi negatif terhadap orang awam dan juga sukarelawan antarabangsa yang berada di dalam kapal tersebut. Sekiranya dilihat daripada sudut perundangan antarabangsa, isu perundangan yang timbul mempersoalkan adakah Israel berada dalam kedudukan yang sah dari segi perundangan antarabangsa apabila mengadakan serbuan ke atas kapal tersebut.

Untuk makluman Dewan yang mulia ini, jika kita ambil kira jarak 12 batu nautika kawasan perairan antarabangsa seperti yang telah dinyatakan di bawah *United Nations Convention on The Law of the Sea* (UNCLOS) dengan izin, tindakan tentera rejim Israel melaksanakan operasi ketenteraan dalam lingkungan 77 batu nautika jelas menunjukkan bahawa rejim Israel telah mencabuli undang-undang antarabangsa. Tindakan militari rejim Israel menggunakan *The San Remo Manual on International Law Applicable to Armed Conflict at Sea* dengan izin, sebagai alasan bagi menjustifikasikan serbuan mereka terhadap Freedom Flotilla tidak boleh diguna pakai dalam perkara ini.

Ini kerana adalah jelas di dalam *San Remo Manual* tersebut, tidak terdapat artikel yang membenarkan mana-mana negara konflik untuk menjadikan orang awam sebagai tebusan, apatah lagi membunuh mereka yang mengadakan misi keamanan dan kemanusiaan. Tiada sebab yang kukuh bagi *military* Rejim Israel untuk mengesyaki bahawa kapal-kapal Freedom Flotilla memberi bantuan persenjataan pada Hamas. Ini kerana apa yang jelas, kapal-kapal tersebut membawa bantuan kemanusiaan kepada rakyat Palestin seperti yang telah dilaporkan.

Konvensyen Geneva jelas memandatkan agar setiap negara perlu mengambil langkah-langkah yang sewajarnya walaupun dalam suasana peperangan sebenar agar keselamatan orang awam hendaklah sentiasa dipelihara. Tuan Yang di-Pertua, berdasarkan fakta-fakta kes dan kenyataan saksi kejadian adalah jelas bahawa terdapat satu bukti yang kukuh yang menunjukkan bahawa perilaku jenayah di bawah Konvensyen Geneva telah pun berlaku.

Oleh demikian, saya selaku dan bersama-sama dengan parti-parti LDP menyokong agar rejim militari Israel ini dirujuk ke Mahkamah Keadilan Antarabangsa mahupun Mahkamah Jenayah Antarabangsa. Malaysia selaku anggota Persatuan Bangsa-Bangsa Bersatu berhak mengusulkan satu resolusi untuk diluluskan oleh persidangan umum PBB bagi merujuk tindakan ganas Israel di Perairan Antarabangsa ke Mahkamah Keadilan Antarabangsa (ICJ) dengan izin.

Ini boleh dilaksanakan berdasarkan Artikel 96, *United Nations Charter* dengan izin, dan Artikel 65, *ICJ Statute*. Berdasarkan faktor-faktor terkini seperti yang dilaporkan oleh akhbar tempatan dan juga utama dunia, adalah jelas bahawa insiden serbuan ganas komando militari rejim Israel ke atas kapal konvoi Freedom Flotilla adalah merupakan satu insiden jenayah dan pencabulan undang-undang antarabangsa. Rejim tersebut patut dituduh melakukan jenayah perang di bawah Artikel 8, *ICC Rome Statute*. Dengan itu Tuan Yang di-Pertua, saya mohon menyokong.

Dato' Mahfuz bin Haji Omar [Pokok Sena]: [Bangun]

Beberapa Ahli: [Bangun]

Timbalan Yang di-Pertua [Datuk Dr. Wan Junaidi bin Tuanku Jaafar]:

Saya minta Yang Berhormat berucap lima minit seorang kerana ada beberapa orang lagi hendak cakap. Jadi lima minit seorang. Jadi selepas itu kita habiskanlah. Yang Berhormat Kinabatangan. Beliau Timbalan *Backbenches* Yang Berhormat.

4.29 ptg.

Datuk Bung Mokhtar bin Radin [Kinabatangan]: Terima kasih Tuan Yang di-Pertua. Saya ingin mengambil kesempatan dalam ketandusan waktu yang diberikan kepada saya iaitu kita – saya tidak mewakili mana-mana parti akan tetapi saya mewakili individu-individu yang sehaluan dengan saya. Iaitu saya berdiri di sini ingin menyatakan bahawa kita kalau boleh selepas tindakan yang kita ambil pada hari ini, Kementerian Luar Negeri hendaklah membawa usul yang konkrit ini ke Mesyuarat PBB dan pastikan negara-negara yang sehaluan dengan kita juga mengikuti langkah yang sama sebab mengutuk sahaja, membuat demonstrasi sahaja tidak akan mengubah minda pemimpin-pemimpin Israel yang bermaharajalela melakukan, pembunuhan tanpa henti.

■1630

Kita harus mempunyai satu garis panduan. Saya menyeru negara Malaysia mempelopori usaha ini iaitu memastikan bahawa tindakan rejim Israel ini harus diberhentikan mulai daripada detik saat ini dan memulihkan hubungan baik dengan negara-negara luar termasuk mengiktiraf negara Palestin. Ini disebabkan isu ini berlarutan berpuluh-puluh tahun, tidak ada tindakan yang lebih konkrit diambil asal ada usul untuk mencela Israel, Amerika pula yang menjadi halangan ia.

Apa? Berat sangatkah untuk kita mempelopori usaha murni ini? Kita kalau di Amerika ada pelobi kenapa kita tidak mencetuskan pelobi-pelobi daripada negara-negara ASEAN yang kita anggap diri kita bermartabat tetapi akhirnya apa yang berlaku pembunuhan demi pembunuhan tanpa ada hentinya. Oleh sebab itu, saya memuji sikap beberapa warganegara Malaysia termasuk rakan saya ahli Parlimen daripada Parit menggadai nyawa, yang saya hairan tidak ada seorang pun daripada barisan pembangkang MP dia. Jadi ini merupakan, saya rasa kekecewaan, kalau benar-benar kita ingin berjuang bersama maka kita harus turut serta bersama-sama, tidak kira apa jua halangan, apa juga rintangan demi untuk memartabatkan dan mempertahankan rejim yang begitu keji, zalim dan mungkar ini bermaharajalela ini di negara Palestin. Saya cukup hairan dari kecil, saya melihat isu ini tidak ada hentinya.

Apakah kerajaan menerusi Kementerian Luar Negeri akan melihat pelan jangka panjang iaitu ke arah bagaimana? Amerika tidak boleh lagi memihak secara langsung kepada rejim Israel ini? apa yang sangat ditakuti oleh negara-negara Arab. Saya hairan, saya hari ini mengatakan bahawa pemimpin-pemimpin dunia Arab bodoh dan tahyul sebab mereka tidak berani berhadapan dengan pemimpin Israel yang sekecil ibu jari ini sahaja.

Tuan Yang di-Pertua, memang saya sudah lama menanti isu seumpama ini, dari dulu pun belum ada usul ini, saya telah bangkit menyatakan bahawa kita memang mahu melihat kedamaian, keadilan. Kalau Amerika boleh bercerita soal keadilan, di mana keadilan harus dituntut pada hari ini, kenapa kita tidak berani menuntut keadilan untuk dunia sejagat, kenapa negara-negara lain harus tunduk? Dalam Al-Quran, dinyatakan kita tidak harus takut kepada sesiapa tetapi kita harus tunduk dan takut kepada Allah. Kenapa kita tidak melaksanakan tuntutan seumpama ini.

Oleh sebab itu, hari ini saya berdiri menyatakan dengan sedikit waktu ini Tuan Yang di-Pertua iaitu saya bukan sahaja menyokong, saya menyuruh usul ini dipanjangkan dan Malaysia akan mempelopori usul ini di persidangan PBB sebagai sebuah pertubuhan yang mengetuai seluruh dunia. Kalau PBB sudah tidak ada keyakinan, sudah tidak ada kuasa, Malaysia kalau boleh cadangkan

PBB dibubarkan sahaja, tidak perlu lagi wujud keadilan dalam kita nampak tidak ada keadilan langsung untuk melaksanakan amanah dan tanggungjawab untuk kita selesaikan.

Dengan ini Tuan Yang di-Pertua, saya menyokong usul ini dengan sepenuhnya. Terima kasih.

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat Batu Kawan.

4.34 ptg.

Prof. Dr. P. Ramasamy [Batu Kawan]: Terima kasih Tuan Yang di-Pertua kerana membenarkan saya ini membahaskan usul yang telah dibentangkan oleh Yang Amat Berhormat Perdana Menteri pada pagi tadi. Usul adalah supaya mengutuk, mengecam Zionis Israel terhadap pembunuhan 12 orang dalam kapal flotilla yang membawa barang-barang makanan dan lain-lain benda untuk Gaza. Akan tetapi Tuan Yang di-Pertua, usul ini memang mengandungi banyak masalah, tetapi atas semangat perjuangan Palestin ini saya terpaksa menyokong usul ini. Saya rasa kita memang mungkin satu tahun yang lepas ini, kita ada satu sidang tergepar di mana kita bincang isu Palestin ini dan pada masa itulah saya tanya kenapa ada satu sesi tergepar untuk membincangkan pembunuhan orang Tamil di Sri Langka, sampai hari ini pun tidak ada satu jawapan.

Jadi dari segi itu saya nampak bahawa usul-usul yang dibawa oleh Barisan Nasional ini ada unsur-unsur politik. Jadi Tuan Yang di-Pertua, usul ini lemah kerana ada beberapa sebab, oleh sebab kesuntukan masa ini saya tidak akan sentuh semua. Pertama, bahawa kita harapkan kepada pihak lain, kita harapkan kepada PBB, kita harapkan kepada Turki, kita harapkan kepada Amerika Syarikat dan sebagainya. Jadi daripada dulu Tuan Yang di-Pertua, Malaysia ini tidak ada satu pendirian, satu ketegasan untuk menyelesaikan masalah Palestin. Masalah Aceh yang baru-baru ini dapat selesai, Malaysia tidak ada peranan langsung dalam Aceh walaupun 100% orang Aceh adalah Islam dan rumpun Melayu.

Jadi saya rasa Malaysia ini adalah pak turut sahaja dalam arena antarabangsa, ikut sahaja. Saya rasa segala kejahatan, kenapa sampai hari ini 60 tahun, 70 tahun Palestin ini tidak ada satu negara baru, siapa yang punca? Adakah Israel, adakah Amerika Syarikat, adakah dunia Arab? Saya rasa semua ini melibat untuk menghalang satu negara baru. Maka strategi *road map* kepada Malaysia mesti ditumpukan kepada *road map*, strategi, bila rakyat Palestin ini akan menentukan negara baru, bukanlah kutuk Israel, ini reaktif, usul ini reaktif sahaja. Ada pembunuhan ini, you bawa satu usul, ada bawa pembunuhan lain you bawa lagi satu usul, ini reaktif, semua semata-mata untuk mendapatkan modal politik.

Jadi walau bagaimanapun kita rasa pembangkang ini kita bertanggungjawab atas semangat perjuangan Palestin ini, kita mesti sokong ini, walaupun saya rasa dengan izin, *is a water down* usul. Jadi segala kejahatan kepada kewujudan satu negara baru di Palestin ini adalah Amerika Syarikat tetapi baru-baru ini, kita pergi ke Amerika Syarikat, kita bincang dengan Obama, kita senyum, kita makan, kita minum, seorang MP ada jadi Duta ini tidak buat kerja langsung tentang isu Palestin ini. Jadi Tuan Yang di-Pertua, Malaysia ini berpura-pura sahaja, ia tidak ada satu pendirian, satu ketegasan dalam hal Palestin. Saya rasa Ahli-ahli Parlimen di sini tidak dapat membezakan antara Fatah dengan Hamas, tidak tahu apa-apa tentang selok-belok politik daripada Timur Tengah.

Kenapa dunia Arab satu bahasa, satu agama tetapi pecah apabila kita mahu lihat isu Palestin ini.

Jadi Tuan Yang di-Pertua, saya rasa agak kesal, beberapa negara dulu perjuangan sudah selesai di dunia, kenapa Palestin ini belum selesai? Siapa yang jadi halangan? Malaysia ini saya rasa, saya minta maaf, bukan kita berani kutuk sebab kita mahu kutuk, tidak, ini sebab pemimpin ini tidak berpendirian, pemimpin ini tidak ada kredibiliti, mana ada Malaysia kredibiliti, kredibiliti ia kosong. Kes Tamil, pembunuhan beribu-ribu Tamil baru-baru ini bersubahat dengan kerajaan Mahinda Rajapakse yang ianya *racist*, bersubahat dengan rejim-rejim, APCO, apakah hubungan rejim dengan APCO, siapa ini APCO, belum dijawab di Parlimen tetapi sudah menghukum Ketua Pembangkang.

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat, masa Yang Berhormat.

Prof. Dr. P. Ramasamy [Batu Kawan]: Jadi Tuan Yang di-Pertua, Malaysia tidak kredibiliti. Saya rasa titik permulaan menyelesaikan masalah perjuangan Palestin ini, kita ada hubungan dengan Hamas. Jangan Fatah, Fatah ini tidak ada kredibiliti, kita mula dengan Hamas, barulah kita boleh tengok apa itu *road map* untuk Palestin ini. Jadi saya rasa barisan Ahli Parlimen semua ini tidak ada ilmu tentang timur tengah, ini cuma retorik sahaja. Jadi Tuan Yang di-Pertua...

Timbalan Yang di-Pertua [Datuk Dr. Wan Junaidi bin Tuanku Jaafar]: Sudah Yang Berhormat.

Prof. Dr. P. Ramasamy [Batu Kawan]: Jadi saya mengucapkan terima kasih dan saya menyokong usul ini.

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat Tumpat.

4.40 ptg.

Dato' Kamarudin Jaffar [Tumpat]: *Assalamualaikum Warahmatullaahi Wabarakaatuh*, salam sejahtera. Tuan Yang di-Pertua, saya mengucapkan terima kasih kerana diberi beberapa minit untuk turut bersama-sama dalam semangat membahaskan dan menyokong kegiatan yang perlu dilakukan untuk memastikan kemerdekaan dan kewujudan yang sah oleh negara Palestin dan untuk menentang tindakan-tindakan yang selama ini dilakukan oleh Israel Zionis itu.

Tuan Yang di-Pertua, saya amat gembira dengan kawan saya Yang Berhormat Batu Kawan kerana memberi penjelasan tentang politik di Palestin itu khususnya. Tinggal lagi saya ingin menjelaskan walaupun kita mempunyai kumpulan-kumpulan politik seperti Hamas dan Fatah dan sebagainya dan walaupun kita mendengar fakta-fakta yang jelas bahawa Amerika Syarikat dan Barat hari ini menentang Palestin kerana ia dipimpin oleh Hamas dan Hamas memenangi pilihan raya umum dalam negara Palestin itu yang disaksikan oleh Presiden Carter sendiri tetapi tidak diiktiraf oleh Barat kerana mereka membenci kepada Hamas. Namun begitu, kita perlu senantiasa jelas Tuan Yang di-Pertua, walaupun Palestin itu di bawah Hamas ataupun Palestin itu ditadbir oleh Fatah, zaman Yasser Arafat, Amerika Syarikat tidak pernah menyokong Palestin. Yasser Arafat tidak diberi pengiktirafan langsung oleh *White House* di Washington DC itu Tuan Yang di-Pertua.

Jadi inilah yang teruknya tentang Amerika Syarikat dan Barat ini bahawa alasan-alasan mereka mungkin berubah. Alasan mereka hari ini ialah kerana ia ditadbirkan atau kuasa besar politik di Palestin adalah Hamas, maka mereka tidak dapat menyokongnya walaupun Hamas ini menang dalam pilihan raya tetapi, kita

tahu sejarah Amerika Syarikat dan Barat tidak mahu melihat Palestin wujud sebagai sebuah negara yang bebas walau di bawah Hamas ataupun di bawah Fatah dan PLO. Begitu juga Tuan Yang di-Pertua, di pihak Israel. Kita hari ini kadangkala mengatakan Israel ini nampak ganas kerana ia ditadbirkan oleh kerajaan Parti Likud tetapi, yakinlah wahai Ahli-ahli Yang Berhormat dan Senator-senator yang agak ramai ini. Yakinlah bahawa walau Israel di bawah Likud atau Israel ditadbirkan oleh Parti Buruh (*Labour*) ataupun Israel ditadbir oleh Parti Kadima, Israel akan tetap dengan sokongan Amerika Syarikat berlaku ganas terhadap negara Palestin ini.

Jadi oleh sebab itu, walau Israel di bawah kerajaan sekarang Likud, walaupun di bawah kerajaan sebelum ini Kadima, walau sebelum itu Buruh tetapi Israel tetap oleh sebab utamanya sokongan daripada Amerika Syarikat akan terus berlaku ganas terhadap negara Palestin. Begitu juga Tuan Yang di-Pertua, kita mesti senantiasa sedar bahawa sebagaimana Yang Berhormat Batu Kawan sebutkan tadi, negara kita Malaysia ini mesti mempunyai pendirian kita yang sendiri. Kita amat bimbang mendengar berita-berita bahawa kesungguhan Malaysia, kesungguhan Wisma Putra, kesungguhan kedutaan-kedutaan kita di luar negara yang berkhidmat untuk memperjuangkan salah satu daripadanya kemerdekaan dan kewujudan negara Palestin ini, kita mendengar ada maklumat-maklumat bahawa kedutaan-kedutaan kita tidak begitu aktif, tidak begitu bersungguh-sungguh membantu gerakan seperti yang dilakukan oleh sukarelawan-sukarelawan ini.

Kita mendengar bahawa konsul kita di Istanbul tidak begitu bersungguh-sungguh semasa rombongan ini dalam persiapan untuk berlepas ke Gaza ini dalam memberikan kerjasama dan sokongan. Kita akui bahawa Yang Berhormat Menteri Luar, kita akui bahawa kedutaan di Jordan dan selepas itu di Istanbul, selepas peristiwa ini sudah berlaku mula memberikan sokongan yang boleh kita katakan amat menyukacitakan kita sekali tetapi sebelum ini meletup.

Walaupun sebagaimana Yang Berhormat Kinabatangan sebutkan tadi yang kita tidak bersetuju dengan beliau hanyalah beliau mengatakan hanya wakil rakyat daripada Barisan Nasional sahaja yang pergi. Saya ingin melaporkan bahawa wakil rakyat Padang Terap pun ada dalam rombongan yang pergi ke sana lebih kurang satu tahun yang lalu tetapi dihalang dan ditahan. Namun begitu, mungkin oleh sebab ia tidak mendapat sokongan daripada mantan Perdana Menteri, mungkin kerana tidak mendapat adanya wakil rakyat daripada Barisan Nasional, apa yang berlaku terhadap Yang Berhormat Padang Terap dan rombongan sukarelawan mereka itu tidak mendapat perhatian yang sepatutnya tetapi, untuk rekod yang mulia ini, sokongan terhadap perjuangan Palestin ini biarlah kita putuskan dan persetujui meliputi semua yang ada dalam Dewan ini dan seluruh negara kita. Janganlah kita pecah-pecahkan kumpulan ini menyokong dan kumpulan itu sebaliknya.

Tuan Yang di-Pertua, dalam masa yang ada ini saya ingin mencadangkan beberapa perkara iaitu pertamanya Malaysia...

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat, masa sudah habis Yang Berhormat.

Dato' Kamarudin Jaffar [Tumpat]: Satu ayat sahaja. Kita memberikan kerjasama dan sokongan yang sepenuhnya kepada negara Turki kerana Turkilah Tuan Yang di-Pertua, dia dalam NATO dia ada hubungan diplomatik dengan Tel Aviv tetapi dia berani memimpin dan menentang Israel dan Amerika Syarikat.

Keduanya, sebagai Ahli Parlimen sekali lagi saya ingin mencadangkan supaya kita wujudkan Jawatankuasa Pilihan Parlimen tentang Palestin. Kita bercakap tentang ini berdegar-degar dalam Dewan, luar Dewan, tetapi marilah sebagai anggota Dewan Rakyat, kita bersetuju untuk mewujudkan Jawatankuasa Pilihan Khas Tentang Palestin yang membolehkan kita berjuang untuk kes Palestin ini sebagai Ahli-ahli Dewan Rakyat. Sekian, terima kasih Tuan Yang di-Pertua.

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat Machang.

4.46 ptg.

Tuan Saifuddin Nasution bin Ismail [Machang]: *Assalamualaikum Warrahmatullaahi Wabarakaatuh.* Tuan Yang di-Pertua, terima kasih. Ruang lima minit ini saya mohon untuk menyampaikan beberapa perkara dalam perbahasan menyokong usul yang telah dibentangkan oleh Yang Amat Berhormat Perdana Menteri pagi tadi. Ceritanya ialah berkaitan dengan konvoi kemanusiaan yang telah diserang oleh Israel di perairan antarabangsa pada tanggal 31 Mei 2010. Kapal yang dimiliki atau disokong oleh Turki itu sebenarnya membawa pelbagai peralatan ubatan, bahan binaan, makanan dan pakaian kerana di sana terdapat 1.5 juta umat Islam Palestin yang menghadapi sekatan oleh Rejim Israel. Misi kemanusiaan melalui kapal MV, kapal Mavi Marmara itu berjaya dilaksanakan hasil daripada sokongan sebuah pertubuhan yang dikenali sebagai l'tilaf al-Khair atau *Union of Good* yang dipengerusikan oleh Ustaz Syeikh Dr. Yusuf Qardawi yang pada tahun 2009 telah dianugerahkan Tokoh Ma'al Hijrah Antarabangsa oleh Kerajaan Malaysia.

Melalui rangkaianannya di Turki, maka kapal itu bertolak dalam misi kemanusiaan. Hari ini kita menyatakan pendirian Parlimen Malaysia berkenaan dengan insiden itu ketika 1.5 juta umat Islam Palestin sedang terkepung. Kita dengar apa komen terbaru Robert Perry iaitu *envoy* ataupun yang disebut *United Nations Middle East envoy*. Komennya terhadap Kerajaan Gaza. Katanya, "*There is no humanitarian problem in Gaza. There might be occational shortage of construction materials and other goods*". Maknanya dari laporan dalam perspektif wakil Bangsa-Bangsa Bersatu mengenai Timur Tengah, Robert Perry, dia tidak nampak Gaza sekarang menghadapi masalah. Kalau baca laporan dia ini, tidak ada masalah kekurangan ubat, tidak ada masalah kekurangan bahan binaan, tidak ada masalah kekurangan makanan dan pakaian kepada umat Islam Palestin.

Ini laporan wakil Bangsa-Bangsa Bersatu. Daripada perspektif kita pula, tidak mungkin berita tentang peritnya kehidupan 1.5 juta umat Islam Palestin itu susah untuk kita fahami. Keadaan sangat terang. Seramai 1.5 juta umat Islam Palestin ini Tuan Yang di-Pertua, mereka sebenarnya ada kerajaan. Mereka mengundi dalam pilihan raya. Kerajaan yang mereka pilih ialah Kerajaan Hamas tetapi ramai Ahli Parlimen yang dipilih melalui proses demokrasi itu ditangkap dan dipenjarakan di Israel waktu ini. Beberapa bulan lepas, dua wakil Ahli Parlimen Hamas datang ke Parlimen. Dalam kunjungan hormatnya menemui Ketua Pembangkang, saya dan Yang Berhormat Bachok turut serta dalam pertemuan itu. Mereka memberikan kisah bagaimana susahnya dan azabnya kehidupan di sana. Oleh sebab itulah, ia mendorong banyak misi kemanusiaan antarabangsa dan salah satunya ialah yang disebut sebagai konvoi kapal Freedom Flotilla. Namun layanan yang diterima oleh tentera Israel amat menyedihkan, memakan korban dan sebagainya.

■1650

Isu ini sebenarnya bukanlah satu cerita baru. Cerita Israel membunuh, panjang kisahnya. Membunuh waktu subuh sahaja pernah berlaku Mac 2004 ketika tentera Israel membunuh Syeikh Ahmad Yassin, pengasas Hamas yang baru keluar daripada solat Subuh di sebuah masjid. Hancur mayatnya. Peristiwa pembunuhan itu mencetuskan satu tuntutan supaya PBB menyatakan satu sikap. Maka satu resolusi mengutuk dibuat. Kofi Annan jadi setiausaha agung waktu itu. Seramai 31 bersetuju mengutuk pembunuhan oleh Israel ke atas Syeikh Ahmad Yassin, dua menentang. Resolusi itu tidak boleh dilaksanakan sebab Amerika Syarikat menggunakan kuasa vetonya.

Saya percaya kalau kali ini pun Majlis Keselamatan Pertubuhan Bangsa-Bangsa Bersatu terpaksa membahas dan meluluskan resolusi, kemudiannya mengutuk, Amerika sekali lagi akan mengenakan kuasa vetonya. Itulah landskap politik dunia sekarang ini. Namun itu tidak menghalang kita daripada menyatakan sikap. Saya bersetuju dengan Yang Berhormat Pokok Sena yang menyebut kebanyakan yang kita syaraskan dalam perbahasan dari pagi ialah perkara yang orang lain patut buat. Saya memilih untuk menyebut perkara yang boleh kita buat.

Besar maknanya kalau dasar luar kita menyatakan pendirian politik kerajaan terhadap keputusan umat Islam Palestin, rakyat Palestin memilih Hamas. Dahulu kita tidak mengiktiraf Timor Leste, wilayah ke-27 yang melalui *referendum* nya berpisah dari Indonesia. Kita tidak mengiktiraf. Akan tetapi selepas mereka mengadakan pilihan raya, mereka ada kerajaan sendiri, kita iktiraf. Kita mengiktiraf maknanya bantuan keamanan. Kita hantar pasukan petugas. Begitulah kalau kita tidak mengiktiraf Kerajaan Palestin pimpinan Hamas.

Saya ingin mendapat pandangan daripada Yang Berhormat Menteri Luar Negeri yang hari ini kebetulan berada di sini, Tuan Speaker. Wisma Putra pada tahun 2006 pernah menyebut selepas...

Timbalan Yang di-Pertua [Datuk Dr. Wan Junaidi bin Tuanku Jaafar]: Masa, Yang Berhormat.

Tuan Saifuddin Nasution bin Ismail [Machang]: Saya habiskan ayat terakhir. Sejurus selepas pertemuan Perdana Menteri, Abdullah Badawi waktu itu dengan Hamas, *special envoy*, Dr. Azam Tarmimi, dilaporkan Wisma Putra, 20 Februari 2006 menyebut, "*Malaysia supported the Hamas-led Palestine Government*" – menyokong. Apakah pendirian itu kekal sekarang? Apakah menyokong bermakna mengiktiraf kerana waktu itu, ketika Malaysia menjadi tuan rumah OIC di Putrajaya, yang dijemput memberi ucapan ialah Mahmud Abas dari Palestin, Parti Fatah yang kalah pilihan raya sedangkan Mahmud Zahar, Menteri Luar Palestin, wakil Hamas ada di dewan konvensyen waktu itu.

Di satu sisi, Wisma Putra kata begitu menyokong kerajaan pimpinan Hamas. Di satu sisi lain, kita mengiktiraf pula parti yang kalah dalam pilihan raya. Kerana sikap inilah, maka kita agak keliru tentang pendirian dasar luar negara terhadap isu ini. Perkara ini sambil kita berbahas, pendirian kita tidak berubah, satu dalam perkara ini atas nama rakyat Malaysia yang cintakan keamanan, peluang ini harus diambil oleh kerajaan untuk memberikan penegasan.

Ayat saya yang terakhir, Tuan Yang di-Pertua, tidak lengkap kalau saya tidak juga berkongsi sama maklumat kepada kadar kecil-kecilan rakyat Malaysia, khususnya di negeri Kelantan ada dua perkara yang signifikan kami lakukan. Pertama, hari ini Kerajaan Kelantan membiayai 30 pelajar Palestin untuk belajar di Malaysia dengan kami membelanjakan sekitar RM29,000 sebulan untuk pelajar-pelajar ini belajar di peringkat diploma, sarjana dan doktor falsafah. Kami juga

beberapa bulan lepas menghimpunkan seluruh rakyat Kelantan dalam Program Selamatkan Rakyat Palestin yang turut dihadiri oleh Ketua Whip, Dr. Khalil Ismail Al-Hayya dan kami telah memberikan bantuan sebesar RM1.4 juta daripada rakyat Kelantan untuk umat Islam Palestin.

Barangkali juga kita boleh mengemukakan usul dan cadangan, setiap Ahli Parlimen kita potong RM5,000 seorang. Kalau ada 200 orang, kita sudah kumpul RM1 juta untuk kita bagikan bantuan segera kepada rakyat Palestin, kita cari jalan macam mana hendak sampaikan. Saya mohon menyokong dan mencadangkan. Terima kasih.

Beberapa Ahli: [Bangun]

Timbalan Yang di-Pertua [Datuk Dr. Wan Junaidi bin Tuanku Jaafar]:

Saya akan jemput Yang Berhormat Pokok Sena, Yang Berhormat Kuala Krai, Yang Berhormat Rantau Panjang dan Yang Berhormat Balik Pulau. Selepas itu Menteri menjawab.

4.55 ptg.

Dato' Mahfuz bin Haji Omar [Pokok Sena]: Terima kasih Tuan Yang di-Pertua. Saya ingin mengulangi apa yang telah saya sebut sebelum ini...

Tuan Haji Khalid bin Abd. Samad [Shah Alam]: Minta Shah Alam sekali, Tuan Yang di-Pertua.

Dato' Mahfuz bin Haji Omar [Pokok Sena]: ...Bahawa tidak cukup sekadar kita membenteng satu usul yang bersifat mengecam kerana tanpa usul ini pun, kita memang sudah pun mengecam tindakan kekejaman dan kezaliman yang dilakukan oleh Israel dan tidak cukup sekadar seperti yang saya sebut sebelum ini. Bahawa kita hanya meminta orang lain untuk melaksanakan sehingga kadang-kadang kita minta kita tidak tahu sama ada orang itu boleh buat ataupun tidak. Macam kita minta Amerika untuk sesuatu, kita minta PBB untuk buat sesuatu, sedangkan kita lihat bahawa mereka tidak ada kesediaan kerana kes isu Palestin, kezaliman Israel ke atas Palestin ini bukan isu baru sehari dua ini. Ia satu perkara yang sudah lama.

Saya juga hairan walaupun saya bersetuju bahawa Israel harus diseret ke Mahkamah Jenayah Antarabangsa, tetapi isunya ialah apabila kerajaan hanya memohon Turki untuk mempertimbangkan. Adakah kerajaan tidak membuat semakan? Setahu saya Turki juga belum *rectify Statute Rome*. Jadi, bagaimana Turki walaupun kapalnya ada sembilan orang rakyat Turki yang mati, bagaimana dia hendak mengambil tindakan ke atas Israel ataupun ke atas Benjamin Netanyahu?

Jadi sebab itu bagi saya seolah-olah usul ini tidak begitu diteliti tentang kemampuan negeri ataupun negara yang kita minta. Kita bersetuju Israel mesti dihadapkan tetapi persoalannya sekarang ini ialah bagaimana sikap kita untuk kita tunjukkan dengan negara-negara besar sama ada dengan Amerika seperti yang disebut oleh rakan-rakan tadi. Kita harus memperlihatkan sikap yang tegas. Panggil duta kita balik. Bukan kita tutup kedutaan. Kita panggil balik sahaja sementara waktu untuk menunjukkan ketegasan kita terhadap mereka yang gagal untuk melakukan tindakan bagi membebaskan bumi Palestin dan Semenanjung Gaza itu daripada kepungan Israel.

Begitu juga kita minta PBB, kita kecam PBB lewat, kenyataan yang lemah dan sebagainya. Sepatutnya, saya katakan bahawa kita tunjuk sikap, kita panggil duta kita balik sebagai protes kita kepada PBB. Jadi begitu juga hal berkaitan dengan soal APCO. APCO, syarikat proksi kepada Israel dan Amerika. Saya

katakan bahawa kenapa kita tidak tamatkan sahaja perkara yang paling mudah untuk kita lakukan.

Yang ketiga, kenapa kita masih lagi memakai dan menerima minit Kabinet 20 Mac 1996 yang membenarkan urusan perdagangan antara Malaysia dengan Israel. Sehingga sekarang saya katakan bahawa urusan perdagangan itu masih diluluskan oleh bahagian import eksport dan kelulusan itu dibuat secara rahsia mengikut Kabinet tahun 1996 itu, dibenarkan hal-hal dalam perkara-perkara yang tertentu untuk diberikan kelulusan secara rahsia, secara sulit. Kenapa ini? Kenapa kita hendak berahsia, kenapa kita hendak bersulit dalam soal ini?

Saya katakan bahawa ini menunjukkan sesuatu yang tidak jelas. Sebab itu saya minta kerajaan juga memperjelaskan kepada saya, berapa jumlah minyak sawit yang telah pun dihantar ke Israel, minyak masak. Minyak sawit untuk dibuat minyak masak – berapa jumlah, kerana saya difahamkan yang terakhir pada bulan Mei baru-baru ini dihantar dan saya hendak tahu bahawa syarikat mana yang diberikan kelulusan oleh MITI untuk menghantar minyak masak ke negara haram Israel dan juga bahan-bahan kimia yang lain yang kita hantar kepada Israel.

Saya juga hendak tahu kerana Timbalan Menteri MITI juga ada di sini. Di perpustakaan MITI di tingkat 11 ada majalah-majalah daripada Israel. Ini menunjukkan seolah-olah Kementerian Dalam Negeri mengizinkan, memberikan laluan untuk kemasukan majalah-majalah walaupun majalah berkaitan dengan ekonomi. Di perpustakaan tingkat 11 – *Israel Review*, *Israel Asia Trade*, buku *Advantage Trade Policy Review Israel*, *Advanced Technology from Israel*, *Opportunity Israel*, *The Economic of Israel* dan buku *Tariff Code* Perdagangan Israel.

Bukan hanya dibuka untuk pegawai-pegawai tetapi dibuka untuk ahli-ahli perniagaan dan usahawan untuk membuat semakan bagi tujuan urusan perdagangan. Menunjukkan bahawa MITI juga menjalankan kegiatan untuk membenarkan urusan perdagangan import eksport dengan Israel. Jadi macam mana saya katakan bahawa tangan kanan kita panggil Palestin, tangan kanan kita beri bantuan dan sebagainya, tangan kiri kita berdakap bersama, tidur lena, nyenyak bersama dengan Israel, bersama dengan APCO... [Tepuk]

Jadi bagi saya bahawa ini suatu yang bersifat hipokrit. Sebab itu saya katakan bahawa tidak cukup sekadar kita hendak kecam. Ini surat daripada Majlis Perunding Pertubuhan Islam Malaysia (MAPIM), salah seorang wakilnya berada atas kapal Mavi Marmara. MAPIM telah dimaklumkan di Malaysia, pada waktu itu wakil dia di atas kapal itu minta segera, mohon daripada Kerajaan Malaysia supaya minta PBB melaksanakan tindakan untuk mengawal kapal Mavi Marmara dan juga kapal-kapal Malaysia yang lain. Saya tidak tahu dan tidak dengar pun ada tindakan yang dibuat oleh Kerajaan Malaysia. Ini kerana mengikut wakil MAPIM yang ada di atas kapal tersebut, mereka sudah pun mendapatkan maklumat bahawa mereka akan diserang. Mereka sedang dikepung dan mereka akan diserang dan kita minta bantuan itu, kenapa kita tidak buat?

■1700

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat, masa Yang Berhormat.

Dato' Mahfuz bin Haji Omar [Pokok Sena]: Jadi sebab itu bila balik barulah hendak suruh simpati dan sebagainya. Saya bersetujulah kita simpati pada semua dan saya minta bahawa diberikan penganugerahan negara kepada semua mereka yang terlibat. Mereka adalah wira atas keberanian mereka tetapi kenapa kita tidak berani untuk menyatakan sikap yang jelas kepada kita untuk

tamatkan khidmat dengan APCO, batalkan Mesyuarat Kabinet 1996 yang mengizinkan urusan perdagangan kita, keberanian kita? Jadi sebab itu saya minta penjelasan daripada Yang Berhormat Menteri Luar terhadap apa yang saya bangkit. Terima kasih.

Timbalan Yang di-Pertua [Datuk Dr. Wan Junaidi bin Tuanku Jaafar]:
Sila Yang Berhormat Kuala Krai.

5.01 ptg.

Dr. Mohd. Hatta bin Md. Ramli [Kuala Krai]: Terima kasih Tuan Yang di-Pertua. Saya ingin turut sama membahaskan usul yang dibawa oleh Perdana Menteri mengenai beberapa cadangan tadi ini yang melibatkan sebenarnya tindakan kita semua sebagai rakyat dan juga masyarakat antarabangsa. Di antaranya perkara 12 meminta masyarakat antarabangsa supaya terus menghulurkan bantuan. Saya rasa ini yang telah dibuat oleh masyarakat antarabangsa baru-baru ini apabila mereka mengumpulkan sumbangan dan juga sukarelawan untuk menyertai suatu flotilla, suatu kelompok sebuah kapal ke Gaza.

Di antara yang banyak mengepalai ataupun yang menggerakkan gerakan ini ialah Ahli-ahli Parlimen Eropah (*European Parliament*). Kelihatannya sebelum ini ada beberapa orang Ahli Parlimen dari Britain yang mengepalai misi bantuan antarabangsa melalui darat dengan beberapa ratus buah kenderaan untuk menghantar bantuan ke Gaza. Namun seperti yang kita sedia maklum, sempadan Mesir di lintasan Rafah ditutup sehingga menghalang sebahagian besar daripada rombongan ini untuk masuk.

Jadi dalam konteks ini, dalam kita berbahas ini, saya hendak mencadangkan kita sebagai Ahli-ahli Parlimen Malaysia juga mengambil inisiatif untuk bergerak sebagai satu kumpulan *by partisan* untuk menyusun suatu misi yang boleh kita sekalian dengan rakan-rakan kita dari negara-negara yang lain yang berminat untuk menyusul tindakan yang telah dibuat oleh Freedom Flotilla. Mungkin bukan dengan cara laut, mungkin dengan cara lain. Akan tetapi kita sebagai Ahli-ahli Parlimen kerana kesan apabila *law makers* ini digabungkan seperti yang dibuat Ahli-ahli Parlimen Eropah itu, memberikan ataupun membuka mata dunia.

Kita tidaklah mengharapkan pula satu peristiwa tembak menembak yang menyebabkan kematian. Akan tetapi dengan kehadiran kita secara berkelompok itu, ia akan menambahkan lagi tekanan terhadap Israel dan juga terhadap negara-negara yang menyokongnya untuk menilai sokongan antarabangsa. Dengan cara ini bukan sahaja bantuan tidak dapat masuk tetapi masa hadapan pada Gaza itu dapat dijamin keselamatan mereka.

Selain daripada itu, kita di Malaysia pada beberapa - selepas peristiwa ini berlaku telah kelihatannya bersatu dan bergabung dalam pelbagai bentuk himpunan demonstrasi untuk menyatakan kemarahan kita kepada Zionis Israel dan juga negara Amerika Syarikat. Kita rasa kalau suara rakyat Malaysia ini digabungkan dan tidak dilihat berpecah – ada yang di Masjid Negara, ada yang di Masjid Tabung Haji, ada yang di Masjid Kampung Baru, ada pula merata-rata tempat yang lain. Ianya bukan tidak baik dari segi hendak melihatkan banyaknya tempat kita mengadakan himpunan ini. Ia bagus juga tetapi apalah salahnya kalau kita untuk isu ini kita mengetepikan sebarang bentuk pemikiran yang berbeza untuk menyatakan sokongan kita terhadap rakyat Palestin.

Apa pun kita berbangga kerana pada hari Jumaat yang lepas himpunan yang besar yang diadakan di Kuala Lumpur ini berjalan dengan baik. Saya hendak menekankan ini kerana kita kena ambil perhatian. Apabila himpunan ini dibuat

secara aman tidak ada gangguan daripada mana-mana pihak, suatu perarakan sejauh empat kilometer boleh berjalan dengan aman. Apa yang terganggu mungkin trafik sahaja tetapi *alhamdulillah* dengan sokongan daripada pihak berkuasa polis, trafik pun berjalan lancar dan himpunan itu pun berjalan lancar. Tidak ada gas pemedih mata, tidak ada tembakan air kimia.

Ertinya kalau tidak ada campur tangan setengah pihak, himpunan kita tetap akan berjalan dengan aman. Janganlah pula diperkecilkan himpunan ini, asyik demo, demo sahaja. Demo dan tuntutan inilah antaranya mengapa saya yakin mengapa kita memutuskan untuk mengadakan sidang ataupun usul khas yang dibawa pada sidang pada hari ini. Jadi Tuan Yang di-Pertua, saya sekali lagi merumuskan bahawa kita sebagai Ahli Parlimen – tadi itu baguslah Ahli Parlimen dari Parit bersedia untuk turun sama. Saya yakin kalau kita atur, bukan hanya dari Parit, Yang Berhormat Kinabatangan pun mungkin boleh memisahkan diri buat beberapa ketika dengan keluarga untuk sama-sama mencarta dan mencatat suatu usaha baru ke arah membantu rakan-rakan kita di Palestin. Tuan Yang di-Pertua, terima kasih.

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat Rantau Panjang.

5.06 ptg.

Puan Hajah Siti Zailah binti Mohd. Yusoff [Rantau Panjang]: Terima kasih Tuan Yang di-Pertua kerana turut memberi peluang kepada saya untuk sama-sama menyokong usul mengutuk kekejaman Israel terhadap umat Islam di Palestin. Kita semua tahu sejak daripada tahun 1948 lagi bagaimana keganasan yang telah dilakukan terhadap umat Islam di Palestin yang sekarang sudah makan masa lebih daripada 60 tahun. Bagaimana ribuan nyawa telah terkorban termasuk wanita dan kanak-kanak. Perkara ini semua kita tahu telah didalangi oleh Yahudi, Amerika dan sekutu-sekutunya. Jadi saya mengambil kesempatan ini juga untuk sama-sama kita mengutuk dan mengharapkan Kerajaan Malaysia memainkan peranan yang serius untuk mendesak PBB (Persatuan Bangsa-Bangsa Bersatu) mengambil tindakan tegas terhadap kezaliman kerajaan Israel ini.

Apa yang saya hendak sentuh juga dalam perbahasan ini iaitu supaya kerajaan Malaysia sekiranya betul-betul ikhlas untuk sama-sama kita mengecam keganasan Israel ini, hendaklah memutuskan apa sahaja bentuk perjanjian ataupun perdagangan secara sulit dengan kerajaan Israel, sama ada APCO Worldwide ataupun perdagangan rahsia bagaimana yang telah disebut oleh Ahli Parlimen Pokok Sena tadi. Kita mahu supaya kita Kerajaan Malaysia juga supaya sama-sama kita membuang sifat Yahudi yang ada dalam diri pemerintah hari ini. Ini kerana kalau kita mengutuk kezaliman terhadap Israel bagaimana membunuh umat Islam di Palestin, apa jadi di negara kita bagaimana 14 orang rakyat negara kita dibunuh di Memali. Apa salah mereka?

Bagaimana kita mengutuk Israel sedangkan kita tidak mengiktiraf kerajaan Hamas walaupun Hamas menang dalam pilihan raya? Mengapa Kerajaan Malaysia tidak mengiktiraf tuntutan royalti rakyat Kelantan yang diperintah oleh PAS memilih negeri Kelantan, tetapi dinafikan hak royalti? [Tepuk] Ini juga sikap Yahudi yang harus dibanteras.

Dr. Dzulkefly Ahmad [Kuala Selangor]: Terima kasih Yang Berhormat Rantau Panjang. Tuan Yang di-Pertua, bersedialah Yang Berhormat Rantau Panjang memohon dan meminta Perdana Menteri melantik wakil daripada Hamas di Malaysia ini? Satu perkara yang kita boleh lakukan segera dan bukan daripada Fatah.

Puan Hajah Siti Zailah binti Mohd. Yusoff [Rantau Panjang]: Saya bersetuju dengan pandangan daripada Yang Berhormat Kuala Selangor. Kalau betul kita benar-benar ingin memperjuangkan hak rakyat Palestin, seharusnya kerajaan Malaysia mengiktiraf wakil daripada Hamas, bukan daripada Fatah. Inilah yang seharusnya yang kita lakukan. Jadi saya mengambil kesempatan ini meminta supaya Kerajaan Malaysia benar-benar serius, bukan sahaja dari segi gimik politik untuk mendapat simpati ataupun sokongan rakyat dalam isu Palestin ini, tetapi kita mengharapkan ketegasan perlu ada pada setiap pemimpin negara kita ini untuk benar-benar membuktikan bagaimana kita hendak menyelamatkan negara yang menjadi kiblat pertama bagi umat Islam.

Tuan Haji Khalid bin Abd. Samad [Shah Alam]: Yang Berhormat Rantau Panjang, saya pun hendak kalau boleh hendak celah sedikit hendak beritahu. Peranan Kerajaan Malaysia apabila Mesir menutup pintu Rafah. Peranan Kerajaan Malaysia apabila Mesir melepaskan gas ke dalam terowong-terowong yang membunuh rakyat Palestin yang cuba hendak membawa bekalan masuk. Juga usaha mereka yang kita sebenarnya sebagai kerajaan yang mempunyai hubungan diplomatik dengan Mesir dan mereka ada kedutaan di sini.

■1710

Apakah yang telah kita lakukan apabila tindakan-tindakan ini dilakukan oleh Kerajaan Malaysia. Ini menimbulkan persoalan sejauh mana keikhlasan dan seriusnya kita berhubung isu Palestin. Saya hendak unkitkan balik apabila rombongan daripada Padang Terap bawa bekalan masuk melalui Mesir, melalui pintu Rafah, mereka langsung tidak mendapat apa-apa bantuan daripada Kedutaan Malaysia. Begitu juga kita diberitahu bahawa rombongan yang sama yang pergi dalam Flotilla ini apabila sampai di Istanbul langsung tidak dihiraukan.

Lalu dasar kita untuk membantu Palestin dan tuntutan mereka untuk mendapatkan keadilan, jangan kita sekadar hendak kecam kezaliman terhadap Flotilla ini sekatan itu dan sekatan yang dilakukan oleh Kerajaan Mesir itu sendiri mesti juga ditegur oleh Kerajaan Malaysia. Apa pandangan Yang Berhormat Rantau Panjang?

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat, masa Yang Berhormat sudah habis Yang Berhormat.

Puan Hajah Siti Zailah binti Mohd. Yusoff [Rantau Panjang]: Saya bersetuju dengan pandangan Yang Berhormat Kuala Selangor dan juga daripada Yang Berhormat Shah Alam dan saya meminta supaya ucapan daripada kedua-dua Ahli Parlimen tadi masuk dalam ucapan saya. Sekian, saya mohon menyokong.

Timbalan Yang di-Pertua [Datuk Dr. Wan Junaidi bin Tuanku Jaafar]: Yang Berhormat Balik Pulau.

5.11 ptg.

Tuan Mohd. Yusmadi Mohd Yusoff [Balik Pulau]: Terima kasih Tuan Yang di-Pertua kerana memberi peluang kepada Balik Pulau. Tuan Yang di-Pertua, saya apabila mendengar usul yang dicadangkan oleh Perdana Menteri bagi menunjuk respons warga Malaysia negeri yang mempunyai bilangan rakyat orang Islam yang ramai begitu lemah sekali.

Ini pada pandangan saya, kebetulan saya baru pulang daripada satu forum yang juga membincangkan isu ini dengan detil di Doha Forum, forum di Doha saya melihat satu sikap kepimpinan yang berbeza. Jadi saya menekankan di sini Tuan Yang di-Pertua, isunya ialah dengan izin, *is the leadership issue*.

Maksudnya ialah mana mungkin isu keselamatan, dasar luar boleh dilihat dari segi kerangka keselamatan, *security*, boleh dilihat dari segi kerangka perdagangan, *trade* dan juga boleh dilihat dari segi kerangka hubungan kemanusiaan. Di sini yang diketengahkan ialah isu keselamatan, isu kemanusiaan yang rata-rata didokongi oleh pandangan-pandangan yang bagi saya kuat *Human Rights Watch* sendiri mengatakan ini isu pencerobohan hak asasi manusia, isu kepimpinan.

Di sini saya kena tekankan, saya tidak lihat bagaimana kita kalau tidak mempunyai kekuatan kepimpinan politik tetapi sekurang-kurangnya menyokong satu sikap kepimpinan yang memberi harapan baru terhadap isu Palestin seperti yang ditunjukkan oleh Perdana Menteri Tayyip Recep Erdogan, apa beliau katakan di dalam respons terhadap isu ini. Beliau mengatakan apa yang ditunjukkan oleh Kerajaan Israel itu dengan izin, *is a state terrorism*.

Dewan yang mulia, kalau satu perkara itu diangkat sebagai *a state terrorism*, ini besar sifatnya kerana apabila berlaku peristiwa pengeboman bangunan di New York beberapa tahun yang lalu, Amerika dengan jaya mengangkat dan mendapat pengiktirafan dunia bahawa insiden itu ialah insiden keganasan tetapi hari ini apabila ada seorang tokoh pemimpin yang diterima baik oleh masyarakat dunia terutama orang Islam yang mampu sehingga hari ini di bawah kepimpinan beliau di dalam menangani isu Israel - Palestin ini yang mengangkat *this is a state terrorism* tidak ada satu pun suara yang menyokong.

Akan tetapi yang ditunjukkan oleh kita saya beri contoh perjumpaan Perdana Menteri Najib Tun Razak baru-baru ini dengan Obama, apa yang dibincangkan. Isu pertama dengan izin, isu utama ialah isu *nuclear non-proliferation*, isu kedua isu perdagangan *trade, investment, human right* saya tidak tahu apa itu *human right* yang dibincangkan. Afghanistan dan Iran dan barang diingat sebelum lawatan tersebut dilakukan kita di Dewan yang mulia ini secara dengan izin *by partisannya* secara melangkaui garis kepartian mengangkat agenda krisis di Teluk itu sebagai satu isu yang kita rakyat Malaysia yang diwakili oleh Parlimen mahu bawa ke peringkat antarabangsa tetapi peluang yang ada digunakan hanyalah untuk apa, untuk mengiakan apa yang dipanggil kepentingan Kerajaan Amerika.

Saya tidak nafikan di dalam hubungan antarabangsa, dua negara akan ke meja perundingan mengetengahkan kepentingan tetapi di sini di mana kepentingan Malaysia, di mana kepentingan umat sejagat, di mana kepentingan yang kita bawa daripada Dewan ini ke Amerika tetapi keghairahan yang ditunjukkan kononnya saya boleh katakan di sini, satu *press release*, dengan izin daripada Rumah Putih bertarikh 12 April dengan bangga mengatakan dengan izin, *the President congratulated Prime Minister Najib for recent actions on Strategic Goods Act*.

Patutlah di Dewan yang mulia ini beria benar sebelum lawatan meluluskan kononnya *Strategic Goods Act* ini tetapi apabila saya bangun, kita bangun mencelah adakah ini disebabkan oleh hambatan kononnya mahu mengampu Amerika kata tidak tetapi ini terbukti ini *press release* yang rasmi oleh Rumah Putih.

Kedua Tuan Yang di-Pertua, saya juga bersetuju dengan apa yang dicadangkan oleh Menteri Luar Turki iaitu Ahmet Davutoglu yang menyatakan bahawa menggesa satu siasatan yang bebas dan perlu dilakukan segera. Ini Tuan Yang di-Pertua, ingin saya kongsi sedikit apa yang dibincangkan di Doha yang dibincangkan sekarang ini ialah terdapat satu kepimpinan baru yang mampu di bawah kepimpinan Turki yang mampu mengangkat agenda Israel ke satu tahap yang lain. Kita tidak pernah tengok Amerika apatah lagi Setiausaha Luarnya

memberi satu respons yang kita yakin bahawa dasar terhadap Israel itu berubah, hanya sedikit baru-baru ini kita lihat apabila isu penempatan haram di Gaza. Hillary Clinton tidak pernah pada satu ketika di IPEC mengatakan itu satu perkara yang tidak baik, Obama pun ada.

Akan tetapi isunya di sini ini melibatkan kematian dan saya yakin kalau kepimpinan yang ditunjukkan oleh Tayyip Erdogan tidak disokong oleh warga dunia, saya yakin Amerika akan menggunakan kekuatannya untuk dengan izin, *to destabilize* Erdogan di Turki dan ini berlaku pertukaran ketua pembangkang di Dewan Turki dan kita tahu apa yang berlaku perkembangan di dalam domestik politik di Turki. Saya mengatakan di sini mana mungkin kalau tidak ditunjukkan kesungguhan kepimpinan oleh Perdana Menteri Malaysia menggesa dengan lebih keras mana mungkin Amerika akan berubah...

Timbalan Yang di-Pertua [Datuk Dr. Wan Junaidi bin Tuanku Jaafar]: Masa Yang Berhormat.

Tuan Mohd. Yusmadi Mohd Yusoff [Balik Pulau]: Akhir sekali Tuan Yang di-Pertua saya senada dengan Yang Berhormat Tumpat tadi supaya isu Israel dan Palestin ini bukanlah isu bermusim politik sifatnya. Kita mengangkat isu Myanmar contohnya kita bentuk satu kokus yang saya rasa boleh dibanggakan, *ASEAN Inter-Parliamentary Myanmar Caucus* dan saya menggesa Dewan yang mulia ini mewujudkan kalau yang lebih tinggi lagi mungkin satu *select committee on foreign policy* dengan pengkhususan isu Palestin ini kerana saya mendapat peluang kerana ada juga kelompok-kelompok Yahudi yang tidak bersetuju dengan penempatan haram di Palestin ini secara konsisten setiap hari Jumaat di New York di depan Konsulat Israel menentang, mana mungkin kita warga Islam dari segi sentimen agamanya, dari sentimen keadilannya melakukan gerak kerja melawan Rejim Zionis ini secara bermusim. Jadi saya menggesa kerajaan menunjukkan sikap sebegini kerana sekiranya ini tidak diputuskan, saya melihat tidak ada kesungguhan kepimpinan, *there is no political will* daripada *government of the day*.

■ 1720

Akhir sekali Tuan Yang di-Pertua, sedikit saya mahu menyentuh ini. Kita di Dewan yang mulia ini penggal yang lepas menjelaskan kenapa negara ini perlu diselamatkan daripada satu badan yang berpengaruh kuat, Zionis pengaruhnya yang telah menular masuk ke Kerajaan Malaysia. Akan tetapi baru-baru ini Yang Berhormat Permatang Pauh telah digesa oleh satu badan tertua Yahudi di Israel bernama B'nai B'rith International ini, dengan menghantar surat kepada John Kerry, Richard G. Lugar...

Timbalan Yang di-Pertua [Datuk Dr. Wan Junaidi bin Tunku Jaafar]: Yang Berhormat.

Tuan Mohd. Yusmadi Mohd. Yusoff [Balik Pulau]: Ya, dan ini bagi saya Tuan Yang di-Pertua, kalau ini kita memukul APCO tetapi yang terasanya satu kelompok kuat di Israel, siapa APCO ini? APCO ini mesti berpengaruh sifatnya hingga mampu mempengaruhi pemimpin dunia, dan bagi saya kalau harapan Malaysia, pimpinan mahu menyelamatkan Malaysia daripada ejen Zionis, harapan dunia pimpinan macam Erdogan tidak didukung. Apa dasar luar negara? Atas dasar itu saya menggesa usul seperti yang dicadangkan oleh Ketua Pembangkang, Permatang Pauh seperti pindaan yang dinyatakan itu, diluluskan dan dipersetujui oleh Dewan yang mulia ini. Terima kasih.

Timbalan Yang di-Pertua [Datuk Dr. Wan Junaidi bin Tunku Jaafar]: Yang Berhormat Menteri.

5.21 ptg.

Menteri Luar Negeri [Dato' Sri Anifah bin Aman]: Tuan Yang di-Pertua, terima kasih kerana mengizinkan saya menggulung perbahasan yang telah bermula pada pagi tadi. Saya mengucapkan ribuan terima kasih kepada Ahli-ahli Yang Berhormat yang mengambil bahagian dalam perbahasan dan menyokong usul yang dibawa oleh Yang Amat Berhormat Perdana Menteri, mengutuk serangan kejam oleh tentera Rejim Zionis Israel ke atas konvoi kapal Freedom Flotilla yang membawa bantuan kemanusiaan ke Gaza. Walaupun ramai di antara Ahli-ahli Yang Berhormat yang tidak berpeluang membahaskan usul ini, saya yakin kita semua dalam Dewan yang mulia ini menyokong pendirian Malaysia dalam perkara ini. Suara Yang Amat Berhormat Perdana Menteri adalah suara seorang pemimpin berjiwa rakyat yang prihatin terhadap isu-isu kemanusiaan, keadilan dan kesedaran sejagat bagi menjamin keamanan, kesejahteraan dan kestabilan dunia.

Sifat keprihatinan Yang Amat Berhormat Dato' Sri Mohd. Najib bin Tun Haji Abdul Razak dan kita semua terhadap kesengsaraan dan keperitan hidup rakyat Palestin adalah selaras dengan dasar negara yang sentiasa memberi sokongan padu dan bantuan kepada perjuangan rakyat Palestin.

Tuan Yang di-Pertua, tindakan kejam tentera Rejim Zionis Israel di bawah pimpinan Perdana Menteri Benjamin Netanyahu menyerang konvoi kapal Freedom Flotilla yang membawa bantuan kemanusiaan di perairan antarabangsa Gaza pada 31 Mei 2010 telah dikutuk sekeras-kerasnya oleh Malaysia dan juga masyarakat antarabangsa. Dalam hal ini, saya juga berterima kasih ke atas kesepakatan yang ditunjukkan oleh semua Ahli Yang Berhormat mengutuk sekeras-kerasnya tindakan kejam tentera Zionis Israel terhadap aktivis-aktivis yang membawa bantuan kemanusiaan. Serangan tentera Rejim Zionis Israel ke atas kapal misi bantuan kemanusiaan merupakan tindakan keganasan yang mencabuli hak asasi manusia, undang-undang kemanusiaan antarabangsa dan bertentangan dengan Piagam Pertubuhan Bangsa-Bangsa Bersatu.

Serangan tidak berperikemanusiaan ini membuktikan dengan jelas kekejaman tentera Rejim Zionis Israel yang tidak menghargai nyawa manusia. Tentera Rejim Zionis Israel telah menggunakan kekerasan ke atas ahli misi bantuan kemanusiaan yang tidak bersenjata dan melepaskan tembakan yang mengakibatkan kematian dan juga kecederaan.

Tindakan tentera Rejim Zionis ini juga membuktikan kepada dunia keangkuhan dan kezaliman Israel. Ini jelas ternyata apabila Perdana Menteri Benjamin Netanyahu dengan bangganya mempertahankan tindakan kejam tentera Rejim Zionis Israel atas alasan memelihara kedaulatan dan keselamatan wilayah Israel.

Tuan Yang di-Pertua, tindakan ganas dan tidak bertamadun oleh Rejim Zionis Israel bukan merupakan fenomena yang baru bagi masyarakat antarabangsa, terutamanya rakyat Palestin. Pembunuhan beramai-ramai di Kem Pelarian Palestin Sabra dan Shatilla di Lubnan pada tahun 1982, di selatan Lubnan pada tahun 1996 dan Operation Cast Lead pada penghujung tahun 2008 di Gaza masih segar di dalam ingatan kita. Kekejaman demi kekejaman tentera Rejim Zionis Israel ini mesti dihentikan, justeru itu masyarakat antarabangsa perlu bertindak tegas menamatkan kekejaman ini.

Tuan Yang di-Pertua, semasa perbahasan usul ini, ramai Ahli Yang Berhormat telah melahirkan kekecewaan mereka terhadap kegagalan Majlis Keselamatan Pertubuhan Bangsa-Bangsa Bersatu mengambil satu ketetapan

yang tegas terhadap kekejaman melampau Rejim Zionis Israel itu. Walaupun kecewa dengan kegagalan Majlis Keselamatan PBB mengambil tindakan seperti yang diharapkan, Malaysia akan terus berusaha memperjuangkan nasib rakyat Palestin. Dalam hal ini, Malaysia dengan negara-negara sependapat akan berusaha mendesak Majlis Keselamatan PBB mengeluarkan satu resolusi mengutuk tindakan ganas Israel dan membawa pimpinan Rejim Zionis Israel dihadapkan untuk pengadilan ke Mahkamah Jenayah Antarabangsa.

Sekiranya Majlis Keselamatan PBB gagal mengambil tindakan berkenaan, Malaysia akan bekerjasama dengan negara-negara sependapat supaya satu persidangan sesi khas tergepar Perhimpunan Agung PBB diadakan bagi mendapatkan nasihat undang-undang daripada Mahkamah Keadilan Antarabangsa berhubung dengan Israel yang dilakukan di perairan antarabangsa.

Berhubung cadangan Yang Berhormat Permatang Pauh agar Malaysia bekerjasama dengan negara Turki untuk mengambil tindakan terhadap tentera Rejim Zionis Israel yang diketuai oleh Benjamin Netanyahu, Perdana Menteri Israel. Kementerian Luar Negeri mengambil maklum akan cadangan ini dan akan meneliti dengan lebih mendalam kemungkinan tindakan-tindakan yang boleh diambil. Penelitian ini perlu lebih-lebih lagi memandangkan Malaysia dan negara Turki pada masa ini bukan negara ahli Statut Rom kepada Mahkamah Jenayah Antarabangsa.

Walau bagaimanapun, di bawah Statut Rom Mahkamah Jenayah Antarabangsa, satu jalan untuk membawa ahli angkatan bersenjata Israel yang telah menceroboh kapal Turki Mavi Marmara dan membunuh sembilan orang aktivis adalah supaya negara Turki membawa perkara ini ke Majlis Keselamatan Pertubuhan Bangsa-Bangsa Bersatu untuk dirujuk ke Mahkamah Jenayah Antarabangsa. Turki yang juga merupakan ahli tidak tetap Majlis Keselamatan PBB boleh juga membawa perkara ini ke hadapan Majlis Keselamatan PBB. Di samping itu, Malaysia akan terus menuntut supaya Rejim Zionis Israel mematuhi resolusi 1860/2009, Majlis Keselamatan PBB supaya membuka laluan bagi penghantaran bantuan kemanusiaan ke Gaza. Dalam hal ini juga, Malaysia akan terus menyeru kerajaan Mesir supaya membenarkan bantuan kemanusiaan disalurkan melalui pintu sempadan Rafah.

Dalam hal ini, adalah penting bagi negara-negara sependapat terutama anggota Pertubuhan Persidangan Islam (OIC) dan Pergerakan Negara-Negara Berkecuali (NAM) bersatu dalam usaha membawa Rejim Zionis Israel ke muka pengadilan. Tindakan ini akan membuktikan kepada Rejim Zionis Israel bahawa masyarakat antarabangsa sepakat dalam menentang dan mengutuk kekejaman yang dilakukan oleh rejim tersebut.

Menyentuh ulasan Yang Berhormat Bachok mengenai OIC, *extraordinary meeting*, saya ingin memaklumkan bahawa satu mesyuarat tergepar Jawatankuasa Eksekutif Pertubuhan Persidangan Islam (OIC) di peringkat menteri telah diadakan pada 6 Jun 2010 di Jeddah.

Malaysia telah mengambil peranan yang aktif dalam mesyuarat ini dan mesyuarat tersebut telah mengeluarkan satu komunike yang mengecam sekeras-kerasnya serangan tentera Israel yang cenderung kepada tindakan keganasan melanggar prinsip undang-undang antarabangsa dan mencabuli hak asasi manusia. Komunike tersebut telah:

- (i) menuntut supaya Setiausaha Agung Pertubuhan Bangsa-Bangsa Bersatu menubuhkan satu Suruhanjaya Siasatan Antarabangsa yang bebas untuk mengenal pasti tindakan

- yang boleh diambil ke atas Israel dan mengenakan hukuman kepada mereka yang bertanggungjawab;
- (ii) menuntut supaya Israel membayar ganti rugi dan memberi pampasan sepenuhnya selaras dengan piawaian antarabangsa di atas kehilangan nyawa dan kecederaan orang awam akibat tindakan agresif tentera Israel;
- (iii) menyeru negara-negara anggota OIC yang ada hubungan dengan Israel untuk mengkaji semula hubungan ini termasuklah hubungan diplomatik;
- (iv) menyeru negara-negara anggota OIC supaya menyelaraskan usaha-usaha mereka dengan masyarakat antarabangsa untuk menamatkan kepungan Israel ke atas Gaza, termasuk mengenakan siasatan ke atas Israel.

■ 1730

- (v) menggesa Setiausaha Agung OIC untuk mengambil langkah-langkah perlu bagi mengadakan mesyuarat khas perhimpunan Agung Pertubuhan Bangsa-Bangsa Bersatu dalam rangka kerja *uniting for peace* untuk menghentikan kepungan Israel ke atas Gaza.

Tuan Yang di-Pertua, berkenaan soalan Yang Berhormat Kulim Bandar Baharu, cadangan untuk menubuhkan pasukan pengaman OIC telah pun dibincangkan di peringkat Menteri-Menteri OIC. Ketika ini cadangan ini masih lagi di peringkat perbincangan dan memerlukan kajian yang menyeluruh. Malaysia juga menyokong desakan supaya satu siasatan yang benar-benar bebas disegerakan selaras dengan resolusi Majlis Hak Asasi menerusi PBB pada 2 Jun 2010.

[Timbalan Yang di-Pertua (Datuk Ronald Kiandee) **mempengerusikan Mesyuarat**]

Seperti yang dimaklumkan oleh Yang Amat Berhormat Perdana Menteri, Malaysia mengalu-alukan cadangan yang dibuat oleh Setiausaha Agung Bangsa-Bangsa Bersatu, Ban Ki-Moon pada 6 Jun 2010 supaya satu panel diketuai oleh bekas Perdana Menteri New Zealand iaitu Geoffrey Palmer yang juga pakar undang-undang maritim dan dianggotai wakil daripada Turki, Israel dan Amerika Syarikat.

Berkenaan saranan Yang Berhormat Bagan supaya Yang Amat Berhormat Perdana Menteri mengadakan pertemuan dengan Presiden Barack Obama sebagai langkah awal, saya telah mengarahkan pegawai kanan kementerian untuk memanggil kuasa usaha sementara Kedutaan Amerika Syarikat di Kuala Lumpur bagi merakamkan rasa kecewa dan tidak puas hati Malaysia terhadap kenyataan lemah yang menyebelahi Regim Zionis Israel oleh Amerika Syarikat dan pendirian Presiden Obama yang tidak mengutuk tindakan Israel.

Selain daripada itu, saya juga bercadang untuk mengutus surat bantahan kepada Setiausaha Negara Amerika Syarikat, Hillary Clinton mengenai perkara sama serta sokongan tanpa batasan Amerika ke atas Regim Zionis Israel. Saya juga ingin menyangkal tuduhan yang tidak berasas Yang Berhormat Gombak bahawa Yang Amat Berhormat Perdana Menteri tidak mengutuk Amerika Syarikat ke atas tindakan zalim Regim Zionis Israel semasa ucapan beliau pada pagi ini

kerana beliau dengan jelas mendesak Amerika Syarikat untuk tampil tanpa sebarang dolak-dalik menunaikan tanggungjawab moralnya terhadap masyarakat antarabangsa dan mengutuk keganasan yang dilakukan oleh Rejim Zionis Israel.

Saya juga ingin menyatakan di sini bahawa Yang Berhormat daripada Gombak telah menyatakan di Dewan Rakyat petang ini bahawa BN UMNO hipokrit bentang usul kutuk Israel kerana telah lantik APCO yang dia sebut kononnya milik Yahudi Israel dan saya meminta supaya Yang Berhormat daripada Gombak buka satu *website* iaitu www.apcoworldwide.com. Disebut APCO adalah salah sebuah syarikat perunding komunikasi terbesar di dunia, dimiliki secara *independent*, *private* dan persendirian yang ditubuhkan pada 1984, beribu pejabat di Washington D.C dan bukanlah di Israel...

Beberapa Ahli Pembangkang: [Menyampuk]

Dato' Sri Anifah bin Aman: APCO ini kini adalah sebagai *one of the largest independently-owned communication consultancies in major business and media capitals throughout the world*. Margery Kraus President dan CEO APCO Worldwide adalah seorang wanita berkulit putih rakyat Amerika Syarikat dan bukanlah rakyat Israel. Sebagai satu strategi perniagaan, maka APCO mempunyai apa yang disebut sebagai *International Advisory Council* (IAC) yang bukan pemilik APCO, sekadar menjadi penasihat bila diperlukan. Daripada 53 orang ahli IAC yang berasal daripada pelbagai negara, terdapat tiga orang daripada Israel, 50 orang lagi bukan dari Israel. Tiga penasihat daripada 50 orang ini tidak menjadikan ianya Israel.

Tuan Yang di-Pertua, saya juga ingin menjawab beberapa tuduhan yang telah pun dibuat oleh Yang Berhormat daripada Tumpat dan juga Pokok Sena yang mengatakan bahawa *Honorary Council, Istanbul* tidak bersungguh-sungguh untuk membantu sukarelawan-sukarelawan yang apabila mereka berada di Istanbul. Ingin saya katakan di sini bahawa saya sendiri sebagai Menteri Luar telah pun berhubung dengan pihak-pihak tertentu di Turki supaya membantu sukarelawan-sukarelawan kita dan juga apabila mereka menghadapi kesulitan dan sekiranya ancaman-ancaman daripada pihak Rejim Zionis ini. Saya juga telah pun berbincang secara sulit dengan mereka yang sehaluan dan sependapat dengan kita cara bagaimana kita hendak membantu dan sekiranya berlaku apa-apa yang tidak diingini termasuklah juga pembebasan rakyat kita yang telah pun ditahan di Israel ataupun di Ashdod ketika itu.

Saya juga ingin menyatakan bahawa Yang Berhormat Tumpat juga mencadangkan satu Jawatankuasa Palestin untuk mengkaji keadaan sebenarnya dan saya akan membawa ini dan berbincang serta meneliti sebaik mungkin. Sekiranya perlu, kita juga, saya setuju untuk mewujudkan jawatankuasa seumpama itu.

Seperkara lagi, apa yang dibangkitkan oleh Yang Berhormat Kuala Krai, Rantau Panjang dan Shah Alam juga. Yang Berhormat Shah Alam telah pun menuduh bahawa kita tidak membantu juga flotilla yang telah pun menghadapi kesulitan atau sebelum ia berlayar. Itu juga satu tuduhan yang liar dan tidak payahlah saya memberi penerangan yang selanjutnya atas apa yang kita bincang dan siapa yang kita hubungi untuk mendapatkan atau memastikan bahawa rakyat kita selamat.

Mengenai eksport oleh Yang Berhormat Pokok Sena, saya ingat pada 1996 eksport..., kelapa sawit atau minyak sawit ke Israel?

Dato' Mahfuz bin Haji Omar [Pokok Sena]: Yang terakhir pada bulan Mei tahun ini.

Dato' Sri Anifah bin Aman: Ya, nanti.

Dato' Mahfuz bin Haji Omar [Pokok Sena]: Itu keputusan Kabinet 1996 untuk mengizinkan urusan perdagangan eksport import dibuat secara rahsia dan diluluskan oleh bahagian eksport import MITI.

Dato' Sri Anifah bin Aman: Akan tetapi bermula daripada 1996?

Dato' Mahfuz bin Haji Omar [Pokok Sena]: Dan terakhir, Mei. Baru-baru ini masih lagi.

Dato' Sri Anifah bin Aman: Okey. Bermula 1996 dan berakhir Mei.

Dato' Mahfuz bin Haji Omar [Pokok Sena]: Ya, ya.

Dato' Sri Anifah bin Aman: Walau bagaimanapun, saya tidak ada jawapan pada hari ini dan saya juga akan bertanya kepada seluruh...

Dato' Mahfuz bin Haji Omar [Pokok Sena]: Dan juga majalah-majalah Israel yang ada di pejabat MITI.

Dato' Sri Anifah bin Aman: Pada tahun 1996, saya akan bertanya kepada Yang Berhormat Menteri Perdagangan ketika itu dan juga Menteri Kewangan pada ketika 1996... *[Dewan riuh]*

Dato' Mahfuz bin Haji Omar [Pokok Sena]: Majalah pada waktu itu.

Timbalan Yang di-Pertua [Datuk Ronald Kiandee]: Yang Berhormat.

Dato' Mahfuz bin Haji Omar [Pokok Sena]: Pada waktu itu Perdana Menteri ialah ayahanda kepada Yang Berhormat Jerlun. Ayahanda kepada Yang Berhormat Jerlun menjadi Perdana Menteri pada waktu itu.

Dato' Sri Anifah bin Aman: Saya faham. Ya, kita tidak begitu banyak Perdana Menteri.

Dato' Mahfuz bin Haji Omar [Pokok Sena]: Itu urusan Perdagangan MITI.

Dato' Sri Anifah bin Aman: Yang Berhormat, saya katakan saya akan siasat dan beri penjelasan dan saya juga katakan tadi bahawa ia bermula tahun 1996 di mana ketika itu saya akan bertanya kepada Yang Berhormat Menteri Perdagangan atau MITI dan juga Yang Berhormat Menteri Kewangan. Siapa dia Yang Berhormat Menteri Kewangan pada 1996? Barangkali beliau juga mengetahui apa sebab....

Dato' Seri Anwar Ibrahim [Permatang Pauh]: Yang Berhormat Menteri Kewangan. Ini kena tanya Yang Berhormat Menteri Luar Negeri dan Yang Berhormat Menteri Perdagangan. Setakat saya tahu, Menteri Kewangan tidak ada. Boleh *check record*... *[Dewan riuh]*

Dato' Sri Anifah bin Aman: Yang Berhormat. Terima kasih. Terima kasih. Rupanya ada juga orang yang terasa. Setahu saya...

Dato' Mahfuz bin Haji Omar [Pokok Sena]: Tidak. Memang *clear*. Ini bukan urusan Kementerian Kewangan.

Dato' Sri Anifah bin Aman: Duduk, duduk!

Dato' Mahfuz bin Haji Omar [Pokok Sena]: Ini urusan MITI dan juga hal ehwal luar... *[Dewan riuh]*

Dato' Sri Anifah bin Aman: Yang Berhormat, Yang Berhormat belum menjadi menteri.

Timbalan Yang di-Pertua [Datuk Ronald Kiandee]: Yang Berhormat.

Dato' Mahfuz bin Haji Omar [Pokok Sena]: Sebab itu bagi saya sepatutnya, sepatutnya tahun ini juga kita eksport minyak masak... *[Dewan riuh]*

Timbalan Yang di-Pertua [Datuk Ronald Kiandee]: Yang Berhormat.

Dato' Mahfuz bin Haji Omar [Pokok Sena]: Minyak sawit ke Israel. Sepatutnya kita melakukan sekatan ekonomi terhadap Israel. Sekarang kita memberikan keizinan untuk askar Israel... *[Bercakap tanpa menggunakan pembesar suara]*

Timbalan Yang di-Pertua [Datuk Ronald Kiandee]: Yang Berhormat. Kita ada peraturan, Yang Berhormat. Kena minta jalan, ya.

Dato' Sri Anifah bin Aman: Tidak apalah. Saya sahabat dengan Yang Berhormat daripada Pokok Sena. Namun Yang Berhormat belum jadi menteri lagi. Macam mana urusan kita? Kita selalu berbincang. Bukan sahaja Menteri Luar, bukan sahaja MITI. Kita juga berbincang dengan Yang Berhormat Menteri Kewangan.

Dato' Mahfuz bin Haji Omar [Pokok Sena]: Perdana Menteri pada waktu itu ialah...

Dato' Sri Anifah bin Aman: Yang Berhormat, Yang Berhormat.

Dato' Mahfuz bin Haji Omar [Pokok Sena]: Perdana Menteri pada ketika itu ialah ayahanda Yang Berhormat Jerlun. Ayahanda Yang Berhormat Jerlun.

Dato' Sri Anifah bin Aman: Yang Berhormat, Yang Berhormat.

Dato' Mahfuz bin Haji Omar [Pokok Sena]: Perdana Menteri pada waktu itu yang meluluskan.

Dato' Sri Anifah bin Aman: Yang Berhormat belum lagi menjadi Ahli Kabinet. Maka Yang Berhormat tidak mengetahui tentang...

Dato' Mahfuz bin Haji Omar [Pokok Sena]: Yang mempengerusikan Kabinet.

Dato' Sri Anifah bin Aman: ...Prosedur-prosedur yang dijalankan. Tidak apalah, Yang Berhormat.

Dato' Mahfuz bin Haji Omar [Pokok Sena]: Yang mempengerusikan Kabinet pada tahun 1996 ialah ayahanda Yang Berhormat Jerlun.

Timbalan Yang di-Pertua [Datuk Ronald Kiandee]: Yang Berhormat, Yang Berhormat.

Dato' Mahfuz bin Haji Omar [Pokok Sena]: Ayahanda Yang Berhormat Jerlun menjadi Perdana Menteri dan mempengerusikan Kabinet pada waktu itu.

Dato' Sri Anifah bin Aman: Yang Berhormat, jangan sensitif sangat. Saya mengatakan...

Dato' Mahfuz bin Haji Omar [Pokok Sena]: Pada 20...

Dato' Sri Anifah bin Aman: Saya mengatakan saya akan bertanya.

Dato' Mahfuz bin Haji Omar [Pokok Sena]: Ya.

Dato' Sri Anifah bin Aman: Saya hendak menjawab apa yang soalan Yang Berhormat. Saya kata saya akan bertanya secara ikhlas kepada MITI, Menteri MITI dan juga mengenai kewangan - Menteri Kewangan. Jadi janganlah sensitif sangat. Tidak ada hal.

Dato' Mahfuz bin Haji Omar [Pokok Sena]: Saya tidak sensitif. Saya tidak sensitif.

Dato' Sri Anifah bin Aman: Tidak ada hal. Kenapa Yang Berhormat...

Dato' Mahfuz bin Haji Omar [Pokok Sena]: Sepatutnya maklumat itu boleh dijawab sekarang... *[Dewan riuh] [Bercakap tanpa menggunakan pembesar suara]*

Timbalan Yang di-Pertua [Datuk Ronald Kiandee]: Yang Berhormat. Yang Berhormat Pokok Sena. Yang Berhormat Pokok Sena.

Dato' Mahfuz bin Haji Omar [Pokok Sena]: *[Bercakap tanpa menggunakan pembesar suara]*

Dato' Sri Anifah bin Aman: Yang Berhormat.

Timbalan Yang di-Pertua [Datuk Ronald Kiandee]: Ya.

Dato' Sri Anifah bin Aman: Yang Berhormat ini tidak begitu mengerti apa yang saya katakan tadi.

■1740

Saya kata ada soalan-soalan yang saya dapat jawab pada masa kini, ada soalan-soalan yang saya akan memberi secara bertulis. Jadi saya katakan saya tidak mahu memberi jawapan kepada Yang Berhormat, yang tidak tepat. Apa salahnya saya mengatakan saya akan bertanya dengan Menteri MITI dan juga Menteri Kewangan! Apa yang sensitif sangat Yang Berhormat? Ya, kalau perlu Yang Amat Berhormat Perdana Menteri pun saya akan bertanya juga, setuju?

Dato' Mahfuz bin Haji Omar [Pokok Sena]: Okey.

Dato' Sri Anifah bin Aman: Okey. Terima kasih. Saya dengan Yang Berhormat Pokok Sena tidak mempunyai masalah.

Dr. Dzulkefly Ahmad [Kuala Selangor]: *[Bangun]*

Timbalan Yang di-Pertua [Datuk Ronald Kiandee]: Yang Berhormat hendak beri jalan lagi Yang Berhormat?

Dato' Sri Anifah bin Aman: Saya ingat Yang Berhormat saya akan habiskan.

Dr. Dzulkefly Ahmad [Kuala Selangor]: Yang Berhormat Menteri.

Timbalan Yang di-Pertua [Datuk Ronald Kiandee]: Yang Berhormat Kuala Selangor duduk dahulu.

Dr. Dzulkefly Ahmad [Kuala Selangor]: Soalan.

Timbalan Yang di-Pertua [Datuk Ronald Kiandee]: Saya sudah tanya Yang Berhormat. Dia tidak beri jalan lagi.

Dr. Dzulkefly Ahmad [Kuala Selangor]: Sedikit soalan. Soalan tentang perkara yang Kerajaan Malaysia boleh lakukan segera dari segi perwakilan daripada kerajaan yang diangkat oleh rakyat Palestin yakni Hamas. Bagaimana itu? Yang Berhormat Menteri kita minta perkara ini – banyak perkara yang

merupakan perkara yang bukan di dalam kuasa kita untuk bertindak, tetapi ini adalah pendirian yang cukup penting dan kerajaan Malaysia untuk konsisten dengan usul yang dibawa oleh Yang Amat Berhormat Perdana Menteri tadi, sewajarnya mengambil tindakan itu sebagai langkah pertama untuk membuktikan bahawa beliau adalah *commit*...

Dato' Sri Anifah bin Aman: Yang Berhormat, kita sentiasa konsisten. Dalam mana-mana forum antarabangsa sama ada OIC, NAM dan lain-lainnya, saya selaku Menteri Luar Negeri selalu berpendirian yang konsisten daripada satu mesyuarat ke mesyuarat yang lain tetapi Yang Berhormat, saya ingat barangkali tidak membaca apa yang saya katakan dalam ucapan-ucapan saya daripada forum-forum tersebut dan oleh itu tidak apa, saya maafkan Yang Berhormat. Oleh kerana barangkali Yang Berhormat tidak dapat membaca apa yang saya utarakan dalam mesyuarat-mesyuarat tersebut...

Prof. Dr. P. Ramasamy [Batu Kawan]: [Bangun]

Dato' Sri Anifah bin Aman: Tuan Yang di-Pertua..

Dr. Dzulkefly Ahmad [Kuala Selangor]: Jawab.

Dato' Sri Anifah bin Aman: Kita semua bersyukur.

Dr. Dzulkefly Ahmad [Kuala Selangor]: Yang Berhormat Menteri. Soalan jawab.

Timbalan Yang di-Pertua [Datuk Ronald Kiandee]: Yang Berhormat tidak boleh macam ini Yang Berhormat.

Dato' Sri Anifah bin Aman: Atas daya usaha dan keprihatinan kerajaan, 12 rakyat Malaysia yang terlibat telah berjaya dibebaskan dan selamat pulang ke tanah air. Manakala enam lagi rakyat Malaysia telah dibebaskan dan dijangka pulang ke tanah air pada hari ini.

Tuan Yang di-Pertua, semasa pertemuan saya dengan Menteri Luar Negara Jordan, TYT Nasser Judeh dan TYT Nasser Lozi Ketua Istana di-Raja Jordan, saya telah menyampaikan penghargaan Kerajaan Malaysia kepada Baginda Raja Abdullah II Ibn Al Hussein, Raja Jordan dan Kerajaan Jordan di atas segala bantuan yang membolehkan pembebasan rakyat Malaysia dan ditahan Rejim Zionis Israel. Saya juga menghubungi Menteri Luar Negeri Turki TYT Ahmet Davutoglu untuk menyampaikan penghargaan Kerajaan Malaysia kepada kerajaan Turki yang turut membantu. Malaysia juga merakamkan setinggi-tinggi penghargaan kepada kerajaan Ireland, Filipina, Thailand dan juga negara-negara lain yang terlibat.

Tuan Yang di-Pertua, saya ingin menegaskan sekali lagi bahawa kerajaan Malaysia akan terus menyokong perjuangan rakyat Palestin dalam menuntut hak mutlak mereka bagi menubuhkan sebuah negara Palestin yang bebas, merdeka dan berdaulat. Malaysia juga akan terus menyokong segala usaha masyarakat antarabangsa untuk memastikan bencana kemanusiaan yang menimpa rakyat Palestin di Gaza tidak berterusan.

Sukacita saya ingin memaklumkan bahawa usul ini akan dikemukakan kepada PBB melalui surat Yang Amat Berhormat Perdana Menteri kepada Presiden Perhimpunan Agung PBB untuk tindakan seterusnya. Kerajaan mengambil maklum mengenai cadangan dan pandangan yang dikemukakan Ahli-ahli Yang Berhormat semasa perbahasan usul ini dan berterima kasih kepada semua Ahli Yang Berhormat. Walau bagaimanapun, memandangkan masa tidak

mengizinkan, kerajaan akan meneliti dan mengkaji cadangan-cadangan berkenaan.

Tuan Yang di-Pertua, saya mohon mencadangkan.

Timbalan Yang di-Pertua [Datuk Ronald Kiandee]: Terima kasih Yang Berhormat.

Ahli-ahli Yang Berhormat, sekarang saya kemukakan masalah kepada Majlis bagi diputuskan. Masalahnya bahawa usul Yang Amat Berhormat Perdana Menteri seperti yang tertera dalam Aturan Urusan Mesyuarat hari ini di bawah Perkara 1 hendaklah disetujui.

Usul dikemuka bagi diputuskan; dan disetujui.

Timbalan Yang di-Pertua [Datuk Ronald Kiandee]: Yang Berhormat Menteri, Usul Penangguhan.

Dato' Mahfuz bin Haji Omar [Pokok Sena]: Saya cadangkan ditangguhkan... *[Ketawa]*

USUL

MENANGGUHKAN MESYUARAT DI BAWAH P.M. 16(3)

Menteri Sumber Asli dan Alam Sekitar [Dato' Seri Douglas Uggah Embas]: Tuan Yang di-Pertua, saya mohon mencadangkan:

"Bahawa mengikut Peraturan Mesyuarat 16(3), mesyuarat ini ditangguhkan sekarang."

Timbalan Menteri Tenaga, Teknologi Hijau dan Air [Puan Noriah binti Kasnon]: Tuan Yang di-Pertua, saya mohon menyokong.

Timbalan Yang di-Pertua [Datuk Ronald Kiandee]: Baik.

UCAPAN-UCAPAN PENANGGUHAN

Penyerahan Medan Minyak Blok 'L' dan 'M' kepada Brunei dan Pencabulan Terhadap Kedaulatan Negara

5.45 ptg.

Dato' Seri Anwar Ibrahim [Permatang Pauh]: Tuan Yang di-Pertua, terima kasih. Pagi tadi Yang Berhormat Menteri telah memberikan beberapa penjelasan berhubung dengan medan minyak Blok 'L' dan 'M' kepada Brunei dan pencabulan terhadap kedaulatan negara. Jadi selain daripada membangkitkan isu telah dijelaskan, izinkan saya kerana pagi tadi tidak sempat soal tambahan.

Timbalan Yang di-Pertua [Datuk Ronald Kiandee]: Yang Berhormat kena baca teks Yang Berhormat. Teks yang telah dikemukakan.

Dato' Seri Anwar Ibrahim [Permatang Pauh]: Ya, memang dalam peraturan baca teks tetapi tidak ditetapkan baca teks kesemuanya Tuan Yang di-Pertua. Teks itu telah diulas pagi tadi oleh Yang Berhormat Menteri Luar Negeri

dan oleh kerana masa tidak mengizinkan Tuan Yang di-Pertua terpaksa meneruskan dengan usul Yang Amat Berhormat Perdana Menteri. Oleh yang demikian saya ingin memanfaatkan waktu ini supaya tidak mengulang apa yang telah disebut tadi. Menyentuh tentang teks tadi dan juga perkembangan terbaru...

Timbalan Yang di-Pertua [Datuk Ronald Kiandee]: Tidak boleh Yang Berhormat. Usul Penangguhan ini harus tetap mengikut teks.

Dato' Seri Anwar Ibrahim [Permatang Pauh]: Ikut peraturan mana, yang Tuan Yang di-Pertua baca peraturan mana?

Timbalan Yang di-Pertua [Datuk Ronald Kiandee]: *"Perkara 17(2). Sesiapa Ahli yang hendak mengeluarkan sesuatu perkara menurut syarat-syarat dalam perenggan satu hendaklah memberitahu dengan surat kepada Tuan Yang di-Pertua, tidak kurang dari tujuh hari sebelum persidangan mesyuarat yang hendak dikeluarkan perkara itu..."* Maknanya kita tidak boleh – Ucapan Penangguhan itu harus berpandukan kepada teks yang telah dikemukakan sebelum itu dan ianya tidak membenarkan perubahan, *to be fair to the Minister* untuk menjawab terhadap usul. Ini secara kebetulan hari ini, usul penangguhan ini berkaitan dengan soalan lisan yang dikemukakan. Kalau tidak perkara ini tidak berbangkit Yang Berhormat.

Jadi saya minta Yang Berhormat membaca teks ini dan terserah kepada Yang Berhormat Menteri untuk menjawab.

Dato' Seri Anwar Ibrahim [Permatang Pauh]: Terima kasih. Itu sebenarnya apabila Tuan Yang di-Pertua baca tadi memang dia tidak beri teks mesti baca seluruh teks. Dia kata berikan itu sebagai panduan.

Timbalan Yang di-Pertua [Datuk Ronald Kiandee]: Akan tetapi usul dikemukakan tujuh hari sebelum persidangan. Maknanya dia memberi tempoh kepada kementerian untuk memberi jawapan berpandukan...

Dato' Seri Anwar Ibrahim [Permatang Pauh]: Tujuh hari dalam perkembangan dunia itu sekejap...

Timbalan Yang di-Pertua [Datuk Ronald Kiandee]: Tidak apalah Yang Berhormat.

Dato' Seri Anwar Ibrahim [Permatang Pauh]: ...Banyak perkembangan berlaku. Pada 30 April, 2010 buat pertama kali rakyat mendapat tahu dengan pasti bahawa dua medan minyak Blok 'L' dan Blok 'M' kepunyaan negara telah diserahkan oleh Kerajaan Persekutuan kepada Brunei.

■1750

Dalam satu kenyataan yang dipetik BERNAMA pada hari tersebut, mantan Perdana Menteri, Yang Berhormat Kepala Batas mengesahkan medan minyak Blok 'L' dan 'M' menjadi milik Brunei. Bernama turut melaporkan pengakuan Tun Abdullah bahawa, *"Sebagai Perdana Menteri Malaysia, saya menandatangani pertukaran surat itu dengan Sultan Brunei setelah Kabinet Malaysia meluluskan urusan itu pada 11 Februari 2009."* Penyerahannya dimeterai pada 16 Mac 2009, selang 17 hari sebelum Yang Berhormat Kepala Batas meletakkan jawatan sebagai Perdana Menteri pada 3 April 2009 dan ini memang disahkan oleh Menteri Luar pagi tadi. Itu boleh disebut ya, tiada dalam teks. Penyerahan medan minyak ini dirahsiakan...

Timbalan Yang di-Pertua [Datuk Ronald Kiandee]: Sebentar Yang Berhormat, saya cuma hendak habiskan ayat tadi, 17(2) itu. *"Hendaklah disertakan bersama satu teks ucapan yang tidak melebihi daripada 400*

perkataan". Tuan Yang di-Pertua boleh meng'*edit*' isi ucapan itu dan Ahli itu hendaklah (*shall*) membaca teks yang diluluskan itu sahaja.

Datuk Seri Anwar bin Ibrahim [Permatang Pauh]: Oh cepat, saya cuba hendak uji Tuan Yang di-Pertua.... [*Ketawa*]

Timbalan Yang di-Pertua [Datuk Ronald Kiandee]: Ya terima kasih Yang Berhormat.

Datuk Seri Anwar bin Ibrahim [Permatang Pauh]: Penyerahan medan minyak ini dirahsiakan daripada pengetahuan umum dan hanya didedahkan lebih setahun kemudian. Pendedahan mengenai penyertaan tersebut amat memeranjatkan kerana ia membabitkan kedaulatan wilayah, kepentingan maritim dan ekonomi negara. Setahun kemudian itu pun melalui syarikat minyak cari gali yang dilantik oleh Petronas, tidak melalui Kementerian Luar atau Parlimen.

Ketika membentangkan Rang Undang-undang Garis Pangkal Zon Maritim 2006, Menteri di Jabatan Perdana Menteri, Yang Berhormat Padang Rengas memberitahu Dewan Rakyat bahawa bagi menjaga kepentingan maritim negara, Malaysia telah meluluskan kawasan perairan laut wilayah dan pelantar benua Malaysia melalui pengisytiharan peta baru Malaysia pada 21 Disember 1979. Ini juga disahkan oleh Menteri Luar pagi tadi.

Peta baru Malaysia 1979 diterbitkan oleh Pengarah Pemetaan Negara dalam dua *sheet*, iaitu Semenanjung Malaysia dan Sabah dan Sarawak. Ini semua diulang oleh Menteri Luar tadi. Menurut peta baru Malaysia 1979 ini, dalam *sheet* Sabah dan Sarawak – ini sebab mengapa wakil Parlimen Sabah dan Sarawak mesti ambil tahu dan kerajaan negeri mesti dirundingkan walaupun kuasa itu kuasa Perlembagaan Persekutuan dan Kerajaan Persekutuan.

Sempadan wilayah negara merangkumi perairan yang mengandungi medan minyak Blok 'L' dan 'M'. Pengisytiharan wilayah Malaysia dibuat dengan rasminya sebelum Brunei dimasyhurkan kemerdekaannya pada tahun 1980 walaupun disahkan oleh PBB pada tahun 1984. Ini petanya yang disahkan yang jelas menunjukkan... [*Menunjukkan sebuah peta*] Nampak Tuan Yang di-Pertua? Kalau tidak nampak, saya hantar kemudian. Saya takut Menteri Luar tidak tengok peta ini.

Timbalan Yang di-Pertua [Datuk Ronald Kiandee]: Terbalik itu Yang Berhormat.

Datuk Seri Anwar bin Ibrahim [Permatang Pauh]: Boleh tahan mata ya, dari jauh boleh nampak. Di sini menunjukkan yang jelas yang ditetapkan oleh Malaysia dan disahkan oleh kerajaan dan Parlimen Malaysia. Keputusan Kerajaan Persekutuan menyerahkan wilayah perairan ini melalui keputusan Kabinet pada 11 Februari 2009 yang turut dianggotai oleh Perdana Menteri sekarang adalah satu pengkhianatan terhadap kedaulatan negara dan pencabulan serius ke atas Perkara 2, Perlembagaan Persekutuan.

Ini kerana yang kita bicarakan ini melibatkan dana besar, kepentingan Sabah dan Sarawak khususnya Sabah dalam konteks ini. Dana yang melibatkan lebih USD300 bilion dalam tempoh 10 tahun. Sebab itulah kita minta dan mohon penjelasan secara terperinci kerana jawapan yang mengaitkan bahawa isu ini diterima tetapi kerana ia bersifat unilateral, kemudian Brunei juga membuat satu tuntutan unilateral, kemudian kita ada perjanjian di antara dua tuntutan unilateral, kemudian menyerah begitu sahaja.

Ada banyak persoalan, mengapa negara boleh menyerah begitu sahaja? Mengapa tidak seperti Thailand, *joint development of authority*? Mengapa tidak

dirujuk kepada mahkamah antarabangsa? Kalau tidak, seperti mana yang disebut oleh Menteri Luar tadi, sekurang-kurangnya perjanjian itu mestilah dikenal pasti. Satu perkara yang sangat penting saya sentuh di sini...

Timbalan Yang di-Pertua [Datuk Ronald Kiandee]: Yang Berhormat.

Datuk Seri Anwar bin Ibrahim [Permatang Pauh]: Tuan Yang di-Pertua, dah-dah, sudah selesai, setuju, habis. Iaitu jawapan Menteri Luar bahawa Kerajaan Brunei bersetuju sebagai *exchange* untuk *surrender*, untuk menutup kes Limbang. Saya hendak baca kenyataan *Brunei's Second Minister of Foreign Affairs and Trade*, Datuk Seri Lim Jock Seng dengan izin, "*Certain press reports yesterday (Monday) claimed that Brunei has dropped claims over Limbang. In fact, the claim on Limbang was never discussed*"...

Timbalan Yang di-Pertua [Datuk Ronald Kiandee]: Yang Berhormat.

Datuk Seri Anwar bin Ibrahim [Permatang Pauh]: Jadi oleh yang demikian, saya ingin menjelaskan di sini walaupun dia kata Limbang *was not discussed* tetapi *it has been stated Brunei has dropped the issue and that means Limbang is part of Malaysia*. Itu dinafikan tetapi 'L' and 'M' dipersetujui sebagai sebahagian daripada hak Brunei.

Tuan Yang di-Pertua, tengok peta ini, bila kita setuju dengan perjanjian baru, ia melibatkan banyak kepentingan lain. Saya ingin tegaskan di sini, saya tidak pertikai hasrat kita berbaik dengan Brunei, berunding dengan baik, cari penyelesaian dan muafakat yang baik. Yang saya pertikaikan ialah mudah sangat kita menyerahkan kepentingan hasil minyak negara dan kawasan sempadan kita dengan mengatakan kawasan ini dipertikai.

Maknanya selama kita merdeka, Semenanjung tahun 1957 dan Malaysia tahun 1963, kita luluskan unilateral *demand* kita itu *unreasonable, not based by historical facts*. Dan ini yang menyebabkan mengapa hal ini harus diteliti dan saya mohon Menteri Luar bukan sahaja jawab berdasarkan teks yang dibacakan pagi tadi tetapi sedia rujuk semula kepada Jemaah Menteri bahawa rakyat terutamanya Parlimen dan Kerajaan Negeri Sabah dan Sarawak berhak tahu apa yang berlaku dan kerugian akibat daripada tindakan gopoh yang dilakukan oleh Kerajaan Persekutuan... [Tepuk]

Timbalan Yang di-Pertua [Datuk Ronald Kiandee]: Silakan Yang Berhormat Menteri, jawab mengikut teks yang telah dikemukakan tujuh hari sebelum ini... [Disampuk] Tidak boleh Yang Berhormat, kita selalu bercakap tentang tidak boleh bercanggah dengan peraturan, kerana itu kita kena *stick* kepada peraturan yang ada. Ya, silakan Yang Berhormat.

5.58 ptg.

Menteri Luar Negeri [Dato' Sri Anifah bin Aman]: Terima kasih Tuan Yang di-Pertua. Saya mengambil kesempatan ini untuk mengucapkan terima kasih juga kepada Yang Berhormat Permatang Pauh atas ucapan penangguhan beliau yang bertajuk Penyerahan Medan Minyak Blok L dan M, Brunei dan Pencabulan Terhadap Kedaulatan Negara.

Oleh sebab saya akur kepada Tuan Yang di-Pertua, saya akan baca teks ini. Cuma sebelum saya berucap, saya juga penuh peta-peta, kalau Yang Berhormat Permatang Pauh mahu, saya juga boleh beri tetapi saya punya secara...

Datuk Seri Anwar bin Ibrahim [Permatang Pauh]: Saya bawa lagi tebal... [Ketawa]

Dato' Sri Anifah bin Aman: Okey, sama-sama. Yang Berhormat Permatang Pauh, saya juga pun ada Yang Berhormat, saya ingat Yang Berhormat Permatang Pauh dapat daripada kita juga.

Datuk Seri Anwar bin Ibrahim [Permatang Pauh]: Tidak, tidak!

Dato' Sri Anifah bin Aman: Tidak tahulah daripada mana, barangkali kalau bukan dari Wisma Putra dan lainnya, barangkali tidak tepat... *[Ketawa]*

Tuan Yang di-Pertua, seperti yang saya telah jelaskan secara panjang lebar pada pagi tadi sewaktu menjawab pertanyaan-pertanyaan jawab lisan Ahli-ahli Yang Berhormat berkenaan dengan isu ini, saya sekali lagi ingin menegaskan bahawa tidak wujud isu bahawa kerajaan ingin merahsiakan perkara ini daripada pengetahuan umum.

Seperti Dewan yang mulia ini sedia maklum, majlis pertukaran surat telah diadakan pada 16 Mac 2009 di Istana Nurul Iman, Bandar Seri Begawan Brunei Darussalam.

Majlis tersebut telah diberikan liputan yang meluas oleh media Malaysia dan Brunei Darussalam. Yang Amat Berbahagia Tun Abdullah Ahmad Badawi juga telah pun mengadakan satu sidang akhbar selepas majlis tersebut untuk media massa Malaysia bagi memaklumkan perkara yang telah dipersetujui dengan Brunei Darussalam kepada pihak media Malaysia.

■ 1800

Tuan Yang di-Pertua seperti yang telah dimaklumkan juga sebelum ini, penyelesaian berpakej seperti yang terkandung di dalam pertukaran surat bukanlah suatu pengkhianatan terhadap kedaulatan wilayah negara dan ia tidak merupakan pencabulan ke atas Perkara 2 Perlembagaan Persekutuan. Ini adalah kerana kawasan perairan wilayah dan pelantar benua yang dituntut oleh negara seperti ditunjukkan dalam peta Malaysia 1979 adalah merupakan tuntutan unilateral dan negara-negara lain tidak terikat untuk mengiktiraf tuntutan tersebut.

Malaysia bersedia berbincang dengan negara-negara jiran tentang pembatasan sempadan maritim bagi kawasan-kawasan yang belum ada perjanjian sempadan maritim.

Saya juga ingin memaklumkan bahawa elemen-elemen yang dipersetujui dalam pertukaran surat khususnya yang melibatkan persempadanan maritim dan darat tidak mengubah sempadan mana-mana negeri yang berkaitan malahan mengesahkan sempadan yang wujud di antara Sabah dan Sarawak dengan Brunei Darussalam. Oleh yang demikian, tuduhan bahawa pertukaran surat adalah bercanggah dengan Perkara 2 Perlembagaan Persekutuan adalah tidak benar sama sekali.

Tuan Yang di-Pertua, elemen-elemen utama penyelesaian secara berpakej seperti yang terkandung di dalam pertukaran surat pada 16 Mac 2009 merupakan satu penyelesaian yang saksama dan membuka lembaran baru di dalam hubungan di antara Malaysia dan Brunei Darussalam. Sekian, terima kasih.

**Pencemaran Serius Kampung Bukit Beruang
Kuala Sungai Baru, Melaka.**

6.01 ptg.

Tuan Sim Tong Him [Kota Melaka]: Terima kasih Tuan Yang di-Pertua. Tajuk ucapan penangguhan saya ialah pencemaran yang serius di Kampung Bukit Beruang Kuala Sungai Baru, Melaka.

Pencemaran ini berpunca dari penternak ayam mengumpul dan mengeringkan tahi ayam secara semula jadi atau *natural open drying method*. Pihak penternak juga membuang najis-najis ayam di ladang-ladang kelapa sawit, parit-parit dan hutan simpanan yang berdekatan.

Air parit yang tercemar itu mengalir ke Sungai Linggi. Ini telah menyebabkan pokok dan ikan mati. Ayam hutan, babi hutan, monyet dan buaya keluar dari hutan dan mencari makanan di sekeliling kampung. Bau busuk tahi ayam telah menjejaskan kesihatan penduduk di sekitarnya. Mereka rasa muntah dan pening apabila terhidu bau busuk ini.

Perkara ini telah menyebabkan anak-anak di bandar tidak mahu balik ke kampung sendiri. Beberapa penduduk yang bekerja berdekatan dengan tapak pengeringan itu telah dijangkiti penyakit paru-paru. Terdapat melebihi 100 ekor kambing yang ditenak berdekatan dengan tapak pengeringan tersebut telah mati.

Aduan-aduan telah dibuat melebihi 14 kali sejak 26 Mac 2004 kepada semua jabatan berkenaan dan maklum balas daripada jabatan-jabatan seperti berikut:

- (a) pada 30 Disember 2005, surat dari Jabatan Ketua Menteri Melaka mengatakan MPAG telah mengeluarkan notis nombor 0095 bertarikh 22 Disember 2005 kepada pemilik, penternak supaya menghentikan aktiviti pemprosesan najis ayam di kawasan tersebut dengan serta-merta. Sebagai jaminan, pihak MPAG telah mengambil tindakan tidak memperbaharui lesen ternakan ayam tersebut;
- (b) pada 10 Februari 2006, surat dari Jabatan Ketua Menteri Melaka mengatakan aktiviti memproses tahi ayam telah dihentikan tetapi sehingga hari ini kerja-kerja pengeringan tahi ayam masih dijalankan;
- (c) pada 31 Julai 2006, surat dari MPAG mengatakan MPAG telah menahan lesen penternak; dan
- (d) pada 5 April 2010, ketidaktepatan siasatan pihak Jabatan Perkhidmatan Veterinar Negeri Melaka antaranya tiada kawasan pemprosesan najis ayam dengan kawasan rumah adalah kurang dari satu kilometer tetapi laporan mereka ialah dua kilometer. Laporan pihak berkenaan mengatakan bahawa kawasan bau najis tidak kuat, sebenarnya bau sangat serius pada waktu malam dan awal pagi tetapi mereka tidak membuat siasatan pada waktu itu.

Pihak tersebut tidak membuat siasatan ke parit-parit yang telah dicemari oleh najis ayam. Gambar-gambar pencemaran di parit telah penduduk kirimkan

kepada surat khabar dan Yang Berhormat ADUN Kuala Linggi juga pernah melaporkan kenyataan sebegini. Laporan siasatan tentang najis ayam hanya dijadikan baja ladang pemilik tidak pernah membawa masuk dari ladang luar, kenyataan ini adalah tidak benar.

Maklum balas dari PPB daerah Alor Gajah menyatakan keadaan sekarang adalah bertambah baik. Maklum balas tersebut tidak benar malahan keadaan bertambah serius.

Lesen penternak telah ditahan pada tahun 2005, berkali-kali pegawai telah datang ke tempat tersebut tetapi aktiviti memproses najis ayam masih dijalankan. Sikap pegawai jabatan tidak menjalankan tugas dengan betul, tidak koordinasi di antara jabatan, laporan yang dibuat hanya tidak dilayan. Inilah sikap pegawai-pegawai Kerajaan Malaysia yang menyebabkan masalah tidak dapat diatasi. Terima kasih Tuan Yang di-Pertua.

Timbalan Yang di-Pertua [Datuk Ronald Kiandee]: Silakan Yang Berhormat Menteri.

6.06 ptg.

Timbalan Menteri Pertanian dan Industri Asas Tani II [Tuan Chua Tee Yong]: Terima kasih Tuan Yang di-Pertua. Terima kasih atas ucapan penangguhan.

Tuan Yang di-Pertua, siasatan terhadap aduan pencemaran dari Yang Berhormat Sim Tong Him, Kota Melaka telah dijalankan oleh Jabatan Perkhidmatan Veterinar di kawasan ladang ayam di Kampung Bukit Beruang Kuala Sungai Baru Melaka pada 22 Mac 2010, jam 11.00 pagi bersama pemilik-pemilik ladang tersebut iaitu Encik Ng Kee Chuan dan Encik Ng Peng Lim.

Ladang diusahakan oleh Syarikat Ng Hup Heng Enterprise. Hasil siasatan yang telah dijalankan mendapati:

- (i) ladang ayam terletak dalam kawasan ladang kelapa sawit milik penternak. Reban ayam adalah menggunakan kaedah sistem reban tertutup. Kawasan reban ayam didapati terurus dan kurang kesan pencemaran bau dan lalat;
- (ii) pemprosesan najis untuk dijadikan baja dilakukan di suatu kawasan terletak lebih kurang satu kilometer dari reban ayam. Terdapat dua buah bangunan berbumbung untuk memproses dan membungkus baja dan tinjauan mendapati kesan pencemaran bau dan lalat adalah kurang;
- (iii) satu bahagian yang terbuka bersebelahan bangunan tertutup dengan jarak keluasan lebih kurang 500 meter ialah tempat di mana najis ayam baru dikeringkan. Dimaklumkan najis berkenaan dibiarkan dalam masa satu bulan. Kawasan tersebut mengeluarkan bau namun tidak terdapat lalat dan ulat. Sejenis bahan *organic fertilizer concentrate* telah digunakan dalam proses tersebut. Dimaklumkan penggunaan EM didapati tidak berkesan seperti bahan yang digunakan sekarang;

- (iv) adalah didapati najis ayam yang digunakan untuk dijadikan baja adalah dari ladang pengusaha dan tidak dibawa masuk dari ladang luar.

Sekian, terima kasih.

Timbalan Yang di-Pertua [Datuk Ronald Kiandee]: Ahli-ahli Yang Berhormat, Mesyuarat Dewan hari ini ditangguhkan sehingga jam 10 pagi, hari Selasa, 8 Jun 2010.

Dewan ditangguhkan pada pukul 6.09 petang.